



BIBLIOTHECA
UNIV. JAGELL.
CRACOVENSIS

586931

kat. korp.

Mag. St. Dr.



MXLT $\frac{4}{57}$ $\frac{4}{57}$
x



586931

Mag. St. Dr.

COLLECTIO MEDITATIONUM
PROCTIDUANA RECOLLECTIONE IN EXERCITIIS
SANCTI P. N. IGNATII

AD USUM

Scholasticorum Soc: JESU.



POŁOCIE

In Privilegiata à SUA IMPERATORIA
Majestate Typographia Coll: Soc: JESU
A. D. 1794.

586 937

I

1973. K. 101 St. Dr

Bibl Joy



MEDITATIONUM SANCTI PATRIS IGNATII

SERIES SECUNDA.


DIES PRIMA.

Finis, quem respiciunt omnes hujus diei Meditationes consistit in his duobus punctis: 1. Ut bené & vivaciter agnoscas finem tuum unicum, ad quem creatus es, in eo versari, ut DEUM in hoc mundo ames, glorifices, Illi servias; in altero verò, ut Illo æternum fruaris. 2. Ut seriò te resolves, ex omnibus viribus ad hunc finem tendere.

MEDITATIO PRIMA.

DE FINE ULTIMO HOMINIS.


I.P. *Nihil esse potest æquius, quam vivere secundum suum finem DEUM ex corde amare & glorificare. Redi modicum in te o anima & perpende tuam originem. Ante annos*
A2 mille



mille eras nihil. Post aliquot sæcula dein DEUS respexit hoc nihilum, formavit tibi corpus, infudit animam immortalem, & sic hominem te fecit: ergo tu es Opus infinitæ Sapientis, Omnipotentis, & infinite Boni DEI!

Infinita Sapientia facere & operare nihil potest, quin Sibi finem Se dignum præfigat. Finis ergo cur te ex nihilo extraxerit, erat gloria DEI, ut Illum in hoc mundo agnoscas, ames, glorifices. & in altero, ut Illo æternum fruaris. Credis hoc?... Singulis momentis, quæ hucusque vixisti, debuisses DEUM Tuum amare, glorificare: Singulis momentis, quæ in posterum victurus es, debes id ipsum facere.... Quare?--

1. *Hoc exigit bonitas DEI.* Imaginare tibi anima mea, te quidem in eodem statu, in quo es, natam esse, sed mutam & elinguem: hodie de Cælo descendens DEUS vincula linguæ solvit, & loquendi tibi tribuit potestatem: Sed simul addit mandatum, ut in debitam gratitudinem, verbum nullum, nisi ad gloriam Illius unquam proferas. Posset-ne esse aliquid æquius, quàm ut illa lingua DEUM laudet, cui Ille Solus loquendi potestatem dedit?... Circumspice, & considera te benè: an membrum ullum in corpore toto habes, quod tibi DEUS non dedit?.. An ulla est in anima tua potentia, quam



3

quam à DEO non accepisti?... An ergo æquum non est, ut illud cor DEUM amet, quod Ille dedit: illæ manus pro DEO laborent, quas Ille formavit?.....

2do. *Hoc exigit DEI in te dominium.* Altius esse non pōtest dominium, quàm illud DEI Tui in te. Ille te creavit & quidem ex nihilo, consequenter est absolutus tuus & omnium tuorum Dominus.... Qui hortum plantat, est Dominus horti, & omnium fructuum, qui ibi nascuntur, & qui unicum pōmum decerpit contra illius voluntatem, furtum & injustitiam committit.... DEUS te creavit, & est Dominus tuus omniumquē tuorum, quæ habes; unicum ergo affectum, qui in DEUM non tendat, admittere, unicum verbum proferre, quod ad Illius laudem non cedat, unicum opus facere, quod propter Illum non fiat, furtum est & injustitia. An agnoscis nunc anima mea, quàm sit æquum DEO servire, Illum ex corde amare, & glorificare? Quomodo hanc tuam obligationem implevisti?... Duplici modo errari in servitio DEI potest: 1. Si otieris, & quod Domino debes, aut intermittas plane, aut obiter & perfunctoriē peragas 2. Si malitiosus sis & Dominum tuum diversis injuriis afficias.... Quomodo DEO hucusquē servivisti? Quid ait tua conscientia?...

A F.

A F F E C T U S

Confusionis sui ipsius. O mi DEUS! agnosco errorem meum! Unicus meus finis erat, Te ex corde amare & glorificare; omne temporis momentum, omne verbum, omnis mea actio, honori Tuo sacrari debuisset... Et quid factum est? Tot millia horarum, affectuum, verborum, operum meorum, quo tendebant?... Pleraque in creaturas, in Te o DEUS, paucissima!... Parum hoc est, quot dies lapsi, quibus Te nulla positiva injuria affeci?... Væ mihi! quàm negligens, ingratus, malitiosus....

Doloris. Quid jam aliud facere possum, quàm ad Tuam o DEUS! misericordiam confugere, & veniam petere? O! Detestor, quantum possum ex toto corde, singula momenta Tuo honori subtrahere. Quis det mihi ut tot horas tam pretiosas sed perditas redimam?...

P. II. *Nihil potest esse utilius, quam vivere secundum finem suum & DEUM ex corde amare & glorificare.* Finis, ad quem creatus es, non solum gloria DEI est ut Illum ames, & glorifices, sed etiam tua æterna felicitas, ut Illò nempe æternum fruaris. Quàm certum est, te nunc vivere in terris, tam certum est, te olim futurum in Cælis, si DEO fideliter serviveris. Siste híc, anima mea, & perpende hoc bonum, quod te expectat.

1. In



1. *In Coelo est immensa felicitas pro anima.*
 Felicitatem, quâ anima in Cælo fruetur, velle comprehendere, est tam impossibile, quam exhaurire maria. Unica hæc cogitatio magnitudinem felicitatis aliquo modo adumbrat. Sicut DEUS est Ens infinitum; ita Illius felicitas infinita esse debet. Nam minor quæcunque felicitas, infinitum Ens nec deceret, nec oblectare posset... Felicitas DEI ergo est infinita, & eadem hæc felicitas est finis tuus. DEUS vult te eadem, quâ Ille felicitate, iisdem, quibus Ille fruitur, gaudiis & voluptatibus frui!...

2. *In Coelo est immensa felicitas pro corpore.* Anima corpori juncta est, dum DEO servit, ergo anima æternâ beatitudine fruens, corpus habebit socium ejusdem felicitatis. Sed quanta hæc erit?... Fides docet, tanta, quantam nec oculus vidit, nec auris audivit: tanta, quantam capere non potest ullus intellectus creatus!... DEUS totam Suam Omnipotentiam impendit ad procurandam corpori gloriam & oblectationem omnem... Et quid non potest Omnipotentia?...

3. *Utraque hæc felicitas in Coelo est æterna.*
 Quam vana est omnis terrena felicitas. Ante annos centum erant Reges & Imperatores, coram quorum Majestate milliones hominum flexerunt genua, quorum divitias, felicitatem miraba-



mirabatur Orbis, quorum potentiam formidabant Regna finitima. Ubi sunt nunc? Putruerunt & cineres illorum pedibus calcantur. -- Sunt & hodie Reges & Principes, qui tanquam dii suspiciuntur & coluntur ab hominibus, sed post annos centum, quid erit super? Manipulus cinerum, quos ventus disperget!... Regnum, quod te expectat est alterius longe naturæ & qualitatis. Omnia in illo sunt æterna. Illa infinitæ dulcis fruitio Sanctissimæ Trinitatis, est æterna, æterni amplexus dulcissimi JESU, æterna conversatio & familiaritas Beatissimæ V. M. & Sanctorum, æterna illa pulchritudo Paradisi, æterna omnium gaudiorum, quibus fruemur, superabundantia! Omnia sine imminutione, mutatione, interruptione, sine fine, æterna....

A F F E C T U S

1. *Spei* O DEUS! O immensa Bonitas! quantum me consolatur hæc veritas! Coelum est mea Patria, mea hæreditas, mea merces, meus finis ultimus! Ita est: pro me DEUS Coelum creavit!.... Si Illum nunc amem & glorificem, veniet illa dies, quâ ego Sole & stellis splendidior, in Paradisum hunc voluptatis receptus, JESUM, dilectum meum, tenerrimo amplexu stringam, ubi corpus & anima gaudiis inefabilibus repleta.... Felix dies! An te sperare licet?

licet? O spero, spero cum fiducia! JESUS meus mihi promisit!...

2. *Contemptus omnium terrenorum.* Sed quid? Si Coelum est meum, cur mundum, & omnia, quæ in mundo sunt non contemno?... Cur contristant me dolores corporis, si idem corpus gloria æterna & voluptate fruetur olim?... Cur contemptus aliorum, quem nunc interdum patior, ita me affligit & turbat, si me DEUS & Sancti omnes per totam æternitatem amabunt & glorificabunt?... Cæcutiebam hactenus, vana bona mundi plus æquo æstimavi!... Imposterum-- Patere modicum anima, labora, o corpus! nunc. Erit quiescendi tempus, tempus gaudendi in æternum!...

P. III. *Nihil potest esse magis necessarium, quam secundum finem suum vivere & DEUM ex corde amare & glorificare.* Ita est, anima mea! Finis, quem sibi DEUS in tua creatione præfixit, est gloria Illius. Hic finis debet impleri & implebitur, tam certo, quam certum est DEUM esse... Nam vide & considera.

1. *DEUS est infinite Bonus & infinite Justus.* Hanc veritatem bene tibi inprime anima mea! Tanquam infinite Bonus non potest non amare & in æternum remunerari illos, qui illum diligunt; & tanquam infinite



nite justus non potest non odisse & æternum punire illos, qui illum contemnunt. Credis hoc?... Perge porro....

2. *Quà infinité Bonus Coelum, Et quà infinité Justus infernum creavit.* In Coelo fideles sibi animas æternum amabit, & remunerabitur; & illæ Ipsum in æternum laudabunt & benedicent. In Inferno infideles animas æternum odiò habebit & puniet, hæ verò Ipsum blasphemabunt.... In Coelo laudatur in æternum Illius Bonitas & misericordia; in Inferno timetur & sentitur Illius Majestas & Justitia.... Quid inde sequitur?...


3. *Sequitur, quod DEUS suum finem infallibiliter assequetur....* Quidcunque facies, semper gloriæ DEI promovendæ servies.... Si DEUM in terris amas, & glorificas, amabis & glorificabis Ejus misericordiam in Cælo in æternum! Sin secus, glorificabis in æternum Justitiam Illius. Infinité magno Domino, qualis est DEUS, non magis cedit ad honorem, si fideles Servos æternum remuneretur, quàm si puniat infideles in æternum. Propone tibi hic Anima mea! ex una parte Coelum apertum cum immensis gaudiis, quibus fruuntur Electi: ex altera patentem Infernum cum omnibus tormentis, quæ patiuntur reprobis, & sic te ipsam alloquere:...

DEUM

DEUM glorificare debeo, & quidem in æternum: quam parum DEUS cessabit unquam esse DEUS, tam parum decretum hoc suum unquam mutabit!... Ergo æternum vivam vel in Cælo, vel in Inferno!... Nam in altero mundo omnia sunt æterna.--- Hæc anima mea DEUM aut sine fine amabit, aut odio habebit, & blasphemabit! nam anima mea est æterna. Hoc meum corpus, aut gloriosum in Coelo exultabit in æternum; aut in tormentis Inferni ejulabit in æternum: nam corpus est ibi æternum. Hæc meæ meæ manus, aut JESUM stringent amplexibus æternis; aut æternis vinculis adstringentur. Hi mei oculi, aut gloriosa Civium Coelestium corpora, aut monstra infernalium sine fine intuebuntur. Hæc mea caro, mea membra, aut incomprehensibili felicitate gaudebunt, aut ardebunt in igne sempiterno.--- Ad quid me resolvo? utrumque a meo pendet arbitrio.--- Unum è duobus me expectat!....

A F F E C T U S.

Timoris Quid dicam o mi DEUS?--- An perveniam ad Cælum?---- Terribilis questio, quæ me timore & tremore complet. An perveniam ad Cælum?.... Nescio. Hoc scio quod Tu dixeris: Qui amat animam suam in hoc mundo, perdet eam: & qui odit animam suam
in hoc



in hoc mundo in vitam æternam custodit eam. Amare animam suam significat, sensualitati studere, sequi propriam voluntatem, contemptum fugere, irasci illis, qui nos offendunt. Animam suam odisse significat, se generosè vincere, abnegare voluntatem suam, malis bona reddere &c:.. An hoc feci?.. Væ mihi!... Effatum Christi condemnat me hac hora: quia non fui hucusque ex illis, qui oderunt animam suam!....

Propositum. Si obtentum vel amissum finem meum sequitur felix, vel infelix æternitas, quomodo est possibile, ut tam parum sollicitus sim illum obtinendi? An non deberem esse paratus, hoc momento, si esset necesse, profunderè sangvinem ad Coelum obtinendum, vel evitandum Infernum?... Certe pro assequendo bono infinito & evitando infinito malo nunquam satis laborare, nunquam satis possum pati! - En ergo o mi DEUS! in Tuo conspectu firmiter propono, finem meum persequi, quantumcunque constet. Et ut certius illum assequar, statuo amodo omnia facere, quæ necessaria vel utilia in his Exercitiis esse cognovero.

Imploratio Divinæ gratiæ. Sed quoties jam hæc proposui, & quoties eadem proposita iterum violavi? - Agnosco, nisi venerit auxilium &

lium & fortitudo ex alto, actum est de me. Ad Te itaque, o mi DEUS! confugio, & ex corde contrito clamo: Ignosce mihi, o summum Bonum! negligentias & peccata mea. Noli mecum agere, o DEUS! secundum merita mea, vel secundum rigorem Justitiæ Tuæ, sed secundum magnam & infinitam misericordiam Tuam! Illumina me, O Pater æternè! ut intime perspiciam, quid me oporteat facere, move cor meum, ut, quæ necessaria videro, generosè me resolvam facere. Adde his Tuis gratiis & illam, ut tandem in exequendis propositis constantior evadam. Quid juvaret misericordissime DEUS! quod me creaveris; quid juvaret, o mi Salvator! quod Tuum pro me Sanguinem fuderis; quid juvaret o Divinissime Spiritus! quod me per gratiam Tuam hæredem feceris, si æternum perirem? ----

MEDITATIO SECUNDA.

DE FINE HOMINIS RELIGIOSI.

P. I. *Ut Secundum finem meum ultimum vivam, DEUMQUE amem, & glorificem, exigit Sublimitas mei Status.* Nescio, utrum Status tui sublimitatem satis cognoscas, anima mea! finis tuus ultimus est, DEUM in hoc mundo amare, & glorificare, sed modo subli-
miore &




miore, & perfectiore, quam omnes homines sæculares; in altero vero DEO æternum frui, sed in perfectiore gradu gloriæ, quam omnes homines sæculares. Jam perpende prærogativas, & commoda tui status.

1. *Prærogativa, Et commodum tui status est assecuratio beatitudinis.* Si tu, anima mea, secundum tuum statum vivas, facis DEO injuriam, quoties de salute tua vel minimum dubitas. Audi verba clara Christi: Omnis, qui reliquerit domum, vel Fratres, aut Sorores &c. propter nomen meum, centuplum accipiet, & vitam æternam possidebit. Quis ita loquitur? DEUS, in loquendo infinite verax, & in servandis promissis infinite fidelis. An ad consolationem tuam dici plus posset?

2. *Prærogativa, Et commodum tui status est Sanctitas, Et conjunctio cum DEO.* Eodem die, quo te DEUS ad Religionem, vocavit te statim ad Sanctitatem: Ille vult, ut dones illi totum cor tuum, omnes cogitationes, & affectus ad Illum dirigas, ut sine intermissione cum Illo agas, Illi colloquaris, Illi intimè uniaris: hic est finis, quem DEUS te vocando habuit. DEUS te solum ideo de mundo, in Religionem, ad vitam solitariam vocavit, ut cor tuum solus possideat, amore sui inflammet: & habitaculum sibi in eo paret, in quo ille te-

Ille tecum, & tu cum Illo suavissimam colere familiaritatem queas.

3. *Prærogativa, & commodum tui status est sublimis gradus gloriæ in Cælo.* Omnes Electi quidem sunt Cæli Principes, & fruuntur infinita felicitate: Sed tantum inter gloriam unius, & alterius tamen est discrimen, quantum est inter splendorem solis, & stellæ minoris. Tua est o anima mea, præ millionibus Electorum gloria sublimior, tibi est promissa, tibi parta. Si vis perfectus esse (ita ad te loquitur æterna Veritas) vende omnia, & da pauperibus, & habebis thesaurum in Cælo, & veni, sequere me. Imaginare tibi hîc Principem Throni quondam hæredem sed adhuc in cunis vagientem. Hic pusio, rationis usu destitutus felicitatem suam necdum capit; sed alii jam illum felicem prædicant, & statum illius tanquam statum mundi exoptatissimum considerant. Quare? hæres est Regni potentissimi: post paucos annos throno adito, corona regia redimitus, populis multis dominabitur: Natura supra milliones hominum illum extulit; fortuna tantis illum bonis, & divitiis cumulavit, ut totam vitam suam agere in deliciis possit. Ah, anima mea! si sortem tuam oculis fidei consideras, quanto magis hanc æstimare debes? Post paucos, fors 20. annos,



annos, Paradisum hæreditatem tuam, possidebis cum Aureola Virginitatis in capite, cum tot palmis in manu; quot de te victorias retulisti, milliones Electorum antecellēs pulchritudine, & gloria: Tanta gaudiorum, & voluptatum abundantia perfrueris, ut his comparatæ omnes mundi felicitates tanquam nihilum evanescant!

A F F E C T U S.

*A*stimatio suæ Vocationis. Ergo finis meus, cum DEUS me ad Religionem vocavit, est, ut Illum hic perfectiore modo amem &c. & ibi Illo fruam in gradu gloriæ sublimiori præ omnibus sæcularibus? ut ex corde toto Illum amem, & amer ab Illo, ut Illum perfectum amorem hic incipiam, & ibi continuem in æternum? O quanta hæc gratia? quando, & quomodo hanc pro merito æstimare potero? Benedicta millies sit & laudata, & superexaltata immensa DEI in me Bonitas, & Misericordia!

*H*umiliatio sui ipsius. Sed eadem hæc gratia quantam mihi causam præbet me humiliandi! Post tot annos Religionis debuissē utique jam tandem discere humilitatem, quæ contemptum sine perturbatione ferat, mansuetudinem, quæ illatas sibi ab aliis injurias æquanimi concouat, obedientiam, quæ voluntatem prompte

prompte subijciat, amorem DEI, qui continuo operetur, verbo perfectionem statui meo competentem. Quam procul ab his omnibus absum? quam fere nullam diligentiam adhibui proficiendi? o DEUS! pudet me.

P. II. *Ut secundum finem meum vivam, & DEUM perfecte glorificem, exigit singularis DEI in me amor.* Si magnitudinem amoris, quem tibi DEUS per gratiam vocationis ad Religionem exhibuit, agnoscere velis, perpende sequentes veritates.

1. *DEUS te vocavit sine respectu ad suam utilitatem.* Non tu DEUM elegisti & ex amore Illius ad religionem te contulisti; sed DEUS te elegit, & ad illam te perduxit. Non vos me elegistis, ait Christus ad Apostolos, sed ego elegi vos. Illæ primæ cogitationes de statu Religioso ingrediendo, illi motus interni, qui desiderium tuum excitarunt, acuerunt, illud robur animi, quo obstacula, & impedimenta perrupisti, sunt miserationes divinæ, opus DEI, non tuum. Et quam inde sibi DEUS utilitatem intendere poterat? Ille ab omni retro æternitate sufficebat sibi, erat felicissimus sine te, & esset etiam imposterum. Nihil ergo est, quod DEUM ad te vocandum movere poterat, nisi solus tui amor.

B

2. DE-



2. *DEUS te vocavit sine ullis tuis meritis.* Quot milleni sunt in hoc mundo, qui hac gratia longe te digniores fuissent? Quot milleni hac gratia melius fuissent usi, & gratiores se DEO exhibuissent, quam tu? Hoc non obstante non illos, sed te elegit.

3. *DEUS te vocavit cum aliqua gloriae suae majoris dispendio.* Multa hominum saecularium millia aeternum peribunt, qui salvarentur, si DEUS illos ad hunc statum, in quo tu es, vocasset. Multa hominum saecularium millia fierent Sancti, & illorum Sanctificatio DEO ad maximum honorem cederet, si illis hanc, quam tibi praestitit, gratiam praestitisset. Haec omnia DEUM non moverunt: praeter aliis omnibus te respexit, te attraxit.

A F F E C T U S.

Gratitudo. O mi DEUS! quanta est tua erga me bonitas, & misericordia! quantum egisti, ut me ad finem meum, ad sublimem illam sedem gloriae duceres, quam in Caelo mihi praeparasti? Millenos in saeculo reliquisti, qui hac gratia multo fuissent digniores, millenos, qui illa melius usi fuissent, millenos, qui per hanc attigissent perfectionis culmen: non hos, sed me respexisti! O amorem vere mirum! O quantam Tibi gratitudinem, quantum amorem debeo! Si mille linguas, mille corda haberem.....

Con-

Confusio sui ipsius.) Sed vix mihi! quo sublimior finis meus, quo maior vocationis gratia, eo peior, & abominabilior est mea ingratitudo! Quot homines sunt in mundo, qui annos plures omnem nutum sui rigidi, & duri Domini sollicitè observant, & sequuntur, quin vel verbo contradicant, & obinurmurent, dum ego interim in rebus minimis voluntatem meam abnegare vix possum. Quot sunt, qui per tot annos, cum extrema paupertate, quacum conflictantur, inter mille calumnias & persecutiones se DEO ex corde subiciunt, dum ego minimis difficultatibus succumbo. Quot sunt, qui in medio mundi tumultu cor suum cum tenerissimo amore ad DEUM elevant, dum ego in Religione vitam distractam vivo? O mi JESU! quantum senties tedium, dum apud illos paucæ gratiæ copiosos, apud me multæ paucos fructus producant? An non hic verificabitur, & implebitur, quod olim minatus es: Novissimi erunt primi, & primi novissimi!

P. III. *Ut secundum finem meum vivam, & DEUM perfecte amem, & glorificem, exigit necessitas.* Repete breviter, quæ hucusque meditata es, anima mea! Tu debes DEUM amare, & glorificare, sed perfectiore modo, quam omnes sæculares: hic est finis tibi a DEO præfixus, hæc est obligatio tua. Si non



satisfacias huic obligationi, quid, & quomodo tecum erit? male, male, seu DEUS tecum secundum suam misericordiam, seu iustitiam agat, Nam

1. Si tecum secundum misericordiam egerit DEUS, non salvaberis, nisi in minore gradu gloriæ, & post longam in Purgatorio moram. Dixi 1. non aliter nisi in minore gradu gloriæ. DEUS tibi sublimem in cælo locum paravit; quia vero per negligentem, tepidamque vitam te illo indignum reddis, illas speciales illuminationes intellectus, illas teneras cordis motiones, illas gratias extraordinarias, quas tibi daturus erat, auferet, & pauperculæ ancillæ, devotæ Virgini sæculari dabit; hæc cooperabitur, DEO cum fervore serviet, & ita sedem tibi paratam occupabit. Dixi 2. non aliter, nisi post longam in Purgatorio moram. Certum est, quod tepidus Religiosus innumera ferme venialia peccata committat. Certum est, quod durante tepore quotidie multiplicentur. Certum est, quodlibet horum Purgatorium promereri. Jam considera, quantum erit talis Religiosi Purgatorium, & quamdiu durabit? Considera, quid post vitam longiorem te expectet, etiamsi DEUS tecum egerit secundum suam misericordiam! *Quod si vero secundum rigorem iustitiæ tecum egerit,*

certus

certus est tuus interitus, Et quidam interitus longe funestior, quam sæcularium damnatorum.

Dico 1. Tuus interitus certus est. Terra, ait DEUS, venientem sæpius super se imbre mimbens, & fructum non ferens, reprobata est, & maledictioni proxima. Hæc terra tu es: imber gratiarum, mediorum, occationum, quæ suffecissent ad te promovendum ad excellentem Sanctitatem, tibi non deerat; sed fructus nullus apparet: quid fiet? hæc terra maledictioni est proxima.

Dico 2. Interitus tuus longe funestior, quam sæcularium damnatorum. Quo major est DEI erga homines in hoc mundo amor, eo major in altero est Illius odium, si vilipenditur, & spernitur Illius amor. Quo major hic est Illius in nos liberalitas, eo major est ibi Illius ira, si gratiis datis abutimur. Hinc illæ terribiles minæ adversus infelices urbes Corozaim, & Bethsaida, quæ tot acceptis a Christo gratiis non cooperabantur. Væ tibi Corozaim &c. Tyro & Sydoni levius erit in iudicio, quam vobis! Et tu Capharnaum, quam usque ad cœlos extuli, usque in abyssum demergeris. Veritas hæc negari non potest. Si DEUS secundum rigorem agit, Religiosus aut sublimem in Cœlo gloriam, aut pœnam in Inferno terribilem habebit. Medium
inter

inter hæc duo est dubium, & manet nobis
semper mysterium non perscrutabile.

A F F E C T U S

Timor. O mi DEUS! redit mihi hic de-
nuo in memoriam illa terroris plena in-
terrogatio; an fiam salvus? an perveniam ad
Cœlum? Vivo quidem forsitan sine gravi
peccato; hoc homini sæculari potest sufficere,
sed non mihi Religioso! negligens, tepida,
immortificata vita me vix salvabit: quamdiu
amor non est efficax, oratio fervens, seria mor-
tificatio, tandiu de Salute certus non sum.
Multa millia Religiosorum sunt in Inferno, qui
non erant me tepidiores, quia illis DEUS
ob abusum gratiarum denegavit sua specialia
auxilia. Quid mihi fiet? Nescio: hoc tamen
fateri coram Te, mi JESU, debeo: mea te-
piditas nil aliud mereretur!

Propositum. Quamdiu, o mi DEUS adhuc a-
cedia mea durabit? O nimis multos annos in
hac tepiditate consumpsi, nimis multis gratiis
abusus sum! Tempus est, excutiendi jam tandem
inveteratum illum torporem, & opus perfectionis
ferio aggrediendi! Statutum est, o mi JESU!
hac hora.

Amor. Sed an est possibile, ut Deum jam nunc
perfecte amem? Est possibile: hac hora possum per-
fecte amare DEUM, amare usque ad mortem,
amare

amare in æternum! O Veritatem jucundam, & solatii plenam! Totum itaque cor meum ad Te converto, Summum & Infinitum Ens! Nil optarem ardentius, quam ut amor omnium Spirituum Angelicorum in corde meo concentratur, ut uno momento compensare possem, quod hucusque neglexi, & hac mea negligentia perdidici. In priguus hujus amoris propono, o mi DEUS firmiter, exequi omnia quæ tibi placere his diebus cognovero. O JESU! conserva hunc in meo corde amorem, & fac ut quotidie magis, magisque augeatur!

MEDITATIO III.

DE PERFECTA ERGA CREATURAS OMNES INDIFFERENTIA.

Quicumque fine suo excidit, illo excidit aut propter nimiam ad illas affectionem, vel nimiam ab iisdem aversionem. Ad primam illarum Classem spectant commoda, & voluptates corporis, bona & divitiæ mundi, honores, æstimatio hominum, & cætera, quæ nos ita interdum afficiunt, ut ea cum offensione DEI sectemur & sectando fine nostro excidamus. Ad secundam Classem pertinent incommoda, & dolores, defectus, & paupertas, contemptus, morbi, matura mors &c. Hæc enim



enim tædium & horrorem in homine generant, & faciunt, ut à DEO & Ejus servitio recedens fine suo ultimo tandem frustretur. Ad ponendam ergo in tuto salutem tuam oportet te ad utramque Classem Creaturarum perfecte indifferentem & paratum esse, tam evitare, quidquid consecutionem tui finis impedire, quam amplecti, quidquid ad consecutionem ejusdem conferre potest.

P. I. *Ut cor tuum in perfecta indifferentia conserves, exigit DEI in te Dominium.* Finis tuus, o anima mea, in hoc mundo est. DEUM perfecte amare, & glorificare; Illum autem perfecte amare nil aliud significat, quam voluntatem Illius adimplere. Hoc autem non poteris, nisi ad valetudinem bonam & malam, ad honores & contemptum, gaudia & dolores, animum perfecte indifferentem habere coneris. Perpende bene has veritates.

1. *Quomodo servire DEO debeat, non est tuum determinare, sed DEI.* Tu Illi servire debes, non quomodo tu, sed quomodo Ille vult. Ille Dominus est, tu servus; Domini est præcipere, servi obedire. In ipso Cælo hic ordo observatur. Aliqui Angelorum stant jugiter ante Thronum DEI, laudantes & benedicentes Illum. Aliqui versantur in terris, & custodiunt homines: hic Angelus potenti Regi

Regi, ille rustico Custos attribuitur, quisque servit Deo, ut præcepit Jste. An minor in terris, quam in Coelo DEI est Auctoritas, & Dominium? An intelligis hæc anima mea? progredere.

2. *Dominium DEI est illimitatum. Ille tibi modum sibi serviendi præscribere potest, quicunque Ei placet.* Ille est DEUS, tu Ejus Creatura. Quis velit, vel possit limites ponere Illius potestati? Figulus agit cum vase suo, quod lubet: deponit illud in angulo, adhibet ad usus vilissimos, frangit, verbo, agit cum illo, quod vult, An DEO non licet cum homine, quem creavit, facere, quod licet figulo cum formato à se vase? Quocumque in statu te ponat, quidquid de te decernat, ubique & semper teneris Illum amare & glorificare.

3. *Deo servire prout vult, significat, Illum perfecte honorare, et amare, et ita finem suum assequi.* Omnia tua servitia, si non sint, qualia vult DEUS, sunt, ac si non essent! Sola illa placent, quæ voluntati Ejus sunt conformia. Igitur, si quod officium habes, illud ex amore DEI & diligenter implere debes, aliud non desiderans. Si mens tua & cor tuum plenum est amaritudine & desolatione, plenum tenebris & tentationibus, his
DEI



DEI de te ordinationibus plene acquiescere, & illi servire sicut in quiete & consolatione debes. Si corpus tuum cum doloribus & infirmitatibus conflictetur, hæc omnia ex amore DEI perferre debes. Si odio habearis, afficiaris injuria, contemnaris ab omnibus, tolerare debes ex amore DEI cum silentio, Hoc significat servire DEO, prout Ille vult. 'Quo longius ab hoc vivendi modo recedis, eo magis à fine tuo recedis.

A F F E C T U S.

Agnitio & recognitio Domini DEI. Ita est, o mi Creator! Tu es DEUS, Tibi competit omne dominium, Tuum est præcipere, meum, utpote creaturæ, est obedire: Tibi servire: & quidem servire, prout Tibi placet. Agnosco hoc Tuum absolutissimum dominium, & cum humilitate adoro. Væ servo judicii sui & suæ voluntatis tenaci. DEO servire, prout nos volumus, & non prout Ille vult, significat nos Dominos & DEUM servum facere. Talis autem inordinatio quam mercedem sperandam, immo quam pænam timendam non habet?

Doloris, Sed quomodo est possibile, o Domine! homines dari, qui Tibi tantum, prout ipsi volunt, non sicut Tu vis servire de-

fide-

fiderent? Dantur tamen, et ad confusionem meam fateri cogor, ipse ego ex illorum hucusque numero fui. Volebam Te amare, & glorificare sano, non invalido corpore: volebam Te amare quamdiu æstimabar, laudabar ab aliis, sed non in contemptu, persecutione &c. Volebam Te amare, & glorificare in quiete animi, durante sensibili devotione &c: sed non in desolatione, tentationibus &c. Sed an hoc esset DEO servire, prout Ille vult? O me infelicem! quid egi?

P. II. *Ut cor meum servem in perfecta indifferentia, exigit providentia DEI.* Quam difficile est, assequi finem suum sine perfecta indifferentia, tam facile est cum illa. Ut hæc clarius perspicias, considera sequentes veritates.

1. *DEUS est omniscius, adeoque scit, quæ media te securissime ad finem tuum ultimum deductura sint.* Omnia quidem media apta sunt, morbus, & sanitas, honor & contemptus, splendidum & vile officium, dummodo bene iis utamur. Sed dic, quid pro salute tua est tutius, si bene valeas semper, vel si morbis affligaris? Si ab omnibus honoreris. vel si contemnaris, si officio magno, vel si vili fungaris? Neque ullus homo id novit: Solus DEUS scit. Arcana hæc sunt solis DEI oculis pervia!

2. De-



2. *DEUS est infinite bonus, tuique amantiſſimus, ideoque media ſemper tutiſſima ad finem noſtrum nobis præordinat, quamdiu perfecte indifferentes ſumus.* DEUS erga animam noſtram ſe ita gerit, ſicut Mater tennerrima erga prolem ſibi cariſſimam. Quam parum talis Mater induci unquam poteſt, ut proli ſuæ venenum propinet, tam parum, immo multo minus poteſt DEUS animæ, quæ ſe illi cum plena reſignatione, & indifferentia committit, aliquid noxii ordinare. Crede, anima mea, & tanquam veritatem infalibilem habe! Si DEUS infirmitatibus te viſitat, hæc eſt tutiſſima ad finem ultimum via, ſi te contemni, tentari, injuria affici ſinit, hæc eſt pro te via ad Cælum ſecuriſſima.


3. *DEUS eſt omnipotens, & deducit animam, perfecte indifferentem, infallibiliter ad ſuum finem.* Quis enim impediret? Nec Angelus nec homo, nec Cælum, terra, vel infernus Omnipotentia Ejus reſiſtere poteſt. Tu ſola, o anima mea, tu ſola aliquomodo impedire potes, ſi te nempe directioni Illius providentia ſubtrahas. Sin vero duci te ab illa ſinas, quo & quomodo Illi placet, tam certa eſ de ſalute tua, quam certum eſt, Illum eſſe omnipotentem, & infinite bonum.

AFFE-

A F F E C T U S.

Fiduciæ Quanta pro me consolatio! Qui me regit, est infinite Sapiens, & scit optima, & securissima ad salutem meam media largiri; est infinite Bonus & in horas singulas ea seligit & parat mihi; est Omnipotens, & tuetur me, roboratque, ut nulli adversarii nocere mihi possint. Hac stante notitia certa, an potest ullus esse in corde meo diffidentiae locus? Non! o mi DEUS! cum gaudio projicio me totum in sinum paternæ providentiæ & cum maxima filiali fiducia clamo ad Te: Tu, Domine! vis me Tecum in Cœlo habere, & quidem in gradu gloriæ sublimiore, & ego cum sis Pater meus optimus, spero confidenter, quod amor Tuus gratuitus me eo deducturus sit.

Confusionis sui ipsius. Sed quid? An ego hanc felicitatem sperare possum? Cœlum, gloriam æternam promisisti tantum illis, qui Te amant, & glorificant, prout Tu vis, & in perfecta indifferentia erga creaturas ambulant; sum-ne talis? Cor meum me redarguit, & contradicit: delector enim adhuc vana gloria, & tristor, si contemnar, huic vel illi Superiori, in hoc vel illo puncto obedio quidem libenter, sed cum tædio & reluctantia alteri vel aliis in rebus &c. Est-ne hoc illa indifferen-



ferentia, quam perfectus amor exigit? Tam mundanum & creaturis affixum cor estne capax perfecti amoris? O mi JESU! esto propitius peccatrici animæ meæ! Nec primum, ut video, passum ad solidam sanctitatem hucusque feci!

P. III. *Ut cor meum in perfecta indifferetia servem, exigit DEI justitia.* Si tu, anima mea, directionem bonitatis Divinæ sequi, & mediis illis, quæ tibi ad finem tuum obtinendum suppeditat, cum humili subjectione uti nolis, incidēs in manus Justitiæ. Et quid inde sequetur? afflictio & miseria multa, quam nunquam satis deslebis. Nam

I. *Certum est, quod talis anima longe plus in hoc mundo patiendum habet, quam anima perfecte indifferens.* Falleris, anima mea, si evasuram te putas illas difficultates, & afflictiones, quas tibi amor DEI tanquam media ad finem tuum tibi prædestinat: Velis, nolis, habebis perferendos tamen illos dolores, morbos, contemptus, vilipensiones, desolationes, tentationes &c. quas DEUS ab æterno tibi decrevit. Jam si indifferentem te exhibeas, & cum humilitate ac patientia omnia perferas, DEUS sibi in te complacet, roborat te copioso gratiæ suæ influxu, largitur tibi quietem animi, & viam crucis facilem & dulcem reddit

reddit. Sin vero, subtrahit tibi gratias, & finit te sub cruce tua deficere.


2. *Certum est, quod illo sublimi gloriæ gradu tibi prædestinato excidas.* Impossibile enim illum gradum assequi, nisi per media, a DEO constituta. Si indifferens non sis, illa media libenter non acceptes, vel iis uti nolis, frustra laboras, actum est de fine tuo.

3. *Certum est, quod beatitudo tua, etiam in minore gloriæ gradu, periclitetur.* Anima, hac indifferentia carens, multis & gravibus tentationibus necessario est obnoxia. Quid in talem animam non poterit ira, & impatientia? quo non deducet illam tristitia, & pusillanimitas? quo superbia, & contemptus horror? quo voluntas propriæ? perturbatio animi, & rebellio passionum indomitarum? Ad hæc omnia superanda requireretur speciale, & singulare DEI auxilium! An dabit DEUS Animæ, quæ se Illius ductui subtrahit? quæ omnia sibi ab illo prædestinata media pertinaciter respuit? & Illi aliter, quam secundum propriam voluntatem, servire renuit? quæ Illum tanquam absolutum suum Dominum non agnoscit, & se dispositionibus Illius temere opponit? Speret, qui vult; res est plena periculi.

A F F E C T U S

Humiliationis sui ipsius! O summum Bonum!

Do-



Dominus meus, & DEUS meus! quantam in anima mea inordinationem invenio? quantam in intellectu cæcitatem, quantam perversitatem in voluntate! Ego considero dolores, morbos, vilipensiones &c. tanquam maxima mala, & Tu tanquam aptissima ad Sanctitatem, ad Coelum media! Ego judico tentationes, & desolationes esse causam mei interitus, & Tu judicas, esse viam ad gloriam majorem certissimam. Cæcutit ergo intellectus meus. Necdum totum: etiam voluntas est perversa. Commoda corporis, honores, vana laus &c. hæc sola sunt, quæ arrident, quæ ambabus ulnis amplector, preno &c. Reliqua omnia horreo, & fugio. Venenum avide arripio, & medicinam repello!

Propositum. Quid ergo agendum mihi? duo hodie puncta clare perspexi. 1. Ego te amare & glorificare debeo, non sicut ego, sed sicut Tu vis. 2. Non possum te sic amare, & glorificare, adeoque salvari, nisi erga creaturas sim indifferens, & mediis, a Te mihi decretis, utar! In conspectu ergo Tuo nunc propono, extirpare omni studio tam nimiam erga creaturas affectionem, quam aversionem ab illis. Indifferentem me exhibebo erga honorem & contemptum, valetudinem prosperam & adversam, consolationem & desolationem



tionem &c. Omni die, omni occasione per totam vitam. - Reclamabit quidem natura, sed prævaleat gratia. Hoc est firmum animi mei decretum: O mi DEUS! te volo amare, & glorificare, non prout ego, sed sicut tu vis.

Imploratio gratiæ: Sed quis me in hoc tam salutari, tam necessario proposito, a quo salus mea dependet, conservabit? mea fragilitas major est, & inconstantia mea altiores radices egit, quam ut ab alio, quam a te, o mi DEUS, remedium sperare possim! Te igitur, o mi JESU! toto corde, totis viribus inclamo; aufer a me omnem amorem, extingue omne desiderium creaturarum, quæ naturæ corruptæ placent; remove a me timorem & horrorem illarum, quæ eidem displicent, & fac, ut nihil desiderem, quam placere tibi, nil metuum, quam tibi displicere, o JESU! misericordiarum Pater! -

DIES EXERCITIORUM SECUNDA

MEDITATIO PRIMA

DE PECCATIS ANGELORUM ET PROTO
PARENTUM.

I. P. *Quantum sit malum peccatum, ostendit
pœna Angelorum.* Revoca tibi in memoriam, anima mea, illud tempus, quo DEUS
C creavit



creavit cælos, & Angelis replevit. - Quis his spiritibus erat felicior? pulchritudo illorum erat tanta, ut homo intueri illos non posset, quin præ gaudio moreretur; Sapientia tanta! ut illa Salomonis Sapientia cæteri ignorantia possit & debeat: Constitutio & essentia illorum tam felix, ut doloris cujuscunque ne capaces quidem fuerint; habitatio illorum tam amœna, quam est Paradisus Cælestis. Donis his naturæ quantumcunque grândibus, erant grandiora dona gratiæ. - Habebant cognitionem DEI perfectissimam, charitatem infusam, amicitiam & unionem intimam cum DEO, & promissum certissimum, post paucos dies intrandi in gloriam, & illa æternum fruendi. Bonitate hac tanta abusi sunt Angeli, noluerunt servire DEO, prout ipse voluit; peccarunt, & poenam incurrerunt. - Considera nunc attente circumstantias huius pænæ.

1. *Hæc poena erat privatio omnium bonorum.* Infelices hi Angeli ex pulcherrimis spiritibus in momento facti sunt spectra abominanda: ex filiis DEI carissimis, obiecta odii & furoris æterni: E cælo præcipitati, sicut fulgur descenderunt in abyssum inferni! -

2. *Hæc poena erat collectio omnium malorum.* Clausi nunc in Barathro inferni patiuntur, quidquid pati potest anima: tristissimam

recor-

recordationem in memoria, extremam perturbationem in intellectu, extremam desperationem in voluntate, crudelissimas, & voracissimas flamas in omnibus potentiis..

3. *Erat poena sine misericordia.* Si DEUS infelicibus his spiritibus, vel modicum temporis concessisset, sine dubio agnovissent peccatum suum, fuissent illud ex corde detestati, & sic DEUM per totam æternitatem ardentissime amarent: Sed enim divina justitia eodem momento, quo peccarunt, illos corripuit, & ad tartara detruxit, quin vel tantillum illorum pœnitentiam exspectaret; -

4. *Erat poena sine remedio.* Ardebant infelices hi Spiritus in inferno plus quam 4000 annis, dum Christus in hunc mundum venit ad tollendum peccatum; verum quid illis profuit? Ille misericordissimus JESUS, qui tot lachrymas super Jerusalem civitatem flagitiosam profudit, ne unicam quidem pro his guttulam fudit. Ille amabilissimus JESUS, qui vitam & sanguinem pro maximis suis inimicis dedit, pro illis nec guttam obtulit. Unico momento duravit peccatum, in æternum durat pœna! Siste hic modicum, descende in hos carceres infernales mente, & vivaciter tibi repræsenta infelicitatem horum reprobos. En illos in mon-



stra mutatos tam execrabilia, ut præ horrore mortuus concideret, quisquis intueretur! illorum habitatio est carcer deterrimus & tenebrosissimus in centro terræ, duris rupibus, & petris undique cinctus, igne undequaque plenissimus: illorum poenæ & tormenta tanta sunt, ut nec verbis ullis adumbrari, nec mente concipi ullo modo queant! Hoc considerato ita tecum discurre: Hæc spectra, hæc monstra erant olim spiritus pulcherrimi, filii DEI charissimi, opus excellens omnipotentiae Divinæ, incolæ, & decor Paradisi cælestis! quid mali ergo fecerunt, ut in has misérias deturbarentur? Tota causa erat cogitatio unica, momentanea, unica inobedientia, unicum peccatum, & propter hoc solum ardent jam ultra 5000. annos, & tota æternitate ardebunt. Et quis tam terribilem in illos sententiam tulit? DEUS! Ergo DEUS aut non est infinite sapiens, infinite justus, & misericors, aut peccatum debet esse inexplicabile, infinitum malum!

A F F E C T U S,

Admirationis. Quid primum mirer, DEUS meus! an rigorem Justitiæ tuæ adversum hos, an misericordiæ tuæ erga me magnitudinem? Nobilissimi hi spiritus unicum peccatum commiserunt, & propter hoc illos æternum à te abjecisti! ego cinis & pulvis tot-

ties

ties peccavi, & tu mihi pepercisti! Abusus sum tua misericordia toties, dum post obtentam a te veniam priorum peccatorum, in eadem denuo prolapsus sum, & tu denuo mihi ignovisti! Adhuc nunc, hac hora respicis me benigno & paterno oculo & brachia misericordiae erga me extendis. O Angeli! convertite vestros è cælo in me oculos; en quot peccata commisi, tot videtis misericordiae & longanimitatis DEJ in me monumenta! facite, quaeso, facite mei loco, quod ego non possum, ut debeo; laudate, & benedicite. ---

Doloris. Sed hæc ipsa Ejus misericordia cor meum dolore & amaritudine replet! Offendi DEUM, qui me plus, quam tot Angelorum millia, amavit: DEUM, qui me impium post tot flagitia in sinu mitericordiae fovet: DEUM, qui me non obstantibus tot meis peccatis salvum vult! O ingrata anima, quomodó talem amorem spernere, & talem, tam bonum Dominum offendere potuisti? quomodo huius tuæ ingratitude vel meminisse potes, quin in suspiria, & lachrimas amarissimas resolvaris? o JESU! agnosco, fateor, doleo, abominor.

P. II. *Quantum malum sit peccatum, ostendit poena primorum parentum.* Nunquam mundus maiorem felicitatem vidit illa, qua Proto-
parentes



parentes nostri post creationem fructi sunt.

I. *Quam amena erat illorum habitatio; Paradisus?* Nullus ibi calor, nullum frigus: nulla àëris intemperies! ver perpetuum! arbores ex se, sine ullo prævio labore fructus optimos, terra flores, & plantas mirificas produxerunt.

II. *Quam magnum erat illorum, in animalia omnia dominium?* Ad nutum illorum advolabant aves, ad unum verbum accurrerunt ad illos animalia, & pedibus illorum advoluta sunt: adnatarunt littori pisces, & obedientiam suam, & gaudium manifestarunt.

III. *Quam mira erat illorum felicitas quoad corpus?* Cura omni liberi vivebant, doloris & laboris omnis expertes, non morbis non morti subjecti, in eodem flore & vigore Juventutis permanfuri &c.

IV. *Quam mira erat illorum, quoad animam felicitas?* Possidebant perfectissimum in affectus suos dominium: cognitione DEI sublimi, charitate erga illum ardente erant præditi: habebant promissum post diuturnam & felicem, sine morbo & morte vitam, cum corpore & anima cælum intrandi, & regnandi cum DEO in æternum. Verum quam liberalis in illos erat DEUS, tam ingrati illi fuere erga DEUM; nolebant illi ser

vire

vire, prout volebat; peccabant, & sic incurrebant poenam! considera jam circumstantias hujus poenæ, & in illis gravitatem peccati!


I. *Propter hoc unicum peccatum omni felicitate privati sunt.* Terra est maledicta, & sine sudore vultus nil profert amplius, nisi tribulos, & spinas: maledictum est corpus, & ad dolores, infirmitates, & mortem damnatum: maledicta anima, & tanquam DEI inimica ex paradiso in hanc lachrymarum vallem ejecta.

II. *Propter hoc unicum peccatum tota posteritas ad easdem miseras condemnata est:* Imaginare tibi planitiem aliquot miliaribus longam, & latam, & calvariis ad altitudinem pedis tectam, & coopertam. En omnes isti milliones hominum ob hoc unicum peccatum mortem amarissimam obierunt, & obibunt adhuc, qui sunt & erunt unquam in mundo!

III. *Propter hoc unicum peccatum infantes omnes non baptizati, e cælo excluduntur in æternum.* Si numerum inire posses omnium infantum, qui singulis annis a nativitate Christi, vel passione, sine Baptismo decesserunt, quantam, quam enormem illorum esse summam deprehenderes? Et hi omnes cælo privantur in æternum, propter esum pomi!

IV. *Propter hoc peccatum damnatur æter-*

num



num maxima pars adultorum. Quicumque damnatur, damnatur ob effrænes affectus sui cordis, qui illum ad peccandum alliciunt, & abripiunt. Inclinationes hæ malæ, & passionες sunt poenae, & effectus huius peccati: & causæ, cur tot quotidie peccata committantur ab hominibus omnis generis, status, ætatis, & conditionis, adeoque sunt causæ, cur tam multi ex omni genere, statu, ætate, & conditione damnentur in æternum.

V. *Propter hoc peccatum JESUS pati, & mori in Cruce debuit.* O grande & ineffabile Mysterium! & prodigium justitiæ & amoris! DEUS cæli, & terræ Dominus, innocentia & Sanctitas ipsa, unigenitus DEI filius adjudicatur à Patre suo, cælesti morti, & morti acerbissimæ, & probrosissimæ, & quidem tantum propter peccatum!

6. *Non obstante hac morte, pergit cælestis Pater hoc peccatum continuo in nobis miseris hominibus punire.* Paradisus perditus est, & nos erramus in hac valle lachrymarum: vita nostra omnis est plena amaritudine, & afflictionibus, mors plena timoris, salus incerta: & cælum nobis non nisi per veram poenitentiam & lacrymas multas patet! -

A F F E C T U S.

Timoris. Quam terribiles veritates fides mihi
ante

ante oculos ponit! Angeli e cælo proturbati, ejectum Paradiso genus humanum, multi animarum milliones cruciantur in inferno: Christus ex mandato Patris Cælestis in cruce moritur, & hæc omnia propter unicum peccatum. Heu mihi! Pater Cælestis cum Filio suo tam rigide agit propter peccatum non suum, quomodo aget mecum propter mea, tam multa, tam enormia peccata? mecum, qui in his sordibus tamdiu me volutavi, post obtentam toties veniam, toties relapsus sum!.

Doloris. Video, o mi DEUS! non suppetere pro me medium, nisi misericordiam tuam immensam, & veram meam poenitentiam! Ante te ergo prostratus detestor ex corde omnia peccata mea. Erravi, inique egi, agnosco, fateor, doleo! mille potius vitas profundere, mille subire mortes debuissim, quam te vel semel offendere, & tamen--- Ah! quis dabit oculis meis fontem lachrymarum?---

P. III. *Reflexiones ex prædictis veritatibus faciendæ.* Collige te de novo, & sequentes reflexiones cordi tuo alte imprime.

1. Si unicum peccatum tantam DEO abominationem causat, quanta esse debet in oculis Ejus abominatio anima mea? Si vel semel peccavi, peccavi toties, quoties Spiritus illi reprobi: Si centum peccata commisi, solus



ego tot peccata commisi, quot commiserunt centum illi Spiritus rebelles.-- Si unum peccatum commisi, talis sum coram DEO abominatio, qualis est unus ex Spiritibus damnatis, Si centum, tanta, quanta sunt centum Spiritus tales simul.-- Si semel peccavi, odit me DEUS necessario eo odio, quo unum ex illis, & si centies, odio eodem, quo centum illorum simul odit.-

2. *Si unicum peccatum meretur infernum, quantam ego benedicendi & laudandi DEUM causam habeo.* Si peccavi semel, infernum meritus sum, sicut omnes Angeli damnati; si sæpius, magis infernum meritus sum, quam omnes illi! Et quare tamen ibi, non sum, ubi hi infelices sunt? - Ah idem DEUS, qui erga illos rigore justitiæ, erga me misericordia sua usus est! - O bonitas! o amor! o DEI longanimitas!

3. *Si DEUS Unicum peccatum in Angelis & hominibus tam terribiliter punivit, quantam causam habeo justitiæ illius timendi?* Tot Angelorum millia DEUS propter peccatum unicum, cogitatione sola, uno momento patratum, sine gratia, sine remedio, sine spatio pænitiæ abiecit, & igni æterno addixit. - Si semel adhuc peccarem, an non posset, an non statueret idem de me? O


DE-

DEUS fateri cogor, me non posse amplius peccare sine summa temeritate, & te non posse amplius parcere, sine summa misericordia! -

A F F E C T U S.

Doloris. O DEUS! Cælum & terra testantur terribile tuum in peccata odium! o me infelicem! quid egi? nil meretur amari præter te mi JESU! nil odio & aversione dignum est, nisi solum peccatum! - Et ego insensatus JESUM odio habui, & peccatum dilexi! O insaniam æterno igne dignissimam! Agnosco, o mi DEUS, & desleo! Quam melius fuisset, si in terra putruissem, antequam peccassem! sed enim fera sunt hæc suspiria! peccavi, & toties peccavi, & tam enormiter peccavi! poenitet me ex corde! o JESU miserere, & ignosce!

Gratiarum actionis. Sed eadem hæc mea malitia revocat mihi in memoriam immensam misericordiam tuam. Cum timore recorder horæ illius, qua primum peccavi! Infelix hora, o utinam illuxisses nunquam! Si tunc, o DEUS, egisses mecum, sicut cum Angelis egisti, jam in inferno habitaret anima mea! Ah! sola huius periculi memoria in quo anima mea tam pretiosa, unica, immortalis versabatur, me facit tremere! Tu mei



miserere, & tempus poenitentiam agendi largitus es! O quantas tibi laudes & gratiarum actiones debeo?

Implorationis gratiæ. O miserere mei DEUS, miserere mei! Agnosco, quam infinitum malum sit peccatum! agnosco ex tormentis damnatorum Angelorum, ex miseriis ejecti é Paradiso primi hominis, ex doloribus morientis in Cruce Christi! Grande mysterium! JESUS filius DEI debet mori, & ita mori propter scelera mea! an majus malum patrare potui, quam quod JESUM Cruci affixit? O maledictum peccatum! o JESU! per eundem sanguinem, quem tu pro meis peccatis effudisti, te obtestor: da mihi singulare gratiæ tuæ auxilium, ut peccata vere & amare plangam, & in posterum cane pejus, & angue abominer, fugiam, & potius moriar, quam....

MEDITATIO SECUNDA.


DE PECCATIS PERSONALIBUS.

P I. *Quantum malum sit peccatum, conjici potest ex ejus effectibus. Quales hi sint, expende. I. Eodem momento, quo peccatur, anima, imago DEI pulcherrima mutatur in monstrum teterrimum. Dici, & comprehendere non potest, quam mire pulchra sit anima, quam-*
diu

diu est in gratia DEI! Est imago & effigies ipsius pulchritudinis divinæ! ad quam producendam infinita sapientia, & potentia requirebatur! Mille vitas, dixit olim magna quædam sancta, cui DEUS hanc animæ pulchritudinem ostendere dignatus est, profundere, mille subire neces parata sum, ut animam tam pulchram vel unicam servem! Sed enim quam pulchra est per gratiam, tam abominabilis fit per peccatum: anima peccatrix, & spiritus damnatus sunt duo monstra sibi simillima, & quemadmodum nullus hominum spiritum damnatum, prout est in se, intueri posset quin præ terrore moreretur ita nec animam peccatricem! Etc.

2. *Eodem momento quo peccatur, incurrit anima extremum odium DEI!* Infinito, nec ullis verbis explicando odio DEUS peccatum odit. Ipsa Christi humanitas, si aliquod in illa peccatum deprehenderetur, quod tamen impossibile est, a Deitate separata, ignibus æternis addiceretur. DEUS debet odisse peccatum, & quemadmodum impossibile est, ut DEUS non sit infinitum bonum, ita non est possibile, ut infinito peccatum odio non prosequatur.

3. *Eo momento, quo peccatur, ex filio Dei fit*
man-




mancipium diaboli. Commiseratione digna miseria est, obsessum esse à diabolo, & maledictum orci incolam diu noctuque in corpore circumferre! quid erit ergo traditum ab ipso DEO, quoad animam, infernali Spiritui sub potestate, & dominio dæmonis vivere? Prior potest esse filius DEI, & spem habere regni Cælestis æternum possidendi: alter est inimicus Dei & singulis momentis versatur in periculo, ne à suo Domino ad æternos carceres abripiatur!

4. *Eo momento, quo peccatur, anima in vilissimum & maxime contemptibilem statum dejicitur.* Nil peccato est turpius, nil peccatore contemptibilius. Si Deus omnium hominum oculos ita illuminaret, ut quisque, qui tibi occurrit, cor tuum introspiceret, & omnia tua peccata & scelera in eo legeret, quæ tota tua vita cogitatione, verbo & opere patraisti, Deus bone! quæ tua confusio? quis pudor? an non delitescere malles in tenebrosis cavernis & specubus, quam te illis in conspectum dare? En! ratio ipsa dictat, nil peccato esse turpius, nil peccatore contemptibilius! In conspectu Dei tui peccasti, quoties peccasti, & oculi illius collectas peccatorum tuorum sordes jugiter intuentur! o quanta confusionis tuæ materia!

Confu-

Confusionis sui ipsius. Quot peccata commisi? o mi DEUS! non est ulla animæ potentia, ullum corporis membrum, quo te non offendissem! O infelix memoria! quot millenas cogitationes peccaminosas admisisti? Infelix voluntas! quot millenis inclinationibus, & affectibus inordinatis cessisti, & indulgisti, Infausta lingua! quot millena verba otiosa, impura etc, protulisti! infaustæ manus! quot opera verita exercuisti? infelix cor! quot creaturas inordinate vel amasti, vel odisti? Si ergo unicum peccatum tantam tibi, o Deus! nauseam & abominationem creat, qualis erit coram Te anima mea, in qua ferme nil, nisi peccata vides? quoniam ibo, ubi me abscondam ad effugiendam confusionem meam? Profecto si me omnes nossent, sicut novit DEUS, omnes sancti in Cælo, omnes homines in terris oculos a me suos præ abominatione averterent.

Imploratio gratiæ, Pudet me mei ipsius; & dum priorem meam insaniam considero, timore, & tremore totus obrigesco. Ah mi DEUS! nam quo me vertam, quo confugiam, nisi ad Te, o infinita bonitas, & misericordia; Infunde, quæso, cordi meo dolorem sincerum, intensum, & talem, qui deleat omnes animæ meæ maculas, & sordes, ut
coeli



coeli, & terræ novam materiam habeant infinitam tuam misericordiam celebrandi!

P. II. *Quantum malum sit peccatum conjici potest ex essentia hominis contemptibili.* Perpende o anima, quid sis, & ex eo concludere, quantum malum sit peccatum! --

1. *Homo est Creatura nil boni in se habens.* Quid es, quid eras, quid eris? es lutum, fuisti ante paucos annos nihil: brevi a vermibus consumptus in pulveres & cinerem abibis. Abyssum nihili tui nullus creatus intellectus, solus DEUS comprehendit! & tamen hic cinis, hic terræ vermiculus erexit contra DEUM caput, extendit manus adversus Omnipotentem, & illi resistit! ausus est DEUM contemnere & dicere, quis est Dominus, ut vocem ejus audiam? nescio Dominum, nullum agnosco! --

2. *Homo est Creatura, erga quam se DEUS infinite liberalem exhibuit!* Infinita sunt DEI in te beneficia! Tota tua vita momentum nullum fuit, quo novum tibi beneficium non præstiterit, nec ullum, si ipse velis, per totam æternitatem erit, quo non aliquod tibi beneficium præstabit. Hæc omnia præstitit amore æterno: nam nec se prius, quam te dilexit, amore immerito: nam neque te, neque tuis operibus eget: amore magnanimo nam has gratias conferre poterat aliis, illi ferventius servituri!

Et ta-

Et tamen ausus es, ingratiſſime, hunc DEUM
Tuum, Benefactorem tantum, tam liberalem,
toties, & tam graviter offendere! Quantum
eſſet faciut, ſi quis degener filius in facie
Patris ſui, neſcio quæ nefanda committeret,
quin illius faciem conſpueret? An non idem
tu facis, vile infectum, & erga tenerrimum
Patrem tuum, ingratiſſimum.

3. *Homo eſt Creatura, quæ omnia DEO
debet!* Quidquid es, quidquid habes, Creatori
Tuo in acceptis referre debes; Ille tibi dedit.
Ille conſervat. Quam enormis eſt ingratitudo,
beneficiis ipsis & gratiis DEI ad majestatem
Illius offendendam abuti? Quid ingratius, &
abominatione dignius vel cogitari poſſet, quam ſi
uſu membrorum olim deſtitutus, ſed dein per
miraculum a JESU ſanatus, iſdem manibus
Illum flagellaret, quarum illi uſum reſtituit?
Si mutus eadem lingua, quam per miraculum
illi ſolvit, Chriſtum blaſphemaret? Reſpecte dein
oculos in te, quis tibi linguam, aures, oculos,
manus dedit, quis illa membra corporis, illas
animæ potentias, quibus DEUM toties offen-
diſti?

4. *Homo eſt Creatura, quam DEUS fau-
cibus inferni eripuit.* Si vel ſemel peccaſti,
anima mea, infernum es promerita & quod
in illo actu non ardeas, ſoli miſericordiæ DEI

D

tribu-



tribuendum est. Hoc te fides docet: Quantum aggravat hæc circumstantia relapsum tuum? Si DEUS Spiritum aliquem damnatum ex inferno liberaret, tempus pænitendi offerret hodie, cras autem ille ipse, non obstante beneficio tam liberaliter sibi concessio, DEUM iterum blasphemaret, quid putas, an non mille & longe graviores infernos mereretur? Te DEUS non decies, vigesies, sed fors sæpius ab inferno, quem meritis es, præservavit & post impensam hanc tibi misericordiam quid egisti?

2

A F F E C T U S

Humiliationis & agnitionis. Domine DEUS! coram Te abjicio me usque ad abyssum inferni! nam qualem mihi convenientiorem locum invenire possum? Ego terra & cinis insurgere ausus sum contra altissimum. Contra Te, a quo omnia accepi, qui quovis momento novis me beneficiis cumulat! Contra DEUM, qui post tot mea peccata mihi hucusque pepercit? Fateor omi DEUS! malitiam meam, ferme diabolicam, & mille infernis dignam! Miseri Spiritus reprobi! infeliciores quidem me estis, sed non propterea, quod plus, ac ego peccaveritis, sed quod Deus minus erga vos, quam me fuerit misericors! Vos unicum peccatum commisistis, ego innumera! Vos unicam,

cam, ego tot millenas gratias habui! Vos vindicta DEI in momento apprehendit, mihi bonitas DEI, tot annos indulgit! Abiecit vos DEUS post primum peccatum, mihi post tot peccata parcere voluit, & tamen ego Illum offendi! An non imber lachrymarum ex oculis meis manare jugiter deberet?

2. *Doloris.* Tu probas corda & renes, o Deus! En! doleo, abominor, detestor ex omnibus viribus peccata mea, usque in hanc horam commissa! Outinam omnis in me dolor & contritio concentraretur, quem omnes unquam pœnitentes persenserunt, ut digne delere mea peccata possim! Sed quoniam hoc non possum, offero Tibi saltem illius loco, illos dolores, illam amaritudinem, & agoniam, illum sudorem sanguineum, quem pro peccatis meis in horto Getsemani toto corpore profudisti!

P. III. *Quantum malum sit peccatum, conjici potest ex suprema DEI majestate, quæ per hoc offenditur.* Quo dignior & excellentior est persona, quæ offenditur, eo major & gravior est offensa! Magno & potenti Regi colaphum impingere, longe major est injuria, quam percutere servum; hoc dictat ratio: expende jam secundum hanc regulam gravitatem peccati. Quid est DEUS?



1. *DEUS est infinitum bonum!* Est Ens, quod in se omnes perfectiones complectitur. Est infinita bonitas, omnipotentia, Sanctitas, pulchritudo, liberalitas, misericordia, Sapientia, verbo, omnes perfectiones in Se continet. Nec solum in se est bonum summum, sed est etiam origo omnis boni in Creaturis: non est ulla potentia bonitas, pulchritudo, Sanctitas &c, aut in cœlo aut in terris aut in Angelis, hominibus, vel Creatura alia, quæ non ex DEO tanquam fonte promanavit. Bonum tale, tam infinitum offendere, contemnere, injuria afficere, quanta est malitia?

2. *DEUS est Infinita Majestas.* Leva in Cœlum oculos. En! hic sedet in Throno suo: Miliones Angelorum, & Beatorum circumstant, a fulgore Deitatis extra se positi benedicunt & laudant Illum totis viribus, & quia vident, quod Illum laudare, quantum altitudo, & sublimitas Illius meretur, non queant, in facies suas prostrati fatentur, Illum infinite majore honore esse dignissimum. Dum hæc in Cœlo aguntur, dum omnes Ejus incolæ conantur DEUM pro viribus suis laudare & glorificare, erigit se vermiculus miserrimus, & supremam majestatem injuriis laceffit! Quanta hæc malitia! uthanc incomprehensibilem malitiam saltem aliquomodo capias!


1. Imaginare tibi, vel finge animo: omnes
Ange-

Angelos de Cælo descendere, & corpus humanum assumere: omnes homines, quot quot erant ab orbe condito, resurgere e sepulchris: omnes hos per annos mille denuo in mundo vivere: austerissimam pœnitentiam agere, & tandem ex amore DEI ardentissimo suum sanguinem per martyrium fundere. An Deo per hoc satisfacere & compensare injuriam possunt, quæ Illi per unicum peccatum inferatur? Nequaquam, est impossibile.

2. Si omnes Angeli, per totam æternitatem totum suum intellectum, & omnes vires, & potentias impenderent, ad comprehendendam malitiam peccati, nunquam illam assequerentur.

A F F E C T U S

Accusationis sui ipsius. Ope luminis per Te, mi Deus, mihi desuper immissi, malitiam meam summam agnosco! Ego Te offendi, ego miser homuncio, cinis, terræ vermiculus! Te offendi Regem Regum, Deum, Summum bonum, originem omnis boni! Offendi Te non in abscondito, sed coram conspectu Tuo, in facie Tuæ maiestatis tremendæ! Offendi Te iisdem oculis, manibus, corde &c. quod Tu mihi ex misericordia largitus es! Offendi Te, non spe obtinendi alicujus regni, vel timore subeundæ acerbæ necis, sed timore modicæ confu-



confusionis, amore vilis oblectationis sensuum! Offendi Te, non semel aut bis, sed toties; offendi eadem hora, qua me tuis beneficiis eumulasti, qua furorem dæmonis coercuisti, ne me in tartara secum abriperet! o DEUS, quanta, quam horribilis est mea audacia, malitia, amentia, ingratitude! Et tamen ante oculos Tuos est adhuc infinite major, quam ego illam agnoscam!

2. *Doloris.* Ita & toties Te offendi, & quam egi pœnitentiam? dolui interdum, pectus percussi & dein quasi de venia jam securus acquievi. Quid post tot offensas DEL, possumne tam levi, & exigua pœnitentia contentus esse? An non cor meum jugi dolore confici, oculi mei jugibus lachrymis innatare deberent? Offendi infinitum bonum, id satis est ad dolendum semper! O utinam Te numquàm offendissem! Utinam prius mortuus --- sed enim passiones me excæcarunt

Propositi. Parce mihi, parce o DEUS, per infinitam tuam misericordiam, per JESU Christi sanguinem Te obtestor, Nunc toto corde ad te conversus, in conspectu Tuo firmiter statuo, potius mortem, quam ullum peccatum eligere! Sed an serium est, et sincerum propositum? Ita o mi JESU! Tu es Dominus vitæ & mortis; si prævides,
me

me adhuc semel peccaturum, rogo Te suppliciter, ut me prius ex hac vita evoces, antequam infelix ille dies mihi illucescat...

MEDITATIO TERTIA.

DE MORTE.

I. P. De morte, peccati pœna, considera præfertim hæc tria.

1. *Certitudinem & conceptum mortis.* Statutum esse omnibus hominibus semel mori, docet fides, & continua omnium retro sæculorum experientia. Sed quid est mors? qui ejus effectus?

1. *Mors est Separatio animæ a corpore;* & quam amara, cum quantis doloribus conjuncta? ipsa natura hominum ceteroqui non timidorum hanc separationem horret! An vidisti unquam morientem? En hic jacet viribus omnibus destitutus, immobili trunco, quam homini similior! Frons frigido sudore perfusa, exangues & pallidæ genæ, oculi fixi, & caligantes; vox fracta, os fæde hians, anhelitus crebri, & interclusi dissolutionem non procul abesse nuntiant. Ita ad extrema redactum invadit novus febriculæ insultus, luctatur natura, succumbit denique, & anima post repetitas aliquoties convulsiones, & omnium membro-

rum

rum succussiones egreditur, Judici suo sistenda. Corpus interim exanime in putredinem, & faniem abit, & ne illius deformitas, graveolentia, & fætor oculos, naresque hominum offendat, humi quam primum defoditur esca vermium futura! Huc denique recidunt tot curæ, ornando, nutriendoque delicate corpori & fovendæ plus æquo cuticulæ impensæ! Subter te sternetur tineæ & operimentum tuum erunt vermes. Isaia 14. 11.

2. *Mors est privatio omnium, quæ in mundo possidemus:* Et in quibus forsitan contra principia nostræ Religionis felicitatem nostram constitulimus, quasi æternum iis fruituri. Stulte! dicit DEUS talibus Luc. 12. 20. hac nocte repetent a Te animam tuam & quæ parasti, ejus erunt? Tua non erunt amplius. Nihil in hunc mundum intulimus, haud dubium, quod nec auferre quid possumus. Tim. 6. 7. Quam durum est amatoribus hujus mundi, a bonis illius avelli! o mors! quam amara est memoria tua homini pacem habenti in substantiis suis! Quid igitur juvant nunc divitiæ, quas tot artibus, utinam semper licitis collegisti? quid honores, quos tam avide non sine aliorum injuria captasti? aliis post te illos relinques. Quid amici, quorum insano amore non semel amicitia DEI renunciaisti? deserendi sunt.

funt. Quid voluptates, deliciæ, commoda? In omnibus vides vanitatem, & sentis afflictionem Spiritus! quid juvat te illis olim frutum esse? Transierunt, sicut umbra, & non sunt; & utinam nec fuissent unquam! Saltem purior, & quietior e corpore anima egrederetur! Siccine separas amara mors!

3. *Mors est finis temporis & initium æternitatis.* Ubi nunc sunt tot anni, quos vixisti, & quos pro DEO, & Cælo impendere non solum poteras, sed debebas? breve, ut somnium, tibi nunc apparet totum vitæ tuæ tempus, quod tibi olim tam longum videbatur, ut mille modos illud fallendi quæstiveris! An si omnes vitæ tuæ annos in unum colligas, vel quartam, decimam partem te sic exegisse putas, ut oportebat? Plurimum temporis negotia terrena, inutiles confabulationes, somnus, & curæ corporis sibi vendicarunt: pro DEO, pro anima vix aliquid remansit! Optabis tunc quidem, tot annos nugis male perditos recuperare, quia pretium temporis noscere incipis; optabis fortassis vel unicum diem adhuc habere, ut domui tuæ melius disponas: sed mors jam jam instans tempori finem imponit. Quare igitur nunc illo melius non uteris? Eodem momento, quo anima corpus deserit, æternitatem ingreditur! Heu quantum æternitatem inter
& tem-



& tempus discrimen! hoc finitum, illa infinita: tempore, quin quovis temporis momento uti pro arbitrio poteras ad agendam pœnitentiam, augenda merita &c. æternitas congruæ solum vel bene, vel malefactorum retributioni destinata est: prius eras in via, nunc in termino; qui, si bonus, æternum bonus, si malus, æternum malus! Quam alia longe sunt nunc animæ sensa?

A F F E C T U S.

Subjectionis & Resignationis. Moriendum igitur & mihi! Ita est. Stipendium peccati mors! sententia olim in Protoparentes nostros lata ad omnes, & singulos extenditur. Nullus immunis a pœna, quia nullus expers culpæ! Timeo quidem, sed non recuso mori! accepto libenter, o DEUS, de manu Tua mortem, peccatis meis toties promeritam! Patia-
tur corpus, putrescat caro, fomes, & instrumentum tot iniquitatum, fiat abominatio omnibus, quibus placere studuit.

Contemptus terrenorum. Quam misere cæcutivi hæcenus, qui commoda, honores, & temporalia bona tam avide sum consecutus! Vere amore hominis Christiani, taceo Religio-
si, digna non sunt, quæ vixdum possidentur, pereunt! Parum dixi, nil nisi contemptum merentur! hæc bona, quæ in comparatione
illorum

illorum, quæ expectamus, vix arena sunt exigua. Eja surge anima mea, excutere de pulvere; ut quid terrenis his crepundiis adhæres, quæ ad sublimiora creata es? immola nunc DEO tuo, cum maximo tuo merito, quod paulo post relinquere vel invita cogeris: immola terrena, & DEO fructu. Quid trepidas? nimis avarus es, ait S. Augustinus, cui DEUS non sufficit.

P. II. *Incertitudinem circumstantiarum mortis: Ex quibus adverte maxime ad sequentes:*

I. *Quando morieris?* Tempus & genus mortis incertum est. Nemo novit, nemo scire potest, an subito, an ex morbo præcedente, an sibi præsens, an mentis inops, & in deliriis, an sine, an cum assistentia sacerdotis sit moriturus. Fors in decrepita ætate, fors in ipso juventutis flore, fors post menses paucos, mors te abripiet! Fors hodie sanus, robustus, hilaris cubitum ibis, & cras exanimis in lecto invenieris! Contigit id pluribus, an tibi idem contingere non potest? & si contingeret, an te paratum mors inveniret? an nihil prius in te emendatum velles? Quæ igitur imprudentia, vel unica die in eo statu sponte morari, in quo mori timeres? Ne tardes, monet Sapiens, converti ad Dominum, & ne differas de die in diem: subito enim veniet ira



Ilira lius, & disperdet te! Neminem, quod consilium hoc secutus sit; multos, quod non sint secuti, pœnituit. Fac nunc, dum potes, quæ moriens facta fuisse voles! Quâ hora non putatis filius hominis veniet!


2. *Quoties morieris?* Statutum est, respondet S. Paulus, statutum est omnibus hominibus, semel mori. Ergo si hac unica vice in morte error cominititur, is per totam æternitatem corrigi, aut resarciri non potest! In temporalibus negotiis, si quis semel erret, non deest occasio, non desunt media, quibus errorem corrigat, in morte si semel erratum est, conclamatum est de salute in æternum! Vide utrum satis tutum & consultum sit in tanti momenti negotio, a quo tota felix, vel infelix æternitas dependet, erroris periculo se exponere!

3. *Quomodo morieris?* An mors bona, an mala sit futura, a gratia DEI, & præterita vita dependet. Si vitam tepidam, statui tuo difformem, peccaminosam egisti, habes profecto, quod metuas, ne mala & infelici morte moriaris. Væ, qui spernis, nonne & ipse sperneris? Isaïæ 33. Contra, si vita tua pia, peccati expers, vel certe pœnitens fuit, confidere potes, bonam & felicem tibi mortem obventuram: non tamen ideo de bona morte
se-

securus es. Certus enim non es, quanquam nullius peccati tibi conscius, utrum coram oculis DEI talis sis, qualem te putas: propterea dicit S. Paulus: nihil quidem mihi conscius sum sed non in hoc justificatus sum; Certus non es utrum gratia, in qua nunc forsitan es, numquam excides. Qui stat, admonet idem S. Paulus, videat, ne cadat. Gratiam perseverantiæ nec DEUS ulli dare tenetur, nec ullus sibi promereri potest. Est enim donum mere gratuitum. Quis ergo non metuat? quis salutem suam cum timore & tremore non operetur, & jugiter studeat finalis perseverantiæ donum adeo pretiosum tam ferventibus precibus, quam bonis operibus impetrare?

A F F E C T U S.

Confusionis sui! Ah Domine! omnibus artubus contremisco, dum omnes has mortis circumstantias iterum animo revolvo? scivi pridem moriendum mihi esse, scivi, tempus, modum, & eventum mortis sciri a nemine posse, & frequenter hac incertitudine territus proposita salutaria concepì vitæ meæ in melius commutandæ! Sed heu! ultra evanida hæc proposita nunquam progressus sum! Idem, in quo pridem mori timui, adhuc est vitæ languor, & quod pejus est, non obstante hoc languore, mei tam securus vivo, ac si de bona morte certus essem. Væ mi-



hi! si porro ita vivere pergant! timendum merito, ne improvisa, & infelix mors impœnitentem obruat!

Implorationis auxilii Divini. Pudet me nunc & pœnitet, insanix vel levitatis meæ! & denuo coram te statuo, vitam meam ita instituere, ut mortem semper ante oculos habens, omni momento mori paratus sim! Sed tu Domine! qui nosti fragilitatem, & levitatem meam, confirma me in hoc sancto proposito! ne permitte me in pristinum veterum relabi, sed flagellis potius, si aliter nolit, morbis, afflictionibus, & adversitatibus languentem ad constantem vigilantiam excita!

P. III. *Differentiam bonæ & malæ mortis.*
S: Scriptura mortem peccatoris appellat pessimam, mortem Iusti pretiosam in conspectu Domini. Expende paucis utramque.

Mors peccatoris pessima. Nec multo felicior mors tepidi, & laxi Religiosi! 1. Ob angustias, quæ animum illius uno quasi agmine obsidebunt. Ingerent se tunc etiam nolenti peccata omnia, quæ unquam commisit, habituales tot gratiarum, & obligationum sui status neglectus, occurret jactura temporis, rebus vanis, & inutilibus consumpti. Numia loquendi, conversandi, & agendi omnia, quæ passio suggestit, licentia; suppressi tot conscientix

tizæ remorsus, quos propterea sensit, & tamquam scrupulos contempsit; Evigilabit ratio fallacibus principiis hactenus fascinata, & ad lucem cerei mortualis videbit inanitatem excusationum, per quas se diversis Religionis oneribus subtraxit, falsitatem principiorum & dictaminum, quibus errores non leves elevare, & quasi cohonestare satagebat. Hæc omnia, quam crudeliter lacerabunt cor miseri hujus? Impletum in se sentiet illud Psal. 17. 5. Dolores inferni circumdederunt me, præoccupaverunt me laquei mortis.

2. *Ob Pusillanimitatem*, desperationi non multum absimilem, quæ ex prædictis angustiis naturaliter oritur. Conabuntur quidem præsentis moribundum ad fiduciam in infinita DEI misericordia excitare, sed motiva hæc non ita penetrabunt, ut internam habitualis suæ tepiditatis, & laxitatis objurgationem, vivacissimam malefactorum memoriam, & timorem judiciorum divinorum valeant extinguere. Unde licet in desperationem cum magnis peccatoribus non agatur, tam tenuis tamen est spei radius, qui illi illucescit, ut consolando misero non sufficiat.

3. *Ob impænitentiam*. Non quidem formalem; qualis est illa obstinatorum peccatorum sed accidentalem, & interpretativam. Cum enim seri-

am



am inordinatæ suæ vitæ emendationem in-
 teratus tepor semper impediat, repente a morte,
 quæ venit ut fur, obrutus, in sua acedia, & radi-
 catis vitiis moritur; vel si etiam quandoque
 temporis quid superest, per usum Sacramen-
 torum maculas animi abstergerendi, id perinde,
 ut alias, languide, & obiter fieri solet adeo,
 ut vix, ac ne vix quidem salutaris pœniten-
 tiæ nomen mereatur. Nempe, sicut vivimus,
 ita communiter morimur! Qualis erat hucusque
 vita mea? Qualem esse imposterum oportet?

Mors iusti pretiosa in conspectu Domini I.
 Quia moritur animo pacato, & a rebus terre-
 nis pridem avulso. Ille considerat mortem,
 tanquam finem miseriarum & initium veræ
 felicitatis: & ideo cupit dissolvi, & esse cum
 Christo. *II.* Quia moritur cum humili, &
 filiali fiducia. Quid enim timeat, qui soli DE-
 O vivere in Religione pro viribus suis co-
 natus est? Tot relatæ de se victoriæ, tot per
 totam vitam collecta merita, & exhausti la-
 bores Apostolici replent illum suavi consola-
 tione, quæ est prodroma, & quasi pignus
 subsequatur paulo post perfectæ felicitatis. *III.*
 Quia moritur in plenissima cum DEO unio-
 ne & exercitio pulcherrimarum virtutum, qui-
 bus sanus assueverat. Nunc sentit fructum hu-
 jus sanctæ consuetudinis. Licet morbo pænè con-
 sumptus

sumptus & extreme debilis ad minimam de DEO mentionem, novum quasi vigorem sibi addit, mentem quam vivacissime ad DEUM elevat, se totum Illi ex corde offert, prorumpit in tenerrimos affectus &c. Ino etiam soli sibi relictus DEI sui, quem alias sibi semper præsentem habuit, adeo non obliviscitur, ut sæpius cum Illo suavissime sermocinari advertatur.

4. Quia moritur in gratia finali, quæ est corona perseverantiæ in exequendis vitæ religiosæ officiis. Moritur ergo, quæ amicus DEI, in brachiis, & sinu DEI, in quo a laboribus suis dulcissime requiescet in æternum.

A F F E C T U S.

Desiderii & gratiarum actionis. O quam amabilis, quam jucunda est mors talis! Utinam, o utinam moriatur anima mea morte Justî hujus! Sed an sperare talem mortem possem, si nunc moriendum esset? Scio Domine, non moriturum facile quempiam, ut fervidum DEI fervum, qui ut fervidus DEI famulus non vixerit; & quoniam clare agnosco, me non solum talem hucusque non fuisse, sed potius inutilem, tepidum, laxum, quem mors mala certo certius expectaret, ideo infinitæ Tuæ bonitati ex corde gratias ago, quod tempus, mortem mihi feliciorē procurandi, clementer indulgeas! Misericordia Domini, quod non sum consumptus!

E

Propo-



Propositi Utar, coram facie Tua & coram omni Coelesti curia firmissime statuo, utar melius tempore mihi concesso. Nulla post hac dies sine vivaci mortis memoria, & vigilantia cura me ad mortem præparandi abibit. Parum mea interest, utrum diu vivam, sed multum interest, ut bene, religiose, pie vivam, & feliciter ac beate moriar!

DIES TERTIA


MEDITATIO PRIMA.

DE JUDICIO PARTICULARI.

I. P. Judicium, quod post mortem quilibet homo subeundum habet, terribile facit:

i. Ratio reddenda totius vitæ. Eo momento, quo anima a corpore separabitur, sistetur Divino tribunali, & cogetur rationem reddere villicationis suæ. Aperietur liber Omniscientiæ DEI & conscientia nostræ, in quibus clarissime videbit

i. Omnes gratias, & beneficia sibi, a DEO collata, tam quo ad animam, quam quo ad corpus. Omnia beneficia tam omnibus communia, quam particularia, illorumque seu usum, seu abusum. Siste hic parumper, & aliqua saltem, cum omnia nequeas, mente revolve. Unde est, quod præ



præ tot aliis extractus e nihilo; tam solite
a tuis educatus; tot periculis ereptus vivas?
Valetudo bona, vires corporis firmæ, non
vulgaria talenta &c. &c. Dona DEI sunt mere
gratuita. Non labitur dies, hora, imo mo-
mentum ullum novarum grátiarum expers. Hæc
omnia dedit tibi beneficium Nuntius, ut iis suam
gloriam promoveas, & finem tuum ultimum fa-
cilius certiusque consequaris. Nunc de omnibus
& singulis rationem exigit. Formidabiliorem ad-
huc reddent hanc rationem tot grátia & dona
spiritualia, quibus te utpote Religiosum circumval-
lavit! Vocatio religiosa, tot exempla proborum,
quæ tibi quotidie ob oculos versabantur, tot Supe-
riorum salutaria monita, tot bonæ inspirationes,
collustrationes intellectus, & piæ motiones
voluntatis, tot remorsus conscientia, tanta ora-
tionum, meditationum & Sacramentorum fre-
quentia quid erant, nisi pretium sanguinis
JESU Christi, pro salute nostra effusi, & pignus
certum serio, & efficaciter nos salvare volentis
DEI? His si aut usus non es, ut debuisti, aut
plane abusus, qualis horror te invadet? Quid
mirum, si sanguis Christi, cujus pretium sunt,
clarius, & terribilius, quam olim sanguis Abel
contra Cain, vindictam clamet?

2. *Omnia peccata tam venialia, quam mor-
talia a primo rationis usu commissa.* Et qui-

Ez

dem



dem non solum propria, sed etiam aliena: non solum opere, sed & cogitatione, & verbo, & omissione patrata. Heu! quam enormis illorum a tot annis numerus exurget? Quam multa ex illis, quæ hucusque levia putasti, tunc tibi grandia, & enormia videbuntur? Quam multa, de quibus pœnitentiam te egisse existimas, ex defectu veri doloris nondum deleta invenies? Quot nova, tibi hucusque incognita deteges! O quanta confusio cooperiet faciem tuam, quando tot, tantisque delictis animam tuam conspurcatam conspicies? Nunc quidem horres, te penitus inspicere, sed tunc etiam invitus fateberis: iniquitates meæ supergressæ sunt caput meum, & sicut onus grave gravatæ sunt super me!

3. *Omnia opera, etiam bona.* Multi, licet memoria suorum peccatorum interdum angantur, consolantur se tamen aliquatenus bonis suis operibus, quæ non raro exercent. Sed noli in orationibus, Eleemosynis, mortificationibus, aliisque virtutum actibus confidere. Ego, ait DEUS per Psalten regium: etiam iustitias judicabo; Scrutabor Jerusalem in lucernis. Illuminabit DEUS abscondita tenebrarum, & manifestabit consilia cordium, ut ait S. Joannes Apoc: 2. Scrutabitur ergo DEUS in operibus piis, quæ videntur, intentiones,



tiones, motiva, affectus, qui non videntur: scrutabitur, an in statu gratiæ, an propter se, & ad augendam suam gloriam, an bene & ferventer peracta sint! Si quæ harum conditionum absit, opus quodcunque aut Cælo omnino indignum, aut certe minus dignum est. Et quam rara sunt opera, quibus nulla harum deest? Oras in statu gratiæ, sed quam languide, & distracte? das stipem egenti, sed ex naturali tantum commiseratione; illatam tibi injuriam non ulcisceris, sed ex respectu humano &c. An mercedem æternam tibi ex his promittere audes? Audi Gregorium M. & inde rigorem reddendæ olim rationis metire: Justitia nostra, inquit, ad examen Divinæ justitiæ deducta, injustitia erit & sordebit in districtione Judicis, quæ in æstimatione fulgebat operantis.

A F F E C T U S

Agnitionis & confusionis sui. Væ mihi misero, quando coram Tribunali Tuo, o Judex divine, comparebo! Quam tristis & confusus stabo, dum infinitum gratiarum & beneficiorum tuorum numerum uno quasi obtutu conspiciam? Media hæc erant, finem meum ultimum certius, & facilius consequendi; & ego illis abusus sum ad perditionem: Illicia erant Te ferventius amandi, Tibi alacrius

erius serviendi & ego illa in arma conver-
ti, quibus Te impugnem! Quam abominabi-
lis est hæc mea in te ingratitudo? Quo Tu erga me
beneficentior eras, eo ego peior, & audacior fa-
ctus sum ad multiplicandas quotidie iniquitates!

Vere infixus sum in limo profundi ingra-
titudinis & malitiæ, & nescivi! Sed nunc
video, quam sim miser, & pauper, & nu-
dus, præcipue cum merito metuere debeam
ne pleraque mea etiam bona opera tam sinistris
intentionibus vitiata, tam languide, & ex consue-
tudine facta abominatio sint coram oculis Tuis

Doloris Pœnitet, ah pœnitet me tantæ
meæ ingratitudinis & malitiæ! Quis dabit
capiti meo aquas & fontem Lachrymarum
oculis meis ut ignorantias meas, & delicta mea
diu noctuque deleam, & abluam omnes animæ
fordes, antequam Tu me in Judicium tecum addu-
cas! Ah Domine respice in me & miserere mei.

P. II. *Judicium terribile facit ratio red-
denda totius vitæ scrupulosissima.* Præter exac-
tissimam omnium cogitationum, verborum,
actionum disquisitionem, sunt & alia, quæ
rigorem hujus judicii aggravant.

1. *Quia nullus hic occultationi, excusationi de-
fensionis locus.* Judex terrenus, quomodocunque sa-
gax, non potest semper veritatem, in quam inqui-
rit, detegere. Astutia Rei, sua vera sen-
sa ce-
lan-

lantis, sagacitas Advocati, quæ sunt dubia, & suspecta, dextre interpretantis, & exculpationes comminiscantis vero quam simillimas, crimen sibi obiectum aut diluit aut elevat. Non ita coram Iudice DEO: Nihil hic tam occultum, quod non reveletur: nihil tam implexum, quod non evolvatur. Omnia nuda, & aperta sunt oculis Ejus. Anima sibi soli relicta omni defensore carebit. Præterea, cum arguet te, & statuet contra faciem tuam, tam claræ, & distinctæ cujuslibet vel levissimæ culpæ cognitionem animæ communicabit, ut excusare, utut velit, non possit. Cogetur fateri, hoc vel illud se fecisse, scienter, libere fecisse.

2. *Quia nulla hic acceptatio Personarum.* Rusticus & Nobilis, Subditus & Præpositus, Dives & Pauper, Rudis & Doctus eundem rigorem sentient. Hoc Tribunal Insignia, Honores, Laureas, Aurum non respicit, quibus Iudices terreni excæcati, vel corrupti multa dissimulant. Imo quo quis nobilior, altior, doctior, eo peius habebit in Iudicio; major his & rigidior præ reliquis est ratio reddenda; quia cui plus datum est, plus requiretur ab illo. Væ igitur Religioso, qui tot præ aliis occasiones, media, incitamenta ad pie & statui suo conformiter vivendum habet, si omnibus insuper habitis religioso & pie non vixerit!

3. *Quia*



3. *Quia nulla intercessionis alienæ spes, nulla deprecationis propriæ fructus.* Propter preces, & lachrymas magnæ Familiæ, propter intercessionem Magnatum crimina etiam maxima non raro supprimuntur, teguntur, condonantur, vel levius saltem puniuntur. Quin & ingenua Confessio delicti, dolorosæ deprecationi conjuncta interdum veniam meruit. Coram Tribunali Judicis nostri sera & inutilis est deprecatio. Tempus misericordiæ elapsum est. Quare igitur nunc non ago, quod tunc egisse nequidquam optabo? At fors patrocina & intercessionem rigorem Judicis mitigabunt? Sed quis pro te intercedet? Angelus Custos tuus? Cujus monita salutaria audire toties respuebas? Sancti tui Patroni? quibus licet aliqua fors absequia detulisti, moribus tamen te exhibuisti tam dissimilem? Ipsa Mater DEI, peccatorum alias Advocata, manum a te, utpote extra statum viæ posito retrahet!

A F F E C T U S.


Accusationis sui ipsius. Quid faciam miser, mihi soli relictus, & tot delictorum intime conscius? Ah cur non perpendi prius, quam terribile sit, incidere in manus DEI viventis! Quoties audiui, & legi, non valitutam in Judicio DEI excusationem, Personarum

rum distinctionem, aliorum pro me intercessionem? Quoties in meditationibus, in recollectione annua me timore perculit hæc indubitata veritas; me utpote Religiosum, majoribus & pluribus gratiis præventum, præ sæcularibus rigidius manere judicium, nisi vitam meam tepidam, tot imperfectionibus, imo & peccatis scatentem, dum tempus est, emendavero? Proposui quidem frequentius, sed proposita hæc annotasse contentus, idem semper, qui fui ante, mansi, quia securim ad radicem ponere, difficultates in propositorum executione emergentes vincere horruī!

Propositi. Num porro tam tepidus, tot imperfectionibus & peccatis plenus esse pergam? Abſit, o Domine! Scio, quod desideria bona, & proposita, nisi executioni dentur, occidant pigrum, & ideo coram Divina majestate Tua firmiter statuo, nunc tandem serio exequendi, quæ pridem statui. Dixi, nunc cœpi! Tu Domine adjuva infirmitatem meam.

P. III. 3. *Judicium terribile facit ratio reddenda severissimo Judici.* Judex hic est justissimus, supremus, & immutabilis. Inde deduces sequentia corollaria.

I. *Corollarium.* Quia justissimus est, bonos quidem liberalissime remunerabitur, malos vero severissime puniet. Felicem me! si bonis
tunc



tunc annumerari merear! Merces mea eris Tu ipse, mi DEUS, & merces magna nimis! Si malis: infernus domus mea est. Quam anceps pendet mea causa? Peccavi toties, & non scio, utrum amore an odio dignus sim! Hoc scio quod, si nunc Te non placavero, non misereberis tunc amplius, neque parcet oculus Tuus! Nunc sicut agnus mitissimus dissimulas peccata hominum propter poenitentiam, tunc eris sicut Leo ferox, & sicut potens erapulatus a vino insurges contra inimicos Tuos! Unicum peccatum mortale, poenitentia non deletum, satis est, ut sine misericordia ejiciat in tenebras exteriores. Minimæ nævus acerbissimis Purgatorii ignis flammis tamdiu exurit, donec Justitiæ Divinæ satisfactum sit, usque ad ultimum quadrantem! Hæc Exigit Judicis justitia! Heu quantæ, quam diuturnæ poenæ Religiosum manent, quotidie peccata venialia accumulantes, & parum sollicitum, ut illa voluntariis corporis castigationibus hic expiet!


2. *Corollarium.* Quia supremus est, & immutabilis, non datur ab illo appellatio. Si in hoc Tribunali causa cadis, actum est de te. In terrenis judiciis est alterum altero sublimius. Si in inferiori factam mihi esse injuriam puto, æquitatem alterius imploro, quod Acta denuo

denuo revideat, sententiam latam rescindat, vel mitiget. Si Judex hic supremus fert sententiam, fors nostra irrevocabiliter decisa est. Vel regnabimus, vel ardebimus, in æternum! Nulla unquam spes recursus, quia supremus, nulla immutationis in æternum, quia immutabilis est!

A F F E C T U S.

Humiliationis & Timoris: O Judex Divine quam terribile est judicium Tuum! cuius sola recordatio timore, & tremore me teplet! Ergo omnia, quæ gessi in vita mea, & bona & mala discuties & in statera appendes! O quantum hæc præ illis præponderarent, si nunc, hoc momento utraque bilanci Tuæ imponerentur! Peccatorum & defectuum quantus numerus! quam exiguus contra bonorum operum? Et hæc ipsa quot imperfectionibus vitiata? Nec excusare errata mea per ignorantiam, inadvertentiam, fragilitatem valeo: debebam scire, poteram facere, quæ Tu jussisti: gratia Tua non deerat, quæ me excitabat, intus admonebat, & mihi vires abunde suffecisset, si ea uti voluissem. Sed animi mei levitas, inconsiderata, respectus humanus, cominoditatis propriæ studium, & minimæ difficultatis subeunda horror eo me sensim deduxerunt, ut merito timeam, ne minus habens inventus a Te reprobari merear.]

Depre:




Deprecationis Non intra mecum in iudicium, o bone JESU! sed potius patientiam habe in me, infideli hucusque Servo tuo! Cum Tua divina gratia, quam supplex imploro & a Te confidenter spero, conabor pro viribus pro commissis delictis satisfacere, omnem peccati, præsertim gravis umbram cane & angue pejus odisse & fugere, in implendas officii mei partes, & colligenda in posterum merita sedulo, & constanter incumbere, ut audire a Te in Iudicio merear: Veni benedicte Patris mei, & posside regnum &c.

MEDITATIO SECUNDA.

DE POENA DAMNI IN INFERNO

I. P. *Damnatus in Inferno privatur DEO, summo suo bono, summa sua felicitate.* Perinde quidem inconceptibile est, quam infinitum malum sit, DEO privari, quam est inconceptibile, quam infinitum sit bonum, DEUM possidere. Sed enim dabit nobis intellectus sanus modum, hoc saltem aliquomodo adumbrandi. Perpende ergo serio, quid significet, privari DEO!

1. Damnatus privatur fruitione DEI. Quam primum anima Cælum ingreditur, tanta a DEO luce collustratur, ut abyssum Ejus Divinæ Essentiae


 sentię totam, quantum creaturę est possibile, perfectissime cognoscat, tantoque inflammatur desiderio DEO fruendi, ut vel momentanea hujus fruitionis dilatio infinitum mœrorem causaret; quia ergo anima hoc bonum ardentissime desiderat, illo perfectissime fruitur & de æterna ejus fruitione certa est, oritur illi tanta gaudiorum abundantia, & immensitas, ut reliquę omnes Paradisi voluptates, respectu illius quasi evanescant. Contrarium invenitur in Inferno. Licet enim anima in primo suo in infernum ingressu eodem modo illuminetur, ut DEUM perfecte, & Ejus amabilitatem cognoscat, & inde oriatur tantum Eo fruendi desiderium, ut minima dilatio summum dolorem causet, cum tamen ab Ejus fruitione violente repellatur, tanto, tam inexplicabili mœrore, amaritudine, & desperatione penetratur, ut reliqua omnia inferni tormenta, utut acerbissima respectu hujus nulla videantur. Verbo: quam magnum & immensum animę gaudium est in Cœlo, eo quod DEO suo fruatur, tanta est animę in inferno desperatio, eo quod DEO suo privetur.

2. *Damnatus privatur cum DEO simul omni amore creaturarum.* Beatissima Virgo, Angeli Custodes, cæteri Sancti amant homines, quamdiu vivunt; quamprimum vero a DEO abjecti



abjecti sunt; & hi illos rejiciunt. Tota æternitate nec curam de illis ullam habent; imo cum gaudio illos in flammis & tormentis intuentur; tanquam victimas justitiæ divinæ; oderrunt, maledicunt, rident illos in extremis miseriis constitutos. Ipsæ matres, DEO fruenter, suas damnatas proles, sine commiseratione; ac si illas nunquam nossent, considerant. Damnati ipsi inter se non solum omnis amoris sunt incapaces; sed omnem in se furorem, mutuo exercent & sic augentur poenarum, & tormentorum acerbitates, quæ & in se crudelissima, & ob alias circumstantias, foetorem, tenebras, horrorem & nauseam ab istis monstris procreatam intolerabilia sunt.

3. *Postquam damnatus DEUM & cum DEO omnia perdidit, incidit in potestatem diaboli.* DEUS nullam ejus curam amplius gerit, deponit ita loquendo omne in illum dominium & arbitrio diaboli illum tradit. Heu! quid fiet tali animæ! diabolus est creatura, implacabile erga hominem odium habens, scientia magna & robore & potestate illimitata prædita: quam diversis & inauditis tormentis excruciare damnatum potest? Imaginare, & repræsentare tibi hic, quidquid est crudelissimum, acerbissimum, & maxime sensibile, quidquid unquam audivisti, vel legisti!

gisti! Omnia hæc nil sunt, nisi umbra tenuissima, respectu illorum, quibus damnatum excarnificabit pro libitu suo. Dominus enim ejus, nunc est, & DEUS ab illo recessit.

A F F E C T U S,

Confessionis propria. O JESU! quam terribilia sunt judicia! quam rigida justitia Tua! Quantum malum est peccatum, & quam amari fructus, quos producit? Abjici in æternum a facie DEI, excludi Cælo, maledici ab Electis, sub tyrannide diaboli æternum ejulare merces est peccati! An veritatem hanc credidi? Hoc ipsum est, quod malitiam meam auget! Credidi, sufficere unicum peccatum, ad me a meo JESU æternum avellendum! Credidi per momentaneam voluptatem perdi DEUM, & omnem felicitatem: Et tamen peccavi, sine timore libere peccavi! Nescio an cæcitas mea major sit, an malitia! O JESU non auferas a me misericordiam Tuam.

Propositi. Quid facto opus? ad quid me resolvo? Et si mille mihi vitas constaret, Te, mi DEUS, Te finem meum videre in gloria debeo! Te mi JESU! Te Redemptorem amabilissimum amplecti in Cælo debeo; licet pervenire ad Te, nisi per crudelissima tormenta non possem! Fixum est ergo: malo mori millies, quam vel semel adhuc peccare!

Angeli



Angeli DEI! vos sinceræ hujus meæ voluntatis testes invoco; malo mori millies &c.

P. II. *Damnatus in inferno reperit DEUM tanquam summum malum.* Sed quomodo potest DEUS, qui summum bonum & sola hominis est felicitas, maximum malum, & summa infelicitas fieri damnato? Considera, anima mea, quid DEUS in damnatis operetur, & veritatem clare intelliges.


I. DEUS conservat in damnatis vivacissimam cognitionem suæ infinitæ pulchritudinis, & illa fruendi ardentissimum desiderium! Si anima majorem DEI cognitionem in inferno non haberet, quam habuit in terris, privari DEO non esset illi pœna tam acerba! Sed quoniam suprema luce illustrata immensam felicitatem, qua frui in DEO posset, vivacissime agnoscit ardentissimis in DEUM desideriis omni momento rapitur, & toties ab Illo repellitur & dolore incomprehensibili excruciat. Magna sane pœna sitibundo esset, si pedibus manibusque ad palum ligatus, nectar dulcissimum ante se videret, nec tamen unquam per dies, & dies bibere posset! Substitue miseræ huic paritati quamcumque aliam graviores, discrimen erit semper infinitum.

2. DE-

2. *DEUS conservat in damnatis visionem irati Judicis.* Obversatur oculis damnatorum jugiter tanquam ira maxima, & furore plenus, contra illos armatus, & illis persequendis, & cruciandis intentus. Hinc desiderant a facie Illius fugere, sed quo longius recedere ab Illo optant, eo illis vicinior adest, & facit illos sentire, quam gravis sit manus Altissimi, dum castigat! Quanta debet esse hæc pœna! Sicut unicus DEI remuneratoris intuitus sufficit ad replendos omni gaudio Electos, sic ad terrorem & desperationem Damnatorum satis est unicus intuitus Judicis irati!

3. *DEUS conservat damnatis vitam.* Damnatis nil magis est in votis, quam mors. Quia vident, fieri non posse, ut iratus Judex placetur unquam, suspirant, & anhelant mortem, tanquam unicum miseriarum infinitarum medium & finem. Sed frustra: quamdiu vivit DEUS immortalis, tamdiu vivent damnati: Et sicut DEUS Sanctos suos in Cœlo in æternum conservat, ut illos novis jugiter voluptatibus satiet, ita conservabit damnatos in æternum, ut illos novis continuo tormentis discruciet!

4. *DEUS conservat damnatis suam iram.* Millies, & millies peccatis suis maledicent infelices reprobi, gement, & ejulabunt tam



lugubriter ut emolliri rupes, & petræ videantur; tantos lachrymarum imbres fundent, ut inundari illis totus mundus posset: tamdiu ardebunt, ut dici tandem possit: illos jam pro peccato quovis mortali mille annorum millionibus arsisse! Omnia hæc iram DEI non mitigant: non movetur DEUS ad commiserationem, odit illos adhuc, & per totam æternitatem odisse perget. Hæc scientes in desperationem aguntur, furunt, corpus suum dentibus dilaniant, blasphemias Cælum impetunt, & tanto contra DEUM odio corripuntur, ut si esset possibile, Illum discernerent, & perderent.


A F F E C T U S.

Timoris O quam bonum est, benignum, & liberalem experiri DEUM; sed quam amarum est, experiri Eundem iratum, & rigidum! Quam bonum & dulce, frui DEO in æternum; sed quam terribile DEO in æternum privari! Quid me præservare ab hoc infinito malo potest? Ah! Anima mea, post peccatum nullum jam superest medium, nisi sincera detestatio peccati, vera & constans pœnitentia! Eia ergo, anima mea, confurge, excutere de pulvere, revertere ad Dominum, gemitunda ad pedes JESU prosternere.

Doloris.

Doloris. O mi DEUS, JESU mi dulcissime! abominor, & detestor ex toto corde omnia peccata, quæ in hanc usque horam commisi! Agnosco, quàm male egerim! peccatum est summum malum, quia est offensa bonitatis & misericordiæ Tuæ infinitæ; est summum malum, quia est exitium animæ meæ immortalis: & ideo odi illud, & execror ex animo! O utinam nunquam peccassem! O utinam Te, o summum Bonum, nunquam offendissem! Sed enim peccavi, Te finem meum, unicam felicitatem perdidi, & amplius Te, nisi per lachrymas, & pœnitentiam invenire non possum! doleo & dolebo, quandiu vixero, & quidem ita doleo, ut paratus essem, tormenta quæcunque & mille neces subire, si revocari his, quæ male feci, possent! Et hunc dolorem coram oculis Tuis toties renovatum volo, quoties arteriæ pulsant. Supple Tu o mi JESU! quod ego non possum, & offer Cœlesti Tuo Patri pro me illum vehementissimum dolorem, quem in horto Gethsemani ob mea peccata sensisti.

Propositi. Absit a me, o JESU! ut vel semel in posterum peccem! Si peccatum non aliter vitare, quam per contemptum, opprobrium, & mortem possem, hanc potius eligerem! Malo



contemni, ab omnibus odio haberi, mori, malo ignito lacui immergi, quam peccare! Hinc omnes in futurum horas, singula momenta ita impendam, ut Te DEUM Summum bonum amem, Tuamque in omnibus voluntatem impleam. O JESU! alte cordi meo hoc propositum insculpe, & fac, ut non recedam a Te amplius in æternum.

MEDITATIO III.

DE POENA SENSUS IN INFERNO.

I. **P**. *Pœna sensus in Inferno est terribilis, quoad suam essentiam.* Imaginare tibi anima mea, ac si alta, & tenebrosa nocte in monte altissimo consistens, videres terram infra te aperiri tam magno hiatus, ut ipse se infernus tuis oculis conspiciendum offerat! Est hic subterraneus carcer petris, & rupibus undique bene septus, igne sulphureo repletus, & mephitim intolerabilem exhalans! In hoc carcere damnati arcte invicem compacti jacent, sicut lateres in fornace, in qua exuruntur. Considera, qualis sit ignis iste, qui damnatos exurit.

I. *Iste ignis est universalis, & cruciat totam animam, & totum corpus.* Jacet in inferno damnatus illo loco immobilis, quem illi Justitia divi-


tia divina assignavit, undique cinctus,
 & circumdatus ignibus, sicuti piscis
 aquâ. Caput, oculi, aures, os, labia, genæ
 igne penetrantur: brachia, pedes, tergum, pec-
 tus igne depascuntur: omnia corporis membra,
 ut ferrum candens, ignita sunt. Locus in
 quo jacet, cibus & potus, quibus utitur, au-
 ra quam attrahit, omnia quæ videt, & tan-
 git, est ignis. Nec dum satis. Ignis est ab-
 intus, sicut ab extra, ignis est in cere-
 bro, in dentibus, in lingua, gutture, pulmo-
 nibus, corde, nervis & venis, ossibus, me-
 dulla ossium, & sanguine. Quod adhuc ter-
 ribilius; hic ignis est in intellectu, voluntate
 memoria: omnes potentiæ animæ ab hoc
 igne pervaduntur, & intine penetrantur. Si
 furno æneo ita catenis adstrictus essem, ut
 toto quidem corpore extra ignem posito,
 unum tamen brachium ignibus exureretur &
 exureretur mille continuis annis! DEO per
 miraculum me in vivis conservante, quam
 intolerabilis esset iste cruciatus, & dolor?
 Quid ergo erit, non una sui corporis parte,
 sed toto corpore, tota anima, singulis
 artubus, singulis potentiis circumdatum esse
 igne & incessanter exuri?

2. *Hic ignis est longe terribilior, quam
 sibi quis imaginari possit. Ignis hujus mundi
 qualis-*




qualiscunque, non est, nisi umbra illius infernalis! Nam quia iustitia DEI illo tanquam instrumeto utitur ad vindicandas injurias suæ infinitæ Majestati illatas, & quia ad has pro condigno puniendas, nullus ignis terrenus sufficit, indidit igni infernali ferme infinitam, & talem virtutem, quam intellectus nullus capere possit. Sed quomodo urit hic ignis? Ita, dicunt Ascetæ, ut si scintilla illius unica in lapidem molarem, in globum æneum decideret, hic in momento, sicut cera liquesceret, ille in pulveres redigeretur: ita, ut si scintilla in lacum frigidissimum, aut glacie constrictum incideret, lacus hic momento ebulliret;

3. Subsiste hic paulisper anima mea, & responde mihi! En! adest ante te bos e metallo fusus, supponitur illi ignis magnus, fit candens: ex altera parte ostenduntur tibi, & offeruntur omnes mundi voluptates, divitiæ, honores, si vel mediam horam in candente hoc bove transigere velis, quid eligeres? vel si revera integro regno, & cum hoc immensis bonis, honoribus, & omnis generis voluptatibus fruereris, sed ab hoste superveniente captus cogereris aut regno te abdicare, aut per mediam horam in ignito bove æneo clausus persistere, quid, quæso, eligeres? respondebis, scio, te sine hæsitacione, regno


 gno, & omnibus bonis cum illo connexis
 cedere malle, malle te omnem vitam in extrema
 paupertate, contemptu, miseria agere, quam
 esse tam amentem, ut tormentum tam acer-
 bum eligas, etiamsi præscires, Dominum DE-
 UM tibi per miraculum vitam conservatu-
 rum esse. Converte nunc a temporalibus men-
 tem tuam ad æterna! ad evitandum tormen-
 tum in bove candente resolveres te ad ca-
 rendum omnibus bonis, quantumcumque
 tibi charis & amænis, & ad perferenda quæ-
 cumque ardua. Cur ita non loqueris, & agis,
 dum agitur de æternis? non bovem æneum,
 & ad breve tempus, sed carcerem igne in-
 fernali plenum, & æternum minitatur Tibi
 DEUS; an ergo non omnibus ab Illo veti-
 tis, quantumcumque amænis, & charis liben-
 ter te abstinere, & aggredi, ac perferre o-
 mnia, licet maxime ardua, sed ab Illo præ-
 cepta deberes?

A F F E C T U S.

*T*imoris. Has omnes veritates, o mi DEUS,
 novi pridem & credidi. Sed an vita fidei
 meæ erat conformis? Ah peccavi, infernum
 meritis sum, & per quid? An mihi, si peccem,
 regnum oblatum est? an mors intentata, si pec-
 care renuam? Ah non: Tu scis, o DEUS
 meus, & ego novi, & pudet me nunc, prop-
 ter



ter rem exiguam, vilem, peccatis, & inferno
obnoxium me fecit tam cæcus, tam amentis,
& vecors, tam crudelis fui erga me ipsum!
Sed quæ impie hucusque facta sunt a me, spe-
ro, ignovisti mihi, o misericordiarum Pater!
Quod me terrore, & timore replet, est: pos-
sum denuo peccare, in peccato mori, & da-
mnari! Inclinationes malæ, quæ me olim se-
duxerunt, vivunt adhuc, insurgit adhuc immorti-
ficata caro contra spiritum; adhuc peccare &
damnari possum!

Implorationis gratiæ. In hac terribili in-
certitudine constitutus, oculos & manus ad
Te extollo ad implorandam humillime &
ardentissime Tuam infinitam misericordiam!
Amabilissime Pater! DEUS meus & omnia!
JESU dulcissime, redemptor benignissime!
respice vulnera Tua, quæ mei causa Tibi
inflicta sunt, memento sanguinis pro me
effusi! longanimitatis Tuæ, qua meam impieta-
tem tamdiu patienter sustinuisti, misericordiæ
mihi toties exhibitæ, bonitatis paternæ, qua
me præ tot aliis in domum tuam, in Reli-
gionem vocasti; amoris, quo me post tantum
gratiarum Tuarum abusum, adhuc hodie ad
perfectiorem vitam invitare dignaris! Quid?
an hæc omnia in me perire fines? peribunt
autem certe, si mei misertus non fueris!

Ah:

Ah! JESU! converte illos tuos benignos, & vere paternos oculos in me, & salva me! Nunquam fortassis habuit majorem exultandi, & misericordiam Tuam superexaltandi causam Cœlum, quam si mei post tot mea peccata miserearis!

P. II. *Pœna sensus in inferno est terribilis quoad durationem.* Duratio hæc est omnium, quæ sunt in inferno, terribilissima. Damnatus privatur DEO in æternum, ardet in inferno in æternum. Sed quid est æternitas? nec Angeli comprehendunt: sed tamen ut secundum nostrum concipiendi modum saltem aliquid dicamus, considera has duas veritates.

1. *Æternitas est sine fine.* Hæc est illa stupenda veritas, quæ etiam maximos sanctos timore, & tremore complevit. Veniet ultimi judicii dies, peribit mundus, absorpti a terra reprobi in infernum cum corpore & anima detrudentur: & DEUS omnipotenti sua manu carcerem hunc infernalem feris æternis occludet. Labentur tot sæculorum millia, quot folia arbores, quot arenulas maria, quot atomos aër habet. Et post lapsos annos tam innumerabiles, quid erit? Æternitas! nulla sui parte imminuta, & post denuo repetitos tot annorum milliones nihil imminuenda! Arserunt, hucusque damnati: nunc quasi de novo ardere



ardere incipiunt & nunquam ardere cessabunt! O æternitas, quis te comprehendere valeat? quis non timeat?

Imaginare tibi infelicem Cainum unicam omni anno millesimo Lachrymulæ guttulam in inferno fundere. Ergo, cum ultra 5000 annos sit in inferno, fudit hucusque guttas 5. Quantus, quam ineffabilis annorum numerus fluat, donec lachrymæ illius tandem in fluvium excrescant? Donec valles terræ omnes impleant! Donec orbem totum inundent! Donec totum spatium inter terram, & firmamentum lachrymis plenum sit! O DEUS. quantus, quam ineffabilis annorum numerus ad hoc requiritur? Et tamen o Veritas incomprehensibilis, sed tamen tam certa, quam certum est, DEUM mentiri non posse: Et tamen veniret tandem tempus, quo Caini lachrymæ totum hoc spatium immensum replerent: Jino, etsi DEUS omnes has ex lachrymis Caini massas aquarum annihilaret, & Cain flere denuo inciperet, repleretur post annorum, & annorum milliones totum hoc terram inter, & firmamentum spatium rursus, & repleretur centies, millies &c. Et postquam toties esset impletum, æternitas nulla sui parte est imminuta! Est, quasi nunc primo inciperet, & durabit sine fine, sine fine.

2. *Æter-*

2. *Æternitas est sine interruptione & refocillatione.* Exiguum revera esset damnatis commodum, & solatium, si post singulos mille annos modica eis refocillatio concederetur! Imagineris tibi tres damnatos, quorum quisque alia, sed æque gravia tormenta sustinet. Primus, verbi causa, lacui igne sulphureo pleno innatat; secundus ad petram ferreis catenis adstrictus duobus diabolis misere torquetur; tertius itidem ita alligatus, ut movere se nullo modo possit, a duobus immanibus serpentibus toto corpore depascitur. Horum miseretur DEUS, & post singulos mille annos refocillationem illis aliquam indulget, in hoc consistentem, ut ad horam a tormentis, & cruciatibus liberis haustus frigida propinetur: hac vero elapsa, priores iterum pœnæ infligantur. Quantulum esset hoc solatium mille annis pati, & unica hora respirare! Sed nec hoc in inferno conceditur! Semper, & ininterruptum ardere, semper & ininterruptum a DEO odio haberi, a cœlo, & inferno maledici, est essentielle malum, quod patiuntur damnati. Omnia ibi sine auxilio, sine remedio, sine interruptione, sine refocillatione, sine fine! in æternum, in æternum!

A F F E C T U S.

Gratiarum actionis. Nunc o mi DEUS! nunc
intelli-

intelligo, quid sit infernus, quid æternitas! Infernus est locus horrendorum cruciatuum, mœroris, & desperationis extremæ; est locus, quem ego peccatis meis merui, & in quo dudum habitarem, nisi me immensa DEI misericordia servasset! Hæc, o mi, Deus, milles repetam: Cor JESU me amavit, alias jam nunc essem in inferno! Misericordissimus JESUS mihi pepercit: alias hac hora, hoc momento essem in inferno! pretiosus JESU Christi sanguis cœlestem Patrem placavit: alias jam nunc essem in inferno! Hoc canticum laudis Altissimo canam in æternum! Misericordia Domini, quod non sum consumptus. Misericordias Domini in æternum cantabo.

Doloris. Sed quam gratum me infinitæ huic Illius bonitati hucusque exhibui? Post tantum beneficium totum cor meum Illi donare, & Illum solum ardentissime amare debuissim! debuissim in omnibus meis operibus Illius solius honorem, & beneplacitum quærere, omnes adversitates ab Illo mihi immissas hilariter perferre, ut amorem amore compensem: quid enim minus facere poteram pro tam insigni beneficio? An feci? O ingratitude! novum inferno dignam! Te o mi DEUS, corpori, voluptatibus, & creaturis postposui, miserationes Tuas novis peccatis et injuriis

juriis compensavi! O! agnosco malitiam, & ex corde detestor! & utinam satis detestari possem! Miserere mei, o mi JESU, miserere mei! En nunc denuo, sed firmitus, quam unquam statuo...

DIES QUARTA.

MEDITATIO PRIMA

QUI FRUCTUS EX MEDITATIONIBUS HUCUSQUE FACTIS EXCERPI DEBEANT.

Perpendimus hucusque, quæ mala illos maneant, qui finem suum ultimum per peccatum perdunt. Sed quid cognitio hæc proderit, si media non arripiamus quibus nos ab his malis præservare, & finem nostrum certo assequi possimus? Quid ergo facto opus? omnia tibi ob oculos ponam; tu attente singula tecum expende.

P. I. *Primus fructus esse debet, perfecta, & constans detestatio peccatorum hucusque commissorum.* Qualis est nunc conscientia tua? Si hoc momento Angelus de Cœlo descendens tibi diceret: dispone domui tuæ: post horam enim morieris, & coram Tribunali Divino comparebis; quò animo nuncium hoc ferale exciperes? An in hoc, in quo nunc versaris,



versaris, statu auderes mori! An tuæ confessiones hucusque erant tales, ut jure confidere possis, remissa tibi esse peccata tua? An nil est, quod illa hora te angere queat? verbo: an in hoc conscientiaæ tuæ statu mori auderes?


Responde, sed sincere coram DEO! Scito anima mea! primus ad DEUM gressus; primus ad sanctitatem, & quietem animi gradus est, per veram pœnitentiam in eo statu se collocare, ut morte etiam repentina e mundo rapta comparere coram divino Judice auderes? Ad hunc statum ut pervenias, sequentia duo proposita sunt necessaria.

1. *Propositum*: Tempore exercitiorum (si prius factum non est) cum tanta examinis accuratione, tam frequenter repetita cordis contritione, tam magna oris sinceritate confessionem peragere, ut conscientia teste dicere possis: Feci, quæ DEUS ad impetrandam peccatorum veniam postulat, omnia. Nunc faciem Judicis subire non timerem! O quantum solatium, quanta quies animæ, quam certa salutis spes oritur ex tali confessione!

2. *Propositum*: Affecuratus hoc modo de actuali DEI gratia, & futura gloria (quantum nempe homini in hoc mundo possibile est) omnem imposterum confessionem tota vita
cum

cum tanta diligentia peragere, ac si revera foret tibi ultima!

P. II. *Secundus fructus debet esse, ut conemur*
Iustitiæ divinæ satisfacere pro commissis pecca-
tis, quantum possumus. Reflecte te adhuc se-
 mel ad cruciatus inferni, quos considerasti,
 & perpende sequentia! En hoc momento pe-
 netrat hunc carcerem radius divinæ miseri-
 cordiæ, & vox insonat Cainum ita alloquens:
 mille annis arsisisti jam in his flammis; mise-
 rebor nunc tui, sed hac conditione ut rever-
 sus in mundum omnes dolores, morbos, in-
 jurias, adversitates amore mei æquo animo
 perferas; id si facias, remittam tibi peccata
 tua, & salvabo te! O quali gaudio exultaret
 Cainus? responderet certe cum alacritate ma-
 xima: libenter, o infinita bonitas, o immen-
 sa misericordia, libenter, & cum gaudio mil-
 le annis sustinebo, quidquid ullus unquam
 mortalis sustinuit, dummodo veniam obtine-
 re, & in gloriam Tuam tandem intrare me-
 rear! Jam dic anima mea! an non merita
 es, sicut Cainus, detrudi in infernum?
 an hæc gratia, quam tibi contulit DEUS,
 dum tempus pœnitentiæ indulsit, non perin-
 de magna est, quam si te ex inferno extra-
 xisset? Cur ergo non conaris, veram pœni-
 tentiam agere, dignos pœnitentiæ fructus face-
 re, &



re, & per generosam patientiam in adversitatibus illas injurias compensare, quibus eum per peccata tua affecisti? Proposita huc facientia sunt.

1. *Propositum.* Illis mediis, quæ DEUS ad satisfaciendum pro peccatis ordinat, cum omni diligentia, & fervore uti. Præcipua ejusmodi sunt: Sacramentum pœnitentiæ, Sacrificium Missæ, Indulgentiæ, frequentes actus contritionis, mortificationes, & opera pœnalia omnia.

2. *Propositum.* Difficultates statui nostro annexas, & proprias, omnes adversitates, a divina Providentia nobis immixtas, ex puro DEI amore patienter ferre. Quoties talis adversitas ingruit, in tale vel simile suspirium prorumpere: O misericordissime DEUS! terribiles, & æternos in inferno cruciatus merui, & levem hanc, & momentaneam adversitatem ferre recusem?

P. III. *Tertius fructus est*, ut conemur omnia, impostherum venialia peccata serio vitare, præsertim illa, quæ viam sternunt ad mortalia. Non sufficit propositum eligendi prius mortem, quam peccatum grave, sed requiritur etiam propositum serium venialia evitandi. Qui hoc non habet, nunquam securus est. Nil certiore nobis salutis obtinenda

dæ spem instillat, quam continua cura & sollicitudo cavendi a minimis peccatis, & universalis quidam fervor ad omnia vitæ spiritualis exercitia se extendens: fervor in oratione, & conversatione cum DEO, fervor in se vincendo, & mortificando, fervor in humilitate, & obedientia, fervor in abnegatione propriæ voluntatis, in amore DEI, & proximi. Qui ad hunc fervorem aspirat, vel illum in se conservare cupit, debet necessario propositum serium elicere, a sequentibus venialibus se æternum abstinendi: nempe, 1. Nullam malam suspensionem, iudicium vel contemptum proximi in cor admittendi, multo minus retinendi. 2. Non fovendi iram, vel impatientiam. 3. De erroribus & defectibus alienis non loquendi. 4. Non omitendi sua spiritualia ex torpore, vel illa cum deliberata negligentia peragendi. 5. Nullum inordinatum amorem in se fovendi, nullam scienter occasionem dandi impuris phantasiis, & cogitationibus, & si præter opinionem oriantur, illas cito ejiciendi. 6. Sibi ipsi non vane complacendi, vel alios contemnendi. 7. SS. Sacramenta nunquam tepide, vel sine debita, & seria præparatione sumendi. 8. Adversitates undecunque advenientes non cum impatientia, & murmure, sed tanquam

G


a DEO



a DEO in bonum nostrum immittas æquo animo perferendi. 9. Nunquam coram illis, quorum interest scire, suas inclinationes, defectus, mortificationes &c. occultandi, vel se alium simulandi. Anima mea; ecce stamus in conspectu DEI: ego, dum hæc scribo, & tu, dum legis! Ego de doctrinis hic tibi traditis, & tu de obedientia, vel inobedientia præstita rationem dabimus. In hujus ergo DEI nostri conspectu tibi dico: si non serio statuis ab his te venialibus abstinendi, nec minimum ex his exercitiis fructum capies: nunquam vel infimum perfectionis gradum ascendes, nunquam ad quietem animi, nunquam ad eum statum pervenies, ut mortem sine timore expectare possis. Si autem ad hæc serio vitanda te resolvīs, procide in genua, stringe manibus Crucifixum, & illi tua proposita offer:

Deus meus! Amor meus Crucifixus! Christe JESU! Per Tuam misericordiam illuminatus nunc agnosco, quid sit, Te possidere in æternum, & Te in æternum privari! O me felicem, si Te invenero! Si perdidero, infelicissimum! Agnosco, quod illud sperare nunquam possim, & hoc timere semper debeam, quamdiu me totum Tibi non tradidero, minima peccata cane pejus & angue fugere, & Tibi cum fervore servire non incepero!

Sit ergo




Sit ergo: Te, o mi JESU, summum bonum, & super Cœlum, & terram, Angelos & homines amari dignissimum amo ex intimo corde, & amare Te opto, sicut Seraphini Te amant! Ad Te o mi JESU, tanquam finem meum ultimum, unicam meam felicitatem, & omnium desideriorum meorum metam suspiro te amplecti, & quidem in æternum desidero, & volo, quidquid constet, Coram conspectu ergo Tuo firmissime statuo hæc proposita inviolabiliter. & constanter observare, & ab illis nunquam recedere. O mi JESU! per vulnera Tua, per sanguinem pretiosissimum Te obtestor, corrobora infirmitatem meam, & da gratias efficaces, ut in his propositis, quæ Tibi humillime per manus Beatissimæ Virginis Mariæ, Matris Tuæ offero, constans, & immobilis perseverem!

MEDITATIO SECUNDA.

DE REGNO CHRISTI.

Cum hac meditatione incipit secunda exercitiorum hebdomas, seu via illuminativa. Finis hujus hebdomadis est sequens. In prima hebdomade deshevimus peccata nostra, & statuimus imposterum ex corde DEUM amare, & totis viribus finem nostrum ultimum



attingere; quoniam vero cæci sumus, & viam ignoramus. quâ securi eo pertingere possimus dedit nobis Pater æternus Filium suum unigenitum Ducem, qui nobis viam ostendat, & exemplum, quod sequi debeamus. Finis ergo hujus hebdomadis est feria resolutio Christum sequendi.

P. I. *Christum sequi est æquum.* Dux causæ hanc æquitatem clare tibi ante oculos ponent. Considera illas bene. *Prima causa est finis, ob quem Christus in hunc mundum venit.* Quam malo in statu fuisset mundus, si Christus non venisset? Primi nostri Parentes lapsi sunt, & propterea tam illi, quam nos jure ad Cælum privati sumus: Ex tot mille hominum millionibus, ab initio usque ad finem mundi nec unicus salvari, & intrare Cælum potuisset! Quanta nostra infelicitas, & miseria? Quemadmodum nullus salvari, & intrare Cælum, ita nullus DEUM laudare, & glorificare in æternum potuisset! Quanta gloriæ DEI externæ jactura! Postquam autem Christus venit, omnibus reſeratum est Cælum, portæ patent, dummodo Illum sequi velimus: in Cælo jam actu nunc sunt innumerabiles Sanctorum turbæ nomen DEI in æternum laudantium, & glorificantium! An ullus esse potest sublimior finis, quam æterna DEI gloria, æterna hominum felicitas?

Secun-

Secunda causa sunt conditiones, sub quibus nos ad sui sequelam invitat. Reges hujus mundi in palatiis suis resident, & si quis durior labor suscipiendus, si quæ exhauriendæ sunt difficultates, vel subeunda pericula, non id per se, sed per famulos suos, aut subditos faciunt. Longe aliter res se habet cum Christo; nolo, ait Ille, ut qui me sequuntur, viliori, quam ego, vestitu, habitatione, victu utantur. Nolo, ut plus laborent, plus patiantur, quam Ego. Nolo, ut illi in quocunque opere primi sint; ego semper, & ubique præcedam, & aliud non desidero, quam ut me sequantur. Quam miræ hæ conditiones? JESUS est innocens: ego tot peccatorum reus; JESUS est supremus Dominus, ego cinis & vermis! Tuum est Cælum o JESU! omni jure, ego infernum mereor. Et tamen Tu non vis, ut plus, quam Tu, laborem, aut patiar? hoc solum a me desideras, ut te præeuntem sequar!

A F F E C T U S.

Gratiarum actionis. O mi JESU! si, dum ad Tui sequelam me invitas, alium finem non haberes, quam gloriam & honorem Patris Tui Cælestis, satis jam obligatus essem ad obediendum Tibi: Ille enim est supremus Dominus, summum bonum: pro Illius honore tenerer sanguinem meum fundere. Sed præter glo-

ter gloriam Patris Tui habes & alium finem, salutem æternam animæ meæ! Invitas me ad Tui sequelam, ut æquali Tecum gloria, æquali felicitate in Cœlo fruar! O quantas Tibi laudes, & gratias, quantam gratitudinem debeo!

Propositi. Statutum est o mi JESU! cum in hoc firam esse gloriam tui SS. Nominis, & salutem animæ meæ cognoscam, volo Te sequi, volo sequi, quantum possum, perfectissime, volo sequi, quomodocunque naturæ meæ difficile accadat! Ego sum creatura peccatorum plurimorum rea, creatura a Te ex nihilo extracta, inferni pœnis dignissima, quomodo agere & pati renuam, quæ Te, Cœli, terræque Dominum, Sanctitatem essentialem, Redemptorem, & DEUM meum agentem vel patientem video? Absit a me, o JESU, tanta insania! Tua vita erit norma vitæ meæ, sicut videro, quod Tu ambulaveris, sic & non aliter ego ambulabo!


P. II. *Christum sequi est facile:* duo sunt, quæ hanc Christi sequelam facilem reddunt. Perpendamus utrumque, *Primum, quod sequelam Christi facilem reddit, est interna quies animi, gaudium, & consolatio, quæ Christus etiam in hoc mundo sequentes se remuneratur.* Nec Christus in terris conversans meras cru-

ces,

ces, & afflictiones habuit: habuit etiam suas consolationes. In sua Nativitate homines quidem in stabulum illum confugere coegerunt; sed descenderunt de Cœlo Angeli, & gloriam Illius Mundo annuntiarunt. In deserto malus dæmon illum tentare ausus est: sed Angeli accedentes ministrabant ei: Blasphemabatur, & convitiis onerabatur, dum prædicabat; sed in monte Thabor gloria circumdatus apparuit. De torrente enim illo voluptatum, quo per visionem DEI intuitivam singulis vitæ suæ momentis perfundebatur, dicere, supervacaneum judico. Si ergo vita Christi in terris non semper cum adversis conflictabatur: nec tua conflictabitur. Hanc enim conditionem aperte addit: Nolo, ut plus quam ego, patiantur. Imo, quo accuratius & perfectius Christum sequeris, eo pluribus consolationibus perfrueris. Audi clara Illius verba, fallere nescia: Jugum meum suave est, & onus meum leve. Prope JESUM esse, semper dulce est, etiam in medio adversitatum: procul esse a JESU, etiam in mediis voluptatibus, semper amarum. Certe, si vel guttula consolationis de Cœlo decedit, cadit in cor hominis, Christum fideliter sequentis.

2. Quod facilem reddit Christi sequelam est gloria, & felicitas immensa, qua in altero


mun-



mundo se sequentes remuneratur. Post aliquot annos ero in Cœlis! quam dulcis est hæc cogitatio, & quam tolerabiles reddit omnes misérias! Imaginare tibi, ac si adstaret lateri tuo Christus gravi cruce onustus, & benignis te oculis intueretur: imaginare tibi, ac si eodem tempore Cœli coram oculis tuis aperirentur, & ostenderetur tibi in illo elevatus supra multos Electorum milliones thronus tantæ pulchritudinis, quantam nullus unquam oculus vidit, & ac si dein Christus te ita alloqueretur: En! thronus iste tibi paratur; tu illum occupabis, si paucis annis me secutus fueris. Anima mea! si tale ex ore Christi promissum audires, an non cum gaudio Illum sequereris? an te non consolaretur, & faciles redderet labores tuos omnes? Sed quare sola fides id non efficit, quod efficeret talis visio? Fides utique te docet, manere te, si Christum sequaris, regnum Cœlestè, æternum, omnibus voluptatibus, & deliciis affluens!

A F F E C T U S.

Fiduciæ. Credo, o mi JESU jugum Tuum suave esse, & onus leve: hoc enim effatum ex ore Tuo processit, qui es æterna veritas, fallere nescia! Quod mihi difficilem reddit Tui sequelam, est solus amor proprius, & mea pusillanimitas, O si serio me vincere, &


 vestigiis Tuis insistere vellem, quam cito veritatem promissi Tui experirer! Et revera, quam miseram & tristem vitam ducere videbantur illi, qui olim eremum, & horridos specus incoluerunt? Et tamen quantis deliciis corda illorum affluebant? quam tristem vitam agere videbantur tot alii, qui maximam vitæ partem inter persecutiones, injurias, contemptus, adversitates exegerunt? Et tamen an non ii ipsi erant, qui DEO intima familiaritate conjuncti, tantis ab Illo consolationibus cumulati sunt, ut præ gaudio vix capere se possent? An me solum, si Illum fideliter sequar, sine solatio relinquet? Ah non me relinques, o JESU! spero & confido in Tua misericordia! hæc facilem mihi reddet Tui sequelam! Hac spe fretus propono..

P. III. *Christum sequi est necessarium.* Si ut spero, seriam voluntatem habes, perfectionem attingendi, summe necessarium est, ut Christum, quantum est possibile, sequaris, & quidem in omnibus. Si vis perfectus esse, ait Christus ad illum Juvenem in Evangelio, veni, sequere me. An credis hanc veritatem? Fides, & cognitio tibi non deest, sed via aspera, qua Christus ambulabat, te deterret. Sed quacunque via Christum sequi necessarium est. Nam



1. *Christus est infinite sapiens, & verax.* Christus venit in hunc mundum, ut tibi viam ad Sanctitatem ostendat; An negare hoc potes? Jam audi: si securior, & melior esset ad Sanctitatem via, quam illa, quam ipse nos docuit, nec esset infinite sapiens, quia illam non scivisset; nec infinite verax, quia illam nobis non indicasset. Sed quis hæc sine blasphemia vel cogitare audeat?


2. *Christus est infinite bonus.* Ille amat homines, & non vult illos sine causa cruciare, affligere, & onerare; quid inde sequitur? si amæniores, ac faciliorem ad Sanctitatem, & finem nostrum ultimum consequendum viam, & simul perinde aptam, ac securam, quam est illa aspera, novisset, illius in nos amor non admisisset, ut tam arduam nobis, præ facili designaret. Sed enim novit DEUS nostri amantissimus, mille periculis obnoxiam esse viam amænam, & ad interitum deducere: ideo asperam ostendit, ideo eadem ipse ambulavit, ideo invitat etiam nos, ad se in illa sequendum. Siste hic modicum, anima mea, & te ipsam sic alloquere: Duo tantum pro me sunt loca, unus infelicissimus, & miserrimus, nempe infernus, alter felicissimus, & amænissimus, Cælum.
Ad

Ad hæc duo loca duæ tantum ducunt viæ:
lata, & commoda, & amœna, qua plerique
mortalium ambulant, ducit ad infernum: an-
gusta, & aspera, qua Christus cum paucis
Electis ambulat, ducit ad Cœlum. Hæc est
veritas, quam Christus ipse docuit. Nemo
venit ad Patrem, nisi per me, id est: ne-
mo pervenit ad Cœlum, nisi hac via qua
ego ambulavi! Quid ergo ego faciam? quam
viam eligam?

A F F E C T U S

Doloris. O mi JESU! quam parum sola-
tii invenio, dum vitam meam hucusque
actam considero? Adoravi Te quidem hacten-
us ut DEUM, secutus non fui! illas vir-
tutes, quas tu jugum suave, & onus leve
vocas, nimis duras, & infirmitati meæ insup-
portabiles judicavi! injurius per hoc fui Tuæ
sapientiæ & bonitati; illam quodammodo ar-
gui, ac si nesciret, quantum ferre possem,
hanc vero, ac si imponere mihi nimium
vellet! O mi JESU! Dux, & Magister meus!
agnosco errorem, & malitiam meam, eam-
que ex corde detestor! O quam Beatus, &
felix essem, si semper secundum spiritum Tuum,
& hac via, qua Tu ambulasti ambulassem!

Oblationis sui ipsius. Tu es via, veritas &
vita, o mi JESU! Tibi me nunc totum ex corde
tra-



trado, volo vestigiis Tuis insistere, volo ambulare eadem via, qua Te ambulasse videro. Præcede me mi JESU! & ducem Te mihi exhibe! Si deduxeris per viam dolorum, & adversitatum, Te sequar; si per ignominias, & contemptus, Te sequar; si per subjectiones humiliactiones & annihilationem propriæ voluntatis; Te sequar. Ubi Tu es, volo esse & ego! Quod Tu facies, volo & ego facere! quod Tu pateris, volo & ego pati! Hoc unum Te rogo, auxilium Tuum, & gratias efficaces, mihi suppedita.

MEDITATIO TERTIA.

DE

*INCARNATIONE, NATIVITATE CHRISTI ET
MIRA IN HIS MYSTERIIS HUMILITATE.*

1. **P.** *Christus in sua Incarnatione, ET Nativitate se exinanivit totaliter. Aliquantum hujus exinanitionis circumstantias attente perpende.*

Primo. exinanivit se assumendo naturam humanam. Ut quanta sit hæc, & quam mira exinanitio, vel modicum concipias, rem in similitudine aliqua considera Finge tibi animo Regem quemdam hujus mundi sapientissimum, ditissimum, potentissimum, & omnibus

bus talentis, Principem talem decentibus, instructissimum, qui a Nobilitate, ab exercitu, a toto populo ut Pater amatur: & cui ad felicitatem omnino nihil deest. Hic Monarcha ponit purpuram, regno & terris suis excedit, vilissimo indutus amictu, suam operam alieno in regno locat rustico, & his in obsequiis usque ad mortem ignotus delitescit. Quis hujus Regis annihilationem mirari satis queat! Anima mea! vivam fidem a te exigo, & interrogo: quis est amabilis ille Pusio in Stabulo Bethleemitico? est unigenitus filius Patris Cœlestis, Dominus Exercituum, DEUS Cœli & terræ! Hic non obstante sua altitudine, & felicitate Cœlum deseruit, ubi ab omnibus Angelis adorabatur, & glorificabatur, terram pro habitatione sua elegit, homo factus, & usque ad mortem ignotus delituit. An majorem sui ipsius exinanitionem vel finire sibi quis posset?

Secundo: Exinanivit se assumendo naturam humanam in statu Infantis! Quid est miserius, & contemptibilius infante? Nec incedere, nec ulli suæ necessitati consulere valens, alienis ad omnia manibus eget! Taceo impotentiam loquendi, vel aliis indicandi suos seu dolores, seu necessitates &c. Omnia hæc singulis alioqui nota sunt. Hanc communem omnibus
miseriam



miseriam nos facilius tulimus, eo quod ratione uti non potuimus: sed Christus, qui erat sapientia increata, totum pondus suæ hujus humiliationis & miseriæ persensit. Poterat in mundum venire in statu Viri, noluit: in statu pusionis voluit, ut eo perfectiorem sui exinanitionem exerceret!

Tertio Exinanivit se assumendo naturam, & simul occultando omnes suas tam divinas, quam humanas perfectiones. Nil desidero hic aliud, quam ut divinum Pusionem in præsepi intuearis. En! hic jacet ille DEUS Omnipotens, qui Cælum terramque condidit, & nec stare, nec incedere potest. Hic jacet fortissimus Ille, qui tribus digitis totum orbem appendit, & est debilissimus. Hic jacet ditissimus Ille, a quo omnes Principes, quidquid possident, habent, & Ille ipse non habet aliud diversorium, quam immundum stabulum? O Exinanitionem Redemptoris mei stupendam!

A F F E C T U S.


Confusionis sui ipsius. O Humillime JESU! Quam diversa a tuis sunt mea desideria! Tu Teipsum humilias & ex humilitate in terram descendis! ego me ipsum exalto, & cum Lucifero supra astra ascendere volo: Tu Te ipsum usque ad statum contemptibilis Infantis depri-

deprimis, & ego inhio statui, qui coram hominum oculis dignior, & excelsior esse videtur! Tu occultas omnes Tuas perfectiones, ut declines laudes hominum, & ego, ut lauder, omne quod in me est vel a me fit bonum, in lucem profero. Verbo: omnes Tuæ cogitationes tendunt ad humilitationem & exinanitionem Tui, & omnes meæ tendunt ad mei exaltationem! Vere fateri cogor o mi JESU! me de Tuo spiritu adhuc habere nihil, & mea sensa a Tuis distare magis, quam Cælum a terra!

Doloris. Intelligo o mi JESU! video me errasse: non enim hæc via est, qua tu ambulasti! Doleo itaque & pœnitet me omnium vanarum cogitationum, desideriorum, complacentiarum, quas unquam admisi! omnium vanorum sermonum, & operum, quæ ex impulsu vanæ gloriæ suscepi! Tibi soli competit omnis honor & gloria, Tibi tanquam fonti omnis boni illam restituo. Imposterum solam humiliationem secundum doctrinam, & exemplum Tuum amabo, & amplectar.

P. II. *Christus in sua incarnatione, Nativitate, & vita reliqua humilitationes, & exinanitiones libenter ab aliis accepit. Nam considera:*

I. Quomodo Mundus Christum in sua nativi-



nativitate recepit? Major homini injuria vix fieri potest, quam si ab omnibus concivibus ejecto, in propria Patria, in tota urbe hospitium vel ad unicam noctem denegetur! Ita Christo accidit. Omnes reliqui, cujuscunque conditionis homines receptaculum aliquod in urbe invenerunt, solus JESUS cum Matre ubique exclusus nasci in stabulo debet: Quomodo hanc injuriam tulit JESUS? cum gaudio: quin id ipsum voluit. Nam si aliud voluisset, potuisset utique Angelorum exercitum præmittere, qui suum civibus adventum annuntient: potuisset suo in urbem ingressu aut valido terræ motu, aut excussis e nube fulminibus reverentiam, & suæ Majestatis adorationem a civibus extorquere. Nil ejusmodi fecit, ut occasionem nancisceretur, humiliationes & injurias perferendi.

2. *Quomodo Mundus Christum post nativitatem tractavit?* Deterius, quam in ipsa nativitate. Apparuit in Cœlo stella nova, reges ex Oriente venerunt nativitatem salvatoris nuntiantes. Nunc tota Jerusalem accurret ad adorandum JESUM. O ingratitude[m] populi incredibilem! e tot millibus incolarum ne unicus quidem vel pedem movit, ut JESUM quæreret & adoraret! Ino de illo mature tollendo e medio consultabatur: cædes, & dies cædis statuebatur:

ut

ut mortem violentam effugiat, JESUS par-
vulus profugere e Patria debebat!

3. *Quem sensum, quam existimationem de JE-
SU adulto mundus habuit?* Eandem quam
prius. JESUS habitavit in Nazareth cum Ma-
tre sua: labore manuum vel domi, vel extra
domum occupabatur, & panem sibi suum cum
Nutritio in sudore vultus sui comparabat. Ne-
mini incidit, posse sub forma & statu Opifi-
cis incarnatum DEI Filium delitescere: Pater
cœlestis occultavit Mysterium, nec ullo signo
manifestavit, hunc esse Filium suum dilectum.
Maria & Josephus tacebant, nec ulli mortaliū
communicarunt, quæ sciebant. JESUS ipse co-
ram oculis hominum, omnes suæ Divinita-
tis & humanitatis thesauros abscondebat. Hinc
factum est, ut nulli de illo aliquid aliud con-
staret, quam esse in Nazareth juvenem, JE-
SUM nomine, Fabri filium, qui Patrem suum
in labore manuum fideliter adjuvaret. En ani-
ma mea! hæc est illa magna laus, quam
incarnatus DEI Filius per triginta annos a mun-
do retulit, nempe, quod ille, qui terram, &
cœlum creavit, bonus faber lignarius esset.

A F F E C T U S.

Contemptus sui ipsius. O quam exosa Tibi exi-
stimatio hominum, quanto contra in pretio
vilipensio, & contemptus fuit! Quanta Tu fa-
cere




cere potuisses, si laudari appetiisses, & quæ fecisti, ut non honoreris? Quam facile per operationem miraculorum obtinere potuisses, ut totus mundus te adoraret? tu contra ut honores mundi evites, omnes Tuas perfectiones sub forma opificis occultasti. Quam amara mihi est hæc veritas! Tu fugis honorem, ego contemptum! quæris latere, ego nosci & æstimari! Tu gaudes contemptu, ego laude! O JESU! quam male mecum agitur! Si spiritus Tuus vera est ad sanctitatem via, meus est via ad perditionem, si Tua humilitas est clavis ad Cælum, mea superbia est clavis ad infernum!

Desiderii humilitatis. Quod meam superbiam adhuc magis detegit, est: Ego longe majore honore afficior, quam Tu affectus es: & tamen non sum contentus. Me honorat mundus propter statum religiosum, in quo versor, & mecum reverenter agit: Te contra, ut opificem merum, qualis apparebas, nemo attentione dignum censuit! Væ mihi! ego magis æstimari cupio, quam Salvator meus æstimatus sit! Agnosco, o mi JESU! quam hoc sit absurdum, & tamen juvare me non possum! Altas nimis radices in corde meo egit cupiditas honoris, & contemptus timor! Tuus honor o mi JESU, beneplacitum Patris Tui cœlestis,
pro-

progressus in via virtutis, & Sanctitatis, omnia his monstris cedunt! Vulnus hoc sanare præter Te nemo potest. O igitur --

P. III. *Reflexiones super hac Christi humilitate.* utpote super re in vita spiritali gravissima. Pete lumen a DEO anima mea, & sequentia bene tecum expende,

1. *Reflexio.* Nihil DEO magis placet in anima hominis, quam amor contemptus, & vilipensionis. Quid si ante Christum vixissemus, & Pater æternus, ut superbiam nostram nobis ob oculos ponat, interrogasset nos, quali modo Filium suum mittere in hunc mundum debeat, quid respondiissemus? Haud dubie dixissemus: Nutritium oportet esse Monarcham, Matrem Reginam, Habitationem palatium splendidissimum: Angeli annuntient, homines congregentur undique, & neonatum Salvatorem adorent: Ille ipse vero sine mora sapientiam, & Majestatem suam ubique manifestet, thronum conscendat, & toti mundo cum absoluta potestate dominetur. Hæc cogitassimus forsitan nos! sed quid cogitat, & facit Pater cœlestis! Mater Filii mei unigeniti, ait ille, sit Virgo paupercula, stabulum habitatio, lectus sænum; non dominetur, sed obediat, delitescat in officina, & opprobria inter, & injurias vivat, & moriatur! Quam cæci eris



sumus nos! Nos nihil magis æstimamus, quam laudem, honores, hominum existimationem. Pater æternus vero contemptum & vilipensionem. Intuere JESUM! quid vides in illo præter humiliationes, opprobria, & injurias? & hæc erant illa sacrificia, in quibus sibi Pater cœlestis ita complacuit, & quæ salutem mundi operata sunt!

2. *Reflexio.* Nihil DEO ita displicet in anima, quam amor honoris, laudis, & existimationis hominum. Quo minus anima cum JESU Christo conformitatis habet, eo magis displicet Patri cœlesti. Jam: qualem conformitatem habere potest cum JESU Christo anima, quæ laudem & existimationem hominum appetit? JESUS nil quærebat, nisi exinanitionem sui, nil desiderabat, nisi contemptum, non delectabatur nisi injuriis: vita JESU cœpit, & finiit in opprobriis! Compara te cum JESU, & vide, quid inter Illum, & te similitudinis intercedat!

A F F E C T U S.

Agnitionis, & doloris. Flere hic magis, quam loqui libet, o mi JESU! meum cor tam parum habet similitudinis cum Tuo, quam habet Sanctus cum damnato. In corde Tuo nihil, nisi abominatio vanæ gloriæ, & desiderium contemptus: in meo nil, nisi complacentia oblaudem

laudem hominum, & abominatio contemptus! Miseria mea per hoc adhuc augetur, quod ipsa mihi medicina noceat! Medium enim optimum eradicandi meam superbiam, esset contemptus hominum, confusiones &c. Sed ego miser amo morbum, & respuo medicinam, defendo superbiam, & humilitatem fugio. O Humillime JESU! An juvari potero? omnem mei ipsius æstimationem, hucusque de me conceptam, omnia vana desideria, complacentias de hominum laudibus, omnia opera quæ propter homines, & propter vanam gloriam feci, ex corde abominor, & damno; Tibi soli, o origo omnis boni! honor, & gloria, mihi autem peccatori confusio, & contemptus!

Propositi, & implorationis gratiæ. O mi JESU! si unquam instanter a Te aliquid petii, hodie humilitatem a Te instanter peto. Rem æquam peto, scio: humilitas enim est virtus spiritus tui characteristica: est clavis ad intimam Tecum unionem, & porta Paradisi. O quantum conari, & laborare me oportet, ut hanc mihi virtutem implantem! hæc duo o mi JESU! firmiter statuo. 1. Nunquam vanam complacentiam admittam, numquam in laudem meam vel verbum proferam, nunquam vel minimum ex vana gloria operabor. 2. Omnem
mei



mei vilipensionem, & contemptum undecunque mihi advenientem patienter feram! sed, o mi JESU! quam facile est, facere proposita, quam difficile, illa servare? Tu o mi JESU! unica spes mea, unicum refugium, Tu fortitudo mea; & ad Te humi prostratus recurro.

DIES QUINTA.

MEDITATIO PRIMA.


DE VITA CHRISTI PRIVATA, & ADMIRABILI
EIUS OBEDIENTIA.

I. **P** Omnes difficultates, quæ cum perfecta obedientia connexæ sunt, Christus amore cælestis Patris sui, propter me superavit. Propria voluntate & libertate sua se abdicare, & ad mortem usque ex aliorum arbitrio vivere, res est multis, & magnis difficultatibus obnoxia. Sed omnes hæ difficultates sunt effectus Divinæ Providentiæ, & omnes, has propter te Christus exhaust.

1. *Difficultas, cum perfecta obedientia connexa oritur ex officiis & muneribus, quæ obedientia imponit.* Nos putamus interdum nimis vilia esse, & abiecta, quæ nobis imponuntur officia; illos qui nobis præferuntur, minori-
bus

bus talentis esse præditos: nos vero possidere dotes omnes requisitas: Quid? officium est nimis abjectum? intueri JESUM! quis est ille? Rex Regum, & Dominus Dominantium, Cæli, terræque Dominus! quibus instructus est dotibus? Sapientiæ est infinitæ, qua omnes homines sine labore ad cognitionem suæ Deitatis adducere posset! Potentiæ tantæ, ut orbem terrarum stupendis miraculis replere; eloquentiæ tam efficacis, ut totum mundum convertere posset! Hic tamen talis & tantus Dominus, quali officiô fungitur? audi & obstupesci! Ad viginti circiter annos fabri lignarii vices obit, & nutritio suo in abjectissimis muniis subditus est! Intra in Ejus officinam, considera Divinum opificem, & tunc, si erubescere non metuis, de vili tuo officio querulare!

2. *Difficultas cum obedientia connexa oritur a Superioribus, qui nos regunt.* Certum est intra viginti vel triginta annos, quos in religione agimus, interdum nobis Superiores obtinere, quorum regimen nobis grave est. Deest huic interdum spiritus discretionis, & ars, quemlibet secundum suum genium tractandi; illi paternus amor, & cura subditorum; alteri mansuetudo & affabilitas, quæ animos in se subditorum rapere, & alleviare maxima onera potest. Qui vult esse vere obediens debet



debet habere animum omnibus his difficultatibus superiorem. Exemplo sit JESUS! En stat coram tribunali Pilati, & hic fert in Eum sententiam mortis; quid conslitisset Christo, si se ab hac liberare voluisset? ille poterat hujus sententiæ injustitiam toti mundo palpabilem ob oculos ponere, poterat Pilatum ex tribunali in abyssum inferni præcipitare, poterat, ut alias fecit, invisibilis per medios hostes transire, & sic illorum manus effugere. Non voluit: acceptat sententiam mortis a Pilato prolatam, ac si ex ore Patris sui cælestis prodiiisset: obedit illi, usque ad mortem & quidem mortem crucis. Quis est jam, qui querulari contra superiores audeat, postquam Christus injustissimis terræ judicibus sine ulla contradictione obedit?

3. *Difficultas cum obedientia connexa oritur ex ipsa obedientiæ natura Et essentia.* In statu religioso præcipiuntur multa, quæ judicio nostro & voluntati repugnant, & quæ nobis non necessaria, non utilia esse videntur: præcipiuntur multa, quæ inclinationi nostræ naturali adversantur, & quæ revera difficilia in se sunt, præsertim, si diuturna sint vel ad mortem usque continuanda. Verum quid Christus pro & propter te fecit? an erat facile viginti annos in officina exigere, & e

nuti-

nutibus alicuius fabri pendere? an erat facile, per tres annos circuire vicos, oppida & totam regionem, & prædicare inter continuas calumnias, injurias, persecutiones & insidias? an erat facile sententiam mortis iniquissimam, crudelissimam excipere, & in crucis patibulo mori? In omnibus his obediuit JESUS sine contradictione, sine mora, sine impatientia, cum perfectissima subjectione! Ah quid est nostra qualiscunque obedientia, si cum obedientia JESU Christi comparetur?

A F F E C T U S.

Humiliationis. Quocunque in puncto me considerem, nihil in me boni invenio, quod perfectum esset, & Tecum, o mi JESU tanquam exemplo sanctitatis concordaret! Ego deberem voluntatem meam exuere, in meis Superioribus Te ducem meum viva fide considerare, illorum nutibus intendere, illorum mandata non solum graviter non ferre, sed cum alacritate, & gaudio implere: hoc enim postulat votum a me factum, & exemplum a Te mihi datum. Quomodo vero me hactenus gessi? O Bone JESU, tu nosti, quot peccata, & defectus per judicii mei pertinaciam, per repugnantiam voluntatis, per murmura, querelas per executiones mandatorum non perfectas commiserim? An hæc peccata rationem dandam

ante



ante tribunal Tuum non facient plus quam difficilem, etsi alia nulla adferrem?

Doloris. Agnosco perfidiam meam, detestor: o quam magna sunt in oculis Tuis hæc peccata, quæ mihi parva videbantur! quemadmodum ego obedientiam non hominibus, sed Tibi DEO meo Optimo Maximo vovi, ita per inobedientiam meam non homines sed Te, Tuamque, supremam Majestatem offendi! Quoties Superiorum judicio meum prætuli, toties infinitam Tuam sapientiam contempsit: quoties voluntati superiorum restiti, Tuo in me Dominio me opposui: quoties corde, vel ore superiorum de me dispositiones vituperavi, toties vituperavi dispositiones infiniti Tui amoris, & bonitatis. Qui vos audit, me audit, qui vos contemnit, me contemnit: effata Tua sunt, o JESU! & ex his verbis agnosco meam in inobedientia temeritatem! o quam cæcus hucusque fui, quam parum agnovi peccati inobedientiæ temeritatem! sed nunc agnosco & ex corde detestor.

P. II. *Mira animæ felicitas, quæ cæcæ & perfectæ obedientiæ studet.* Visa JESU Christi obedientia, perpende fructus dulces, quos hæc virtus producit!

1. *Felicitas.* Homo obediens scit omni momento, quod voluntatem DEI faciat. Imaginare tibi S. Angelum tuum, qui aliis invisibiliter ad-

stat,

stat, ex speciali DEI favore diu noctuque tecum
 conversari visibilem, tibi que in omnibus cir-
 cumstantiis indicare, quid DEUS a te postu-
 let, quid Illi in te placeat, & displiceat! an
 major esse felicitas posset? anima mea! an
 habes fidem vivam? en! si cæce obedias, tam certa es
 singulis momentis de voluntate & beneplaci-
 to DEI, ac si Angelus tibi comparens in-
 dicaret: tam certa es de DEI voluntate quam
 fuit certus Christus in Nazareth, vel Aposto-
 li dum ex ipso Christi ore omnia perciperent!

2. *Felicitas. Operibus obedientis animæ,
 accedit ex obedientia pretium coram oculis
 DEI maximum.* Admirabile est obedientiæ
 pretium; levissima enim opera coram DEO
 sunt pretiosa, si ex obedientia suscipiantur;
 evanescent vero maxima opera contra o-
 bedientiam facta. Ex obedientia lavare
 lances majus coram DEO opus est, quam
 contra obedientiam percurrere oppida, &
 prædicare: Ex obedientia comedere, & bi-
 bere opus magnum est coram DEO: con-
 tra obedientiam in pane & aqua per to-
 tum annum jejunare, nihil. Unica regula
 ex qua præstantiam alicujus operis colli-
 gere debemus, est voluntas DEI: si DEUS
 aliquod opus vult, tam magnum, quamvis
 alias vilissimum sit, evadit, ut nec homo
 nec



nec Angelus, nec ipse DEI Filius operari majus possit. Redi mente in officinam S. Josephi & intueri JESUM! En! vilis hic labor, quem peragit, tantus est coram DEO, ut ipse Incarnatus DEUS, cum omni sua Sapientia, & omnipotentia sublimius, & perfectius agere nihil queat! causa est: quia hæc est voluntas Patris æterni!

3. *Felicitas. Obediens infallibiliter, & cito ad perfectionem pertingit.* Dux hujus afferti sunt causæ. Prima est ipsa essentia perfectionis & sanctitatis. Nam Sanctum esse nihil est aliud, quam voluntatem DEI implere, & vivere ad illius beneplacitum. Obediens nihil desiderat, nihil quærit, nihil facit, nisi, quod vult DEUS: surgit, & decumbit, quando vult DEUS; laborat, & orat, quando vult DEUS, facit singulis momentis, quæ, & quando vult DEUS; consequenter debet fieri & fiet cito sanctus.

2. Causa est directio & manuductio DEI. DEUS amat obedientem, portat illum in sinu suæ providentiæ, sicut prolem in ulnis Mater: dirigit, & manuducit illum, & omnia ad illum spectantia curat. Insurgat contra illum mundus & infernus totus; conentur illum homines, ipsi ejus superiores opprimere; incassum cadent omnia; Obediens est


est sub protectione infinite sapientis, boni, & omnipotentis DEI; hic illum in hoc mundo infallibiliter ad illum sanctitatis gradum, in altero vero ad illum gloriæ gradum deducet, quem illi ab æterno præordinavit.

A F F E C T U S.

Fidei. Ita est, Superiores præsumt, præcipiunt non sua, sed JESU Christi auctoritate.

Quæcunque mecum & de me disponunt, æqui, bonique consulere, & exequi debeo: non quia illorum hæc voluntas, sed quia voluntas Christi est; Verba Christi clara sunt, & omne dubium excludentia: Qui vos audit, me audit. Huic Tuo effato, mi JESU! judicium meum libens submitto, credo, voluntatem & dispositionem Superiorum meorum Tuam esse voluntatem, & dispositionem: credo quod illorum me directioni subtrahere non possim, quin me simul subtraham dispositioni providentiæ Tuæ... Ita o mi JESU firmiter credo & credo propter Te revelantem veracissimum.

Spei & fiducia. Quam viva est hæc fides mea, tam magna o JESU, est spes & fiducia mea, ego. Tibi vovi obedientiam, voluntatem & libertatem meam omnem obtuli, Tu oblationem hanc meam suscepisti, & per Superiores me meos regere, & dirigere promissisti: & ideo me in sinum Tuæ providentiæ securus



securus projicio. Tu es infinite sapiens & scis, quæ Superiorum dispositiones mihi sint maxime utiles, Tu qua infinite bonus facis, ut Superiores utilissima de me disponant; qua fidelissimus hæc facere promisisti: in Te ergo spero o mi JESU, & confido. Per directionem Tuam Superiores de me & mecum disponent semper ea, quæ salutis meæ sunt maxime proficua, per directionem Tuam denique ad illum thronum gloriæ pertingam quem Tu mihi ab æterno statuisti.

Amoris Et oblationis. Hac spe fretus prosterno me coram Te, & me Tibi totum sine ulla exceptione denuo offero! voveo Tibi nunc iterum Obedientiam, & omnem voluntatem, intellectum, libertatem ex integro illis trado, quos Tu mihi Superiores constitueris: Intellectus meus impofterum erit cæcus, vocem Superiorum tanquam tuam o JESU! vocem audiam, & sine mora, sine indagatione ulla sequar: voluntatem illorum, tanquam Tuam considerabo, & impigre implebo: libertate me mea ita abdicō, ut statuam, me totum Tuæ per Superiores dispositioni relinquere, nihil petere, nihil recusare, nihil desiderare. Hoc est illud sacrificium, quod hodie Tibi offero & ex puro amore offero, quia Tu unicum, & summum bonum meum es, quod




quod amare in terris perfectissime, & possidere in Cœlo in æternum desidero. O JESU conserva & conforta hanc meam voluntatem!

MEDITATIO SECUNDA.

*DE VITA CRISTI PUBLICA ET MIRA E-
IUS IN HOMINES MANSVETUDINE, ET A-
MORE.*

IP. Christus prior omnes difficultates per-
tulit, quæ mansuetudinem, & amorem
erga proximum difficilem reddunt. Meditan-
dam hic assumis virtutem o anima mea, quæ
licet una sit ex maxime necessariis ad sancti-
tatem, tamen non modicas involvit difficul-
tates. Tu intuere exemplum JESU Christi, &
resolve te ad ferendum generose, quæ tulisse
ante te JESUM videris.

1. *Difficultas est conversari ET agere cum
hominibus, apud quos labor omnis, ET conatus
male collocatus nihil proficit.* Ah anima mea!
quid non egit JESUS ad Judæos convertendos?
Tribus annis circuivit de pago in pagum, de ur-
be in urbem, prædicavit indefesse, & cum cœ-
lesti quadam eloquentia, cumulavit illos di-
versis & maximis beneficiis, patravit miracula
innumera; invitat, allicit tanquam Pater beni-
gni-



gnissimus ad se sequendum! Quid his omnibus profecit? aliqui Eum contemnentes dixerunt: ubi hic fabri filius talia didicit? alii deriserunt Ejus doctrinam: Pharisei vocabant Illum hominem malitiosum, qui non observaret legem: Pontifices condemnata Ejus doctrina, admonuerunt populum, ne se seduci sineret, & Ei adhærentes excommunicaverunt. Quo factum est, ut non nisi paucissimis conversis, reliqui omnes obdurarentur. Tales homines amare quam erat durum? etiam tenerrimus Parens filium suum, admonitiones omnes deridentem, & novas sibi quotidie molestias facessentem, tandem amore indignum judicat.

2. Difficultas est: *Cum hominibus agere, qui ex odio & invidia omnia in malam partem interpretantur.* Hæc difficultas Christo ad omnem ferme passum occurrit. Sanavit ex amore & commiseratione paralyticum Sabbatho; & impii exclamant: talem a Domino esse missum non posse, qui Sabbathum non observat. Manducabat cum Publicanis, ut per affabilitatem & amorem suum illos ad meliorem frugem reduceret: proclamant impii: illum potatorem esse, & convivia prensare. Patrabat miracula, ut homines ad cognitionem suæ Deitatis perduceret; dicunt impii non
Illum

Illum, sed Diabolum per Illum operari hæc omnia. Omnia Illius dicta, vel facta d'squirebantur, omnia in malam partem detorquebantur

3. Difficultas est. *Cum hominibus agere, qui beneficia non agnoscunt, vel malefactis compensant.* JESUS venit in Nazareth, prædicabat in Synagoga, & omnem amorem concivibus suis exhibebat. Qualem gratitudinem expertus est? Deduxerunt Illum ad supercilium montis, ut Illum inde præcipitent. Prædicavit Jerosolymis, & Se esse Messiam clare edixit; Quid gratitudinis retulit? Tulerunt lapides contra Illum tanquam blasphemum, & voluerunt Illum e medio tollere.

4. Difficultas est: *Circumdatum esse falsis fratribus, aut subdolis, & fictis amicis.* Sciebat JESUS quid Judas in Corde machinetur: quam malo animo adversus se sit: quod paucis argenteis corruptus in manus inimicorum se traditurus sit.

5. difficultas est. *Agere cum hominibus, de quibus constat nobis esse infestissimos.* Pontifices & Scribæ jam pridem Christum in Conciliabulo secreto ad mortem condemnarunt: declararunt publice ejiciendos e Synagoga, qui doctrinam Illius sectaturi essent: ediderunt decretum publicum, quo mandabant

ut Seductor Ille (ut ajebant) capiat & tradatur Pontificibus. En quantæ a Christo erant superandæ difficultates amandi homines, qui odio æterno digni erant! his tamen omnibus non obstantibus amavit omnes, amavit eos sicut Pater tenerrime.

A F F E C T U S.


Confusionis sui ipsius. O mi JESU! quam fortis & ardens erat amor Tuus? quam frigidus & pene nullus est meus! Tu Conversatus es cum hominibus qui Te in faciem blasphemabant, seductorem & blasphemum proclamabant, sub specie amicitiae hostibus tradere cogitabant: qui statuebant non prius quiescere, quam in crucem actum Te viderent. Omnes tamen hæ injuriæ amorem Tuum extinguere non poterant: amabas adhuc, & amare usque ad mortem pergebas. O me infelicem! quam parum habeo de mansuetudine & amore Christi! unicum verbum contemptibile, minima offensio, responsum minus affabile satis est ad extinguendum in me proximi amorem, & mansuetudinem meam evacuandam; & hoc post gratias & media mihi a Te suppeditata, quibus si uti voluissem magnum in utraque virtute progressum facere potuissem, & debuisssem. O DEUS! quam omni virtute vacuus coram oculis Tuis olim comparebo!

Pro-

Propositum. Sed an semper tam frigidum erit cor meum? An non tandem serio conabor tam necessarias mihi virtutes implantare? Tu o mi JESU! ad ordinem religiosum me vocasti; cujus finis proprius est: Tibi in profunda humilitate, sincero amore, & imperturbata cordis mansuetudine servire. Quomodo sine his virtutibus comparere coram Te audebo? quomodo & quid respondebo Tibi pro tot millenis gratiis, si illis nunc abutar! O mi JESU! nunc toto corde ad Te conversus.

II. **P.** *Miræ proprietates amoris, quo JESUS homines amavit.* Ex his bene perpenſis diſce verum amorem.

I. *Proprietas: Amor & mansuetudo Christi non obſtantibus quibuscunque injuriis ſemper erat benevolus & ardens.* JESUS erat omniſcius, vidit quotidie multa ſe odientium millia, qui deceptorem, blaſphemum, magum criminabantur, qui opprobriis laceſcebant! qui morte & cruce dignum judicabant, ino, qui ad mortem quærebant. Hæc omnia vidit, & tamen non eſt iratus: amavit & ardentiffime amavit. Quis tibi animus, quis ſenſus eſſet, ſi ſcires te a viginti hominibus pro ſcelerato haberi, in omni conventu proſcindi, & plane ad mortem quæri?



2. Proprietas: *Amor & mansuetudo Christi non obstantibus quibuscunque injuriis, in loquendo, & toto agendi modo erat semper affabilis.* Recordare hic iterum Judæ proditoris. Tribus annis cum illo conversabatur IESUS, noverat malum illius animum, noverat se tandem ab illo tradendum. Nihilominus conversabatur & agebat JESUS cum illo tam affabiliter quam cum cæteris Apostolis: Dedit illi donum miraculorum sicut aliis, lavit pedes illius sicut aliorum, ita ut Apostolis in ultima Cœna nec suspicio de illo aliqua incideret: quin eodem tempore, quo Christum manibus tradit nocentium, vocat illum IESUS amicum, & osculatur. An magis benevole ac affabiliter cum Ioanne, quem tamen præ cæteris tenere dilexit, agere potuisset?

3. Proprietas: *Amor & mansuetudo Christi non obstantibus quibuscunque injuriis, erat semper liberalis, & mala beneficiis compensabat.* Augebatur quotidie ingratorum Iudæorum in JESUM furor, & Hujus in illos beneficentia quotidie augebatur, ardentius quotidie suspiravit ad Patrem suum Cœlestem pro illorum salute, plura indies miracula operabatur, ut ad cognitionem suæ Divinitatis illos adduceret, nova quotidie illis beneficia præstabat, ut saxea illorum corda tandem emolliret!

molliret! imo ipsas injurias beneficiis compensabat. Quis Malcho erat indignior? erat unus ex illis, qui in hortum Gethsemani properabat hoc animo, ut Christum caperet; & tamen id ipsum dum ageret, extendit JESUS manum suam, & amputatam illi a Petro auriculam miraculose sanat!

A F F E C T U S.

Doloris. Nunc scio, o mi JESU, quid amor verus in se involvat! amare illos qui nos amant & nobis benefaciunt, facile est; sic amarunt & Judæi, & Gentiles! amare persequentes, & affligentes nos, hoc est amare, prout JESUS amavit. Qualis hucusque fuit amor meus? o quam imperfectus! & nonnisi talis plerumque, qualem & in Judæis, & in Gentilibus invenire est! Erravi ergo, & quidem erravi circa virtutem Christianismi characteristicam, Religiosi status pupillam, & medullam perfectionis, & sanctitatis! Agnosco & quidquid contra hanc peccavi, detestor, Te per Sanguinem Tuum rogans, ut - -

Actualis amoris. Hæc impofterum erit mea prima, & maxima cura, ut DEUM ex toto corde, proximum vero propter DEUM, sicut me ipsum, diligam! Hæc duo præcipua sunt mandata, quæ nos docuisti verbo, & exemplo Tuo: & quæ implere hoc



hoc momento volo. Amo ergo Te, o mi JESU! ex toto corde super omnes Creaturas in Cœlo & in terra! amo Te tam ardentè, ut paratus sim, omni momento sanguinem meum pro Te profundere! Et sicut Te, propter Teipsum, ita propter Te diligo sincere omnes homines, nullo excepto! Tu pro omnibus mortuus es, & præcipis, omnes amare, ideoque illos amo, sicut me ipsum. Tu, o JESU miserere omnium, & da unicuique ex Tua infinita misericordia, quæ ipse ego, mihi opto!

Propositi. Sed quoniam solus affectus ad amorem verum non sufficit, volo proximo meo facere omnia, quæ fieri mihi vellem. Vellem, ut omnes de me bene sentiant; & ego de omnibus bene sentiam: nullus contemptus, nulla de quocunque suspicio in animo meo locum habebit. Vellem, ut omnes erga me sint affabiles, & benigni: talis ego ero erga omnes: nullus ex me verbum inurbanum audiet, vel impatientiæ signa in me observabit. Vellem, ut omnes meos defectus patienter ferant, & mali de me loquantur nihil unquam: nec ego unquam sermones miscebo de defectibus illorum: Vellem exhiberi mihi ab omnibus obsequia charitatis: eadem ego omnibus exhibere conabor.

bor. Da mihi, o JESU, o amor verus & essentialis, gratiam amandi, prout Tu amasti.

CONCLUSIO HEBDOMADÆ SECUNDÆ.

Expendimus hucusque virtutes, & exempla JESU Christi; videamus nunc, quomodo illa imitari & possimus, & debeamus.

1. *Tantum habemus veræ Sanctitatis, & perfectionis, quantum habemus de Spiritu Christi.*

Si scire desideras, quantum in via perfectionis profeceris, vide, quantum habeas de Spiritu Christi. Si parum de hoc habes, parum habes veræ sanctitatis; & contra; Si omnia in te spiritui Christi sunt conformia, veram & perfectam sanctitatem attigisti. Christus est summa Sanctitas, & omnis sanctitatis exemplum: quo major tua cum hoc exemplo est similitudo, eo sanctior es, & perfectior!

2. *Tantum quis habet de Spiritu JESU Christi, quantum habet de Ejus obedientia, humilitate, amore, &c.*

Nulla quidem virtus est, quæ in vita Christi perfectissime non eluxisset; sed tamen harum quatuor præcipue insigniora nobis dedit exempla: imo duas ex his ita nobis commendavit, ac si Spiritus Ejus totus, &

tota


tota vitæ Sanctitas in iis consisteret! Discite a me, ait, nam ego sum mitis, & humilis corde!

3. *Ex his causam colliges, cur tam pauci etiam Religiosi ad sanctitatem pertingant.*

Plerique Religiosorum contenti sunt illis virtutum exercitiis, quæ corruptæ naturæ ægre non faciunt. Meditantur, orant, laborant bona cum intentione, præscripta sibi officia, mortificationis opera, quæ regula præscribit, exercent. Sed voluntatem propriam abnegare, cum perfecta indifferentia omnem Superiorum nutum expectare, vanam gloriam suppressere, contemptum æquo animo ferre, motibus iracundiæ resistere, etiam cum illis, qui nobis non arrident, affabiliter, & amice conversari, amor proprio ægre facere, mala bonis compensare &c. hæc pauci, & nonnisi heroici animi homines aggrediuntur. Si cor nostrum a malis affectionibus non purgetur, & virtutibus Deo magis placentibus non exornetur, etiam Deus se nobis non communicat, sed in nostra mediocritate nos sicut vivere, ita etiam mori finit.

III. **P** Si ergo serio sanctitatem, & unionem cum DEO quæris, necesse est, ut vestigia Christi sequaris, & Illius virtutes imiteris. Ad hoc autem sequentia valebunt proposita.

QUO-



QUOAD OBEDIENTIAM

1. Indifferentem esse erga omnes Superiorum de nobis dispositiones; ita, ut nil desideremus, nil quæramus, nil unquam recusemus.

2. In omnibus circumstantiis DEUM in Superioribus intueri, firmiter credere, illorum voluntatem esse DEI voluntatem.

3. Omnia illorum præcepta & nutus ipsos cum reverentia acceptare, & cum fervore explere.

QUOAD HUMILITATEM

1. Ita coram DEO omne vanæ gloriæ desiderium deponere, ut neque interne ullam tui ipsius æstimationem, vel complacentiam deliberate admittas, neque externe quidquam loquaris, vel opereris ex impulsu vanæ gloriæ.

2. Bonum suum nomen, & famam ita totaliter DEO offerre, ut indifferentes omnino simus, & parati, omni hora contemni, vilipendi, postponi, prout DEO placet.

3. Humiliationes, & sui contemptum undecunque advenientem æquo animo acceptare, & cum vero sui ipsius contemptu tolerare.

QUOAD MANSVETUDINEM, ET AMOREM

1. Affectum erga omnes sincerum fovere
ita,



ita, ut deliberate nullam de proximo suspensionem finistram, nullum contemptum, nullam impatientiam admittas.

2. Externe cum omnibus hominibus, & in omnibus circumstantiis affabiliter & amice agere.

3. Quomodocunque proximus erga nos fe-
gerat, quidcunque nobis ab illo fiat, ferre cum
silentio, & quantum fieri potest, bonis mala
compensare. Hæc sunt, o anima! in quibus
verus spiritus Christi, & vera virtutum imita-
tio consistit. An parata es hæc exempla
sequi, & imago vera JESU Christi fieri?
Si ita est: abjice te ad pedes Crucifixi, &
ita te ipsam offer: Agnosco o mi JESU! odisse
vanam gloriam, amare contemptum, volun-
tatem propriam abnegare, & alienam sequi;
cum omnibus affabiliter agere, aliorum defe-
ctus perferre, omnes ex corde amare, red-
dere bona malis, hic est spiritus Tuus ve-
rus; ita Tu amasti, ita & ego amare debeo,
si e Spiritu Tuo vivere velim! Imo non
solum iste Spiritus Tuus est, sed unica etiam
via est ad amorem & conjunctionem Tecum!
Tu es essentialis sanctitas, ideo habitare non
vis, nisi in corde ab omni mala affectione
bene purgato, & virtutibus Tuis exornato!
O quanta mihi Tecum familiaritas, & unio
iam




jam nunc esset, si mihi omnino mori, & Tibi soli vivere voluissem. O me infelicem! quantis me ipsum bonis privavi!

Sed enim, quæ Tua est gratia, nondum propterea omnia perdita sunt. Adhuc nunc cor meum ab omnibus sordibus malorum affectuum purgare, adhuc nunc familiaritatem, & alios Tui amoris effectus consequi possum! patet mihi adhuc per Tuam infinitam misericordiam via, me Tecum perfectissime uniendi! Quam dulcis est hæc spes! ego possum intime Tecum uniri, o bone JESU! ego, qui Te toties, offendi, toties Tuis gratiis abusus sum, toties Tuæ invitationi aures clausi! O misericordiam infinitam! Venio, o mi JESU- -

MEDITATIO TERTIA.

DE DUOBUS VEXILLIS

Cum hac meditatione incipit tertia hebdomada; de cujus fine hæc habe. Cum fieri non possit, ut Christum imitantes, secundum illius spiritum viventes, & virtutes illas, quas ille exercuit, exercentes, non sentiamus frequenter gravissimas difficultates, quas tamen, si constantes in Ejus sequela perseverare volumus, generoso animo perferre,



ferre, & superare oportet; proponit; nobis S. Pater Ignatius JESU Christi exemplum, ut non recusemus pro DEO pati, quæ Ille pro nobis passus est! Hæc ergo meditatio eo tendit, ut, quidcunque constet, serio nos resolvamus, Christum sequi, & secundum Illius spiritum vivere.

P. I. Quem sequi oporteat, Christum, an Luciferum, oportet conjici ex fine, quem uterque Dux habet.

1. *Finis JESU Christi est, omnes homines ad sui sequelam trahere, ut hoc modo cælestem Patrem suum æternum laudent, & glorificent, seipsos vero æternum salvent.* Causa hujus est duplex amor, quo Cor Illius ardet: Amor tenerrimus erga Patrem Suum Cælestem, quem, quia perfectissime amat ipse, a nobis ex toto corde amari, glorificari, laudari in æternum cupit. Amor tenerrimus erga nos homines, quos, quia ardentissime Ipse amat, quærere suam salutem, & eadem secum frui felicitate cupit.

2. *Finis Luciferi est, omnes homines sub suum vexillum colligere, ut hoc modo DEUM deserant, & seipsos in exitium æternum præcipitent.* Causa hujus est duplex: odium contra DEUM implacabile; nam quoniam ab Illo, judicio licet justissimo e Cælo ejec-


tus

ctus est, odit Illum extreme, & ferre non potest, ut ab hominibus adoretur, laudetur, ametur. Odium implacabile erga homines: nam, quoniam scit, infinitam in Cœlo gloriam & felicitatem, qua ille cum sequacibus suis excidit, nobis a DEO paratam esse; odio, & invidia uritur, omnia tentat, ut nos hac felicitate privet, & in idem secum exitium sempiternum pertrahat.

Jam anima mea! quem Ducem tibi eligis? quem sequeris? Christum an Luciferum? Dum Tobias junior in terram aliam peregrinaturus erat, Archangelus Raphaël sub specie Juvenis comitem se illi & ducem obtulit. Fingamus, duos se illi juvenes ad id obtulisse, sub quorum uno Raphael, sub altero Lucifer latuisset. Quid si Tobias Raphaële spreto, Luciferum elegisset? an se ipsum pejus odisse, & in majus præcipitare infortunium potuisset? Anima mea! Tu revera versaris in itinere ad æternitatem: Christus, & Lucifer se tibi comites & duces offerunt. Cui te confides? quem sequeris? elige prudenter, ne te æternum pœniteat.

A F F E C T U S

Estne vel ullus hic deliberationi locus super? Sum in itinere ad æternitatem. Via mihi est ignota, & plena periculis. Duo se mihi offe-



offerunt Duces. Primus est JESUS Filius Unigenitus Patris Cœlestis, essentialis sanctitas, JESUS, qui me tenerrime amat, qui nil nisi meam ipsius felicitatem quærit! quam securum est, talem Ducem sequi?

Secundus est Lucifer, spiritus reprobus, implacabilis DEI, & meus inimicus, qui nil nisi meum interitum quærit! quid faciam? O pudet vel interrogare! Quid! an ita demens sum, ut spreto JESU, Luciferum eligam? an me ipsum ita odi, ut relicta via Cœli, ad infernum properem? Absit. Tu mi JESU, es via, veritas & vita. Via, quæ secure ad Patriam ducit: veritas, quæ pericula & errores detegit: vita, ubi æterna beatitudo invenitur. Suscipe me, o mi JESU! sub vexillum Tuum; Te, Te sequi usque ad mortem volo.


II. P. *Quem sequi oporteat, Christum, an Luciferum, conjici debet ex scopo seu meta, ad quam uterque ducit. Discrimen inter JESU Christi, & luciferi invitationem est fere infinitum: & perinde infinitum est discrimen inter metam, quo deducit JESUS, & metam, quo Lucifer ducit.*

1. *Invitationes, quibus nos Christus sub suum vexillum vocat, omnes tendunt ad executionem eorum, quæ naturæ nostræ gravia, & inam-*



inamara sunt. Pleraque ex his sunt: voluntaria paupertas, cæca obedientia, continua voluntatis propriæ abnegatio, humilitas, & injuriarum contemptusque tolerantia, &c. laus DEI & gratiarum actio in doloribus, adversitatibus, morbis, persecutionibus. Hic est spiritus JESU Christi: ad hæc invitat sequi se volentes: ad hæc parata debes esse anima mea, si sub Ejus vexillo vivere velis! Sed quam amara talis vita esse videtur, tam dulcis, & exoptabilis est meta, ad quam ducit. Sed quæ est hæc meta, iste scopus? dicam paucis, sed tu tota tua vita meditare: Scopus & meta, ad quam ducit JESUS, est: evitatio infiniti mali, nempe inferni, & consecutio infiniti boni, nempe Cæli, & utrumque in æternum.

2. *Invitationes, quibus nos Lucifer ad suum vexillum vocat, omnes tendunt ad amplectenda ea, quæ naturæ placent.* Promittit sequentibus se bona temporalia, divitias, honores, amorem hominum, commoda, & voluptates corporis, jucundam, liberam vitam. Hic est spiritus Luciferi: ad hæc invitat sequi se volentes: sed ad quem scopum astutus ille, & maledictus Spiritus deducit? Ah anima mea! non sinas te seduci! scopus illius est, jactura infiniti boni nempe Cæli; & præcipitatio



pitatio in infinitum malum, nempe infernum! Siste hic modicum & imaginare tibi, ac si aperiretur coram oculis tuis, Cœlum! En! hic ad dexteram cœlestis Patris tui confidet IESUS Christus, & penes Illum copiosa Electorum turma in immensa gloria, & maiestate! Qui sunt hi, qui Christo proximè assistent? sunt Apostoli, qui diversis carceribus mancipati, tanquam seductores è civitatibus suis olim ejecti, ubique Gentium maximas persecutiones passi sunt! Sunt Monachi, Eremitæ, viri Apostolici, qui inter mille calumnias, opprobria, & injurias gloriam DEI promoverunt! Sunt Virgines, quæ amore JESU Christi tot tentationes, contemptus, adversitates cum patientia superarunt! Hi omnes prout in terris passione sua proximi erant JESU Christo, ita Eidem nunc in Cœlo sunt vicinissimi. Considera nunc apertum antè te infernum! En! hic ignito in lacu torquetur Lucifer; & circa illum innumera damnatorum multitudo, immensis tormentis excruciat! Qui sunt hi infelices, qui tam profunde creco immerfi, lucifero tam vicini sunt? Ah! anima mea! Sunt magni Domini, & Dominæ, qui suo tempore ab omnibus summo in honore habebantur: abundantia divitiarum, & rerum temporalium illos in
hunc

hunc ignem præcipitarunt! Sunt Domini & Dominae potentes olim, & in maximis dignitatibus constituti! Potentia, & auctoritas illos condemnarunt! Sunt viri & foeminae, qui carnem suam foverunt deliciis, commodis, & voluptatibus! Sed hæc eadem in hanc illos miseriam conjecerunt! Invitationem Luciferi secuti sunt in terris, & ideo nunc in inferno eidem proximi sunt.

A F F E C T U S,

O mi JESU! quo diutius Te considero, eo perspicio clarius, quod nec intellectus meus, nescio, qua cæcitate percussus veritatem hucusque satis cognoverit, nec voluntas mea languida virtutem serio amaverit! Tu præter paupertatem, contemptum, opprobria, dolores & afflictiones in terris æstimasti nihil: hæc sola tanquam media ad sanctitatem obtinendam certissima, & tanquam sublimis in Cælo gloriæ pignora omnibus commendas. Divitias contra, bona temporalia, honores, voluptates, & corporis commoda contemnis, & pro periculosissimis illicitis, & causis damnationis æternæ habes! Hoc Tuum, o JESU est judicium, Tua doctrina, hic spiritus Tuus! Et quid sentio ego? O vix audeo oculos attollere & Te è cruce pendentem intueri! Quod Tu æstimas, vilipendo, quod Tu amas,

K


odi



odi ego, quod tu amplecteris, ego a me removeo; Invitationes a Lucifero factæ mihi placent: & Tuæ, mi JESU! displicent! An cor meum tuo magis dissimile esse posset, si non Tibi, sed Lucifero servire statuissem? Quid ergo mihi facto opus? Ad Te o mi JESU! recurrendum mihi est; tu mihi tanquam perfectissimum omnis sanctitatis exemplar versari ob oculos perpetuo debes: quod tu amasti, amare ego: quod odisti, odisse & ego debeo! Ante te itaque prostratus...

III. P. *Quem sequi oporteat, Christum, an Luciferum, debet confici ex fine, propter quem nos DEUS ad statum Religiosum vocavit.* Ingressus es Religionem, ut DEUM in hoc mundo ames, & glorifices, & quidem modo quodam perfectiore; utque in altero fruaris Illo in æternum, & quidem in gradu sublimiore. Quomodo vero hoc fieri potest sine accurata JESU Christi imitatione, & sequela constante? Perpende attentius sequentes veritates, & impossibilitatem quasi manibus palpabis.

1. Veritas. *Perfectio est valde magna, & specialis DEI gratia.* DEUS est infinita sapientia, potentia, & fons omnis boni inexhaustus: Et tamen cum omnibus his perfectionibus nil mihi dare majus potest, quam
perle-



perfectum amorem, & unionem secum: hæc est gratia gratiarum, compendium omnium Ejus miserationum, & pretiosissima divitiarum margarita. Certe anima, quæ revera perfectionem attingit, tam altum statum attingit, ut non solum omnes totius mundi Monarchæ respectu illius, tanquam nihilum habendi sint, sed ut multi Electorum in Cælo milliones primas illi deferre per totam æternitatem debeant.

2. *Veritas.* Hanc gratiam nemo consequi potest, nisi per media a DEO ad hoc destinata. Evehere animam ad perfectionem, solius DEI misericordiæ opus est. Ille tam parum tenetur hanc tibi gratiam præstare; quam parum potens Rex tenetur pauperculam rustici filiam sibi sponsam eligere, & penes se in Solio collocare! Ergo tibi ad suum arbitrium, certas condiciones ponere, quas implere: & certa media præscribere potest, quibus uti debes, si hanc consequi gratiam velis,

3. *Veritas:* Hæc media consistunt in universali & perfecta JESU Christi sequela. Ego sum janua, inquit Christus, per me si quis introierit, hic salvus erit: & hic intrabit & exiit, & pascua inveniet! Hic est Filius meus dilectus, ait Pater æternus, in quo mihi bene complaceo; hunc audite. En anima mea! unica



ad Sanctitatem janua est JESUS! Unicum sanctitatis exemplum, quod nobis cœlestis Pater misit, est JESUS! Unicus Magister, & Dux Sanctitatis, veram nobis viam ostendens, est JESUS! Si per hanc januam intrare vis, perfectionem, amorem purum, & intimam cum Illo unionem invenies! Sed bene perpende, unicam tantum esse januam, extra quam spes nulla.


A F F E C T U S.

Fidei. Video quidem, quam diversa sint mea a Tuis judicia: Sed quoniam Tu es æterna veritas, verbis Tuis credo, quod veræ divitiæ in paupertate, vera gloria in contemptu, vera pax in persecutionibus, vera libertas in subjectione, vera ad Sanctitatem via in tua sequela, & imitatione & vera tui sequela in abnegatione sui universali, & adversitatum amore consistat! Credo, o mi JESU, nam ita Tu docuisti, vixisti, amasti. Si ergo amo, & vivo, sicut tu vixisti, & amasti, si patior, sicut tu passus es, spiritum tuum habeo, & sperare possum, jungendum me Tibi aliquando familiariter. Alia via ambulare, nil est nisi fucus virtutis, fraus, hypocrisis, vanitas quæ coram Te sustinere non potest.

Desiderii unionis cum DEO. O igitur mi JESU! Tu unicum meum bonum es, in quo
omnis

omnis mea felicitas consistit. Ad Te suspiro; & anhele ex toto corde. Volo te amare in hoc mundo, & quidem perfecte; volo Te frui in altero, & quidem in eo gloriæ gradu, quem Tu mihi ab æterno prædestinasti. Scio: via est ardua: abnegatio totalis meæ voluntatis, perpetuum silentium in mei contemptu, & affabilis, & amica conversatio cum hominibus mihi contrariis generosam de me victoriam postulant. Sed enim! reclamet natura, opponat se, mihi fixum est, o JESU! Te sequi! Et quomodo aliter possum? an difficile mihi esse potest, propter JESUM homini obedire, postquam JESUS propter me iniquissimo Judici obedivit? An difficile accidere mihi potest, propter JESUM contemptum, & injurias perferre, postquam JESUS propter me duos inter latrones in crucem actus est? An grave esse potest, propter JESUM amare homines mihi contrarios, postquam JESUS propter me carnifices suos, & latrones in cruce amavit? Possumne recusare pro DEO illa pati, quæ DEUS pro me passus est? O mi JESU! ab hoc momento volo vestigiis tuis insistere, volo facere, quæ Tu fecisti, & pati, quæ tu passus es! Ah! largire mihi spiritum tuum, spiritum subjectionis, & humilitatis; spiritum mansuetudinis, & amoris!

DIES



DIES SEXTA

MEDITATIO PRIMA.

DE TRIBUS HOMINUM CLASSIBUS.

I. **P** *Primam hominum classem constituunt illi, qui voluntatem quidem habent tendendi ad perfectionem, & Christum sequendi, sed non seriam. Si hanc hominum classem penitius nosse desideras, veni mecum ad nosocomium. En hic jacet infirmus, caloribus nimis æstuans, qui crescente indies malo morti proximus est. Advocatur Medicus, qui statu infirmi probe explorato, morbum quidem esse periculosum ait, sed si præscriptis medicinis diligenter uti velit, non incurabilem. Sed idipsum est, quod infirmo non placet. Ah, ait, ego desidero ex corde recuperare valetudinem, sed ita, ut medicinis uti non cogar. An æger iste habet veram voluntatem convalescendi? Ex nosocomio confer te ad Cellam animæ Religiosæ! En hæc gravi, & diuturno tepore oppressa jacet! audit ex Directore suo, malo huic adhuc ferri opem posse, sed oportere, ut se resolvat serventer orare, opera sua cum recta intentione, & spiritu amoris peragere, in præsentia DEI ambulare,*

re, seque per frequentes affectus illi unire, se abnegare frequentius &c. ita patere adhuc ad sanctitatem januam! Sed idipsum animæ tepidæ displicet. Ego, ait, volo perfectionem attingere, sed his mediis uti nec possum, nec volo! an habet hæc anima seriam, voluntatem pertingendi ad perfectionem? Væ tali animæ! multa illam manent mala. Nam

1. *Talis tepida voluntas facit, ut DEUS illam in peccata gravia cadere sinat.* Ille ipse declarat hoc duabus Parabolis: Primam desumit ex terra: terra, inquit, venientem sæpe super se imbrem imbibens, & non faciens fructum, reproba est, & maledictioni proxima! Secundam deducit ex aqua tepida, quam nemo sine nausea diu in ore retinere potest. Utinam frigidus, aut calidus esses, ait! sed quia tepidus es, incipiam te evomere ex ore meo! Ah! anima mea! quis hæc, & de quo locutus est?

2. *Talis tepida voluntas facit, ut DEUS illam demum perire sinat.* Hanc rursus veritatem bina similitudine declarat. Prima est de arbore in campo, cui, quia præter folia in ea nil invenit, his verbis maledicit: nunquam ex te fructus crescat in æternum. Secunda est de arbore in horto; hanc tribus consequenter annis sine fructibus reperit, & ideo ad hortulanum

tulanum conversus, ait: Succide illam; ut quid locum occupat? interrogo iterum: quis hæc, & de quo locutus est?

A F F E C T U S.

Timoris Heu! quo terrore obruor o mi DEUS, dum has ex ore tuo veritates percipio, & considero! Possum adhuc damnari, ego, quem DEUS præ tot hominum millibus ad Religionem vocavit! quem tot gratiis prævenit, quem ad tantum gloriæ gradum prædestinavit! Possum damnari, & quidem ob meam solum tepiditatem damnari possum! o quantum ergo malum est tepiditas, quæ facere potest, ut misericors DEUS mei nauseam concipiat, & me ex ore suo evomat!


Doloris. Habe mecum patientiam, o mi JESU! doleo nunc ex corde de mea hucusque negligentia, de abusu tot gratiarum, & tot mediorum neglectu! Vixi hactenus, quasi sine ulla cura seu gloriæ tuæ, seu salutis meæ! Per tuam misericordiam agnosco nunc totam meam malitiam, & serio propono, Tibi imposterum, o mi JESU!..

II. P. *Secundam hominum classem constituunt illi, qui quidem voluntatem tendendi ad perfectionem habent seriam, sed non universalem, & firmam.* Revertamur in nosocomium: En! hic jacet infirmus a priore longe diversus: desiderat enim

enim convalescere, & ut convalescat, paratus est, uti mediis: non tamen omnibus: usum ferri, ignis, & valde amara alia excipit. Quid de hoc ægroto sentis? Voluntatem convalescendi habet, sed non firmam, non universalem. Sicut hic æger, ita multi Religiosi sunt. Desiderant perfectionem attingere, & ut attingant, parati quoque sunt media adhibere, sed non omnia. Derelictiones internæ, graves tentationes per plures annos, humiliationes, contemptus sui sine data causa & alia ejusmodi nimis difficilia illis videntur. Quid ergo censendum de talibus? voluntatem habent, sed non firmam, non universalem. Quid autem talibus fiet? adverte bene, et imprime tibi sequentia:

1. *Talis vivit vitam sine solatio.* Si indifferentem ad omnia animum Religiosus non habeat, & se DEO totum sine ulla exceptione tradat, nunquam subjugabuntur passiones. Superbia, & honoris studium, pertinacia judicii, & voluntatis, iracundia, tristitia, & reliquæ malæ inclinationes, quas secum ad Religionem detulit, post 20. annos tam erunt vivaces, & importunæ, quam fuerint in primo ad Tyrocinium ingressu. Quin augmentur & crescunt cum annis, sicut arbores, quæ omni anno majores, & solidiores evadunt. Talis

Reli-



Religiosus onus obedientiae semper magis sentiet, contemptum sui semper feret acrius, in loquendo semper evadet liberior, in conversatione cum proximo iracundior, tristior &c: An tali in animo esse pax ulla, aut ullum solatium potest? Passio non mortificata hoc est in anima, quod vivus serpens in corpore. Quam diu serpens quiescit, tamdiu homo est sine dolore: quamprimum vero evigilat, pungit, mordet & cruciat hominem. Et quamdiu talis anima est sine perturbatione? quamdiu quiescunt passionibus. Cum primum ingruat contemptus, injuria, mandatum minus ardens, evigilant, tumultuantur, & cruciant. Ad haec omnia caecutimus, & fontem miseriarum, & afflictionum nostrarum non agnoscimus: quaerimus ubique inimicum, & adversarium nostrum, sed in corde non quaerimus, ubi tamen revera latet!

2. *Talis anima vivit sine progressu ullo in via perfectionis.* Effatum Christi est, quod mutationi nulli subest: Qui non renunciat omnibus, quae possidet, non potest meus esse discipulus; hoc est: qui non moritur ex integro omnibus creaturis, & meae se directioni totum sine ulla exceptione tradit, ad unionem mecum, & amorem perfectum pertingere non potest. Quare? audi causas:

1. DEUS

1. DEUS est absolutus Dominus: Illi liberum est, speciales illas gratias, quæ ad obtinendam perfectionem necessariæ sunt, dare, cui vult. Jam vero Ille decrevit, has nulli dare alteri, quam qui se DEO totum sine exceptione tradit. Et quis est homo, qui hoc DEI decretum carpere audeat?

2. DEUS est Majestatis infinitæ Rex. Decet, ut Illi soli cor totum cum omnibus ejus affectibus donetur: hoc jure se nunquam abdicabit, nec animam ullam unquam ad intimam secum unionem admittet, quæ sibi vel minimum reservare voluerit.

A F F E C T U S.

Agnitionis. Infirmus iste vera est animæ meæ effigies, o JESU! quemadmodum ille convalescere cupit, sed sine labore, & amaris medicinis: ita ego volo perfecte esse humilis, sed sine contemptu: perfecte obediens, sed sine mandatis mihi non arridentibus: perfecte mansuetus, sed sine injuriarum tolerantia: verbo, volo fieri Sanctus, sed nolo laborare, nolo pati. Sed an hoc non est, resistere voluntati DEI, doctrinæ & exemplo JESU Christi, directioni & internis admonitionibus Spiritus sancti. O me stultum! nemo ante me Sanctus fuit, nec post me ullus erit, qui non fuisset multa passus, & vesti-

vestigiis Christi fideliter institisset, debeo pati, me ipsum annihilare, mihi ipsi mori, si perfectus evadere desidero! Ita est: hæc est tua doctrina, o JESU! hæc est ad Sanctitatem via! igitur volo Tecum pati, volo pati, donec omnes meæ passiones & inordinatæ inclinationes subjugatæ...

Propositi. An mihi ipsi ita esse inimicus possum, ut crucem majorem eligam, & fugiam minorem! Ah! mi DEUS, illumina me, ut videam, quod hucusque non vidi! modica superbiola plus inquietudinis, & perturbationis causat in anima, quam perfectissima humilitas: modica ira majori amaritudine cor replet, quam maxima mansuetudo: modica judicii, & voluntatis tenacitas magis cruciat, & affligit animum, quam perfecta obedientia, Eja ergo, si pati debeo aut propter virtutem, aut propter vitia, malo pati propter virtutem propter Te & pro Cælo.

P. III. *Tertiam hominum classem constituunt hi, qui seriam, universalem & firmam voluntatem habent tendendi ad perfectionem, hoc est, qui parati sunt non solum omnia facere, sed etiam omnia pati, quæ DEUS vult, ad obtinendam perfectionem. Utilitas, quam anima in tali statu sperandam habet patebit ex sequentibus.*

1. *Talis anima infallibiliter pertingit ad perfectionem.* Eadem mensura, qua se homo DEO tradit, communicat se DEUS homini! Cum ergo talis anima se DEO totam, & sine exceptione tradat, ita, ut parata sit, & agere, & pati, quæcunque DEO placent, etiam DEUS tali animæ se communicat totaliter, & sine exceptione, & cito extollit illam ad statum perfectionis.

2. *Talis anima certissime pertingit ad unionem cum DEO.* Unio & familiaritas cum DEO est remuneratio, quæ perfecto amori promittitur: Si quis me diligit, ait Salvator, diligetur a Patre meo, & ego, & Pater meus ad eum veniemus, & mansionem apud eum faciemus.. Quis autem dici potest, habere illum perfectum amorem, cui tanta gratia promittitur? ille profecto, qui se totum DEO tradit.

3. *Talis anima sine dubio obtinet a DEO multas alias, & sublimes gratias.* Deus est infinite liberalis, & abundantes gratias in animam talem effundit, quæ se illi totam tradit: tales gratiæ sunt, quies dulcissima animi, pax, & gaudium cordis, tenerrima devotio, & affectus erga DEUM, & alia dona Sancti Spiritus: & hoc est illud desiderabile centuplum.

tuplum, quod Christus illis promisit, qui propter
Illum seiplos, & omnia generose reliquerint.

A F F E C T U S

Timoris. Mi DEUS quam amabilem, &
misericordem Te mihi præstas! per tuam
gratiam cognosco nunc viam, quæ ducit ad
Sanctitatem: agnosco. quod infallibiliter ad
eam perventurus sim, dummodo me Tibi
totum, & sine exceptione tradam: agnosco
tuam voluntatem Sanctissimam, me eo de-
ducendi! quanta hæc tua erga me misericor-
dia! Sed hæc ipsæ miserationes, & gratiæ tuæ
timore me replent o DEUS! nam cui plus
datum est, ita sonat effatum, tuum, plus
requiretur ab illo! Heu quam infelix essem,
si eadem gratiarum abundantia, quæ me ad
sublimem evehere in Cælo gloriam debe-
rent, me profundius in inferno mergerent! Cer-
tum est dari animas, pro quibus medium non
datur: aut sublimes erunt in gloria, aut profundæ
in inferno! An non ego sum ex illarum nu-
mero? nescio! terribilis incertitudo!

Propositi. Ut ergo in tempore mihi bene
consulam, viam hodie ingrediar, quam a-
gnovi. En! mi JESU! hoc momento me
directioni tuæ sine exceptione, & reservatione
ulla trado! Hoc unicum Te obtestor, da
mihi gratiam te perfecte amandi, & me
tibi


Tibi intime uniendi: reliqua omnia tuo Sanctissimo arbitrio relinquo. Omnia adversa, quæcunque mihi accident, considerabo tanquam dispositiones tuæ Paternæ Providentiæ! & cum subjectione humillima acceptabo tanquam media ad sanctitatem. O mi JESU, conserva hanc in me voluntatem!

MEDITATIO SECUNDA.

*DE TERTIO HUMILITATIS GRADU, SEU DE
AMORE CONTEMPTUS.*

I. P. *Ut amemus contemptum, requirit æquitas.* Tam cæci sumus, o anima mea, & tam alte, & firmiter cordi nostro insita est æstinatio propria, ut injuriam nobis fieri arbitremur, si contemnamur. Et tamen certum est, quod nobis nil magis quam contemptus competat, imo, quod omnes in mundo homines non ita nos contemnere possint, prout meremur, Collige animum tuum, & veritatem hanc clarissime perspicies.

1. Deus potest, & debet peccatum punire.
Hoc nos fides docet. Deus est infinite justus. Sed sicut infinite justus non esset, si bonum non remuneraretur, ita non esset infinite



infinite justus si mala non puniret. Cre-
dis hæc? prosequere,

2. *Deus potest peccatum punire, prout illi placet!* Quemadmodum Deus est infinite justus, ita etiam est absolutus Dominus. Ille potest peccatum punire in corpore doloribus, in anima angoribus, & afflictionibus, in honore contemptu: Opportunissima & maxime conveniens pœna videtur esse contemptus. Nam quia peccatum est contemptus DEI, recte & juste contemptu punitur. Vel quid æquius esse potest, quam ut homo ille contemnatur, qui ausus est, DEUM supremum suum Dominum contemnere?

3. *DEUS potest peccatum punire, per quemcunque illi placet.* In Davide punivit peccatum per proprium filium. In inobediente Propheta per ursum, qui illum jugulavit. In scelerato Heliodoro per Angelum, qui illum flagellavit. In suo filio JESU Christo nostra peccata punivit per Apostolum, qui illum prodidit. Etiam in me ergo punire, & mihi contemptum immittere potest, per quemcunque illi placet.

4. *Quomodocunque DEUS peccatum in hoc mundo puniat, punit tamen illud semper minus, ac meretur.* Si usque ad finem mundi & quidem inter continuas, injurias, calumnias

mnias & persecutiones viverem, non possem omnem illum contemptum reparare, & refarcire, quo Deum per unicum peccatum veniale affeci!

Collige nunc anima mea, omnem tuam attentionem, & responde mihi! An nullum unquam peccatum commisisti? Ah! non unum, sed centena, & fors millenis plura! Ergo potest te utique Deus punire, & quidem punire aliorum contemptu, si velit? etiam hoc negari non potest. Qualescunque tibi contemptus immittat, semper erunt minores, & pauciores, quam per unicum peccatum veniale promerita es?


Et hoc certum est. Quid sequitur? Sequitur, quod de nullo contemptu conqueri unquam possis, quia nulla fit tibi injuria: Sequitur, quod in ipso etiam contemptu Deum laudare, & benedicere debeas, quia minores sunt tuis meritis: Sequitur, quod æquum sit, ut in contemptu & opprobriis vitam agas.

A F F E C T U S.

Agnitionis & humiliationis. Justum est, o mi Deus! fateor, justum est, ut in contemptu vitam agam, & omnia opprobria &c. tamquam effectus Tuæ misericordiæ confiderein! Ah! quid sunt opprobria, & con-

L

temptus



temptus hujus mundi omnes respectu illius, que meritus sum? Si Tu mi JESU, agere mecum secundum justitiam tuam voluisses, ubi essem hodie? Dicam, quod est; nam coram Te occultare nil possum, o infinita Omniscientia! Ah! essem in inferno! terribilis veritas: essem in inferno: ego ab Electis omnibus, ab omnibus in inferno reprobis, ab omnibus Angelis, & hominibus maledicerer in æternum! Tu hæc o mi JESU, per tuam misericordiam infinitam a me avertisti, & loco maledicti æterni, contentus es, si illos contemptus perferam, quos mihi in hoc mundo immittes! An non hos tanquam effectus tuæ misericordiæ merito considerare, & cum gaudio tolerare oporteret?

Propositi. Ita est, mi JESU! hæc cogitatio nunquam amplius ex animo excidet: peccavi, & meritus sum ab Angelis, & Homnibus, ab Electis, & reprobis in æternum maledici, & omnibus injuriis, & contumeliis saturari! Hoc in omni occasione in memoriam mihi revocabo, & hujus veritatis memor in omni contemptu tuam bonitatem, & misericordiam laudabo.

II. P. *Ut amemus contemptum, exigit utilitas.* Verum quidem est, quod omnis contemptus inamænus, & amarus accidat, sed
quam

quam multas res natura sua inamænas & amaras amamus, si magnam nobis afferre posse utilitatem putemus? Ægro, magnis doloribus vexato charius nil est in orbe, quam medicina, utut amarissima, dummodo securus sit de restituenda sibi per hanc valetudine. Cur ergo nos contemptum non amemus, si consideremus, magnam & multiplicem nobis utilitatem per hunc accidere? Quæ autem est hæc utilitas?


I. *Præter alias; prima utilitas est, quod suffocet in nobis superbiam.* Maximum malum & impedimentum perfectionis est superbia, & vanitas. Quamdiu minima sui ipsius æstimatio, vanæ gloriæ desiderium, & complacentia ob hominum laudes in corde residet, tamdiu Deus in illud intrare renuit. Nauseat Deus cor tale, fugit, & vacuum cælestibus illuminationibus, affectibus, motibus: vacuum gratis specialibus, & speciali suæ providentiæ directione dimittit! An esse majus malum potest animæ ad perfectionem tendenti? Quale est contra hoc remedium? Crede, anima mea, & crede tamquam veritatem indubitatam: efficacissimum, securissimum, & præsentissimum medium est contemptus. Sicut ad restinguendum incendium nil melius est imbre e nubibus decidente,



fic ad extirpandam superbiam efficacius nihil est hominum male de nobis sentientium, contemptu. Absque hoc medio pauci veram humilitatem assequuntur. An ergo, non desiderandus avide, & cum gaudio amplectendus esset contemptus? an non DEUS, qui eum immittit, ex corde laudandus propterea, & benedicendus? Medico, qui nobis, licet non sine dolore dentem evellit, aguntur gratiæ, eo quod nostris nos doloribus liberaverit; an non majores gratias meretur DEUS, qui nos asperis licet mediis a tanto malo, quantum est superbia, liberat?

2. *Utilitas. Contemptus inserit cordi nostro humilitatem.* Maximum bonum, & optima ad perfectionem præparatio est humilitas. Hanc si in corde nostro invenit DEUS, illud ingreditur, & abundantia suarum gratiarum replet. Cor humile valli non absumile est: Nam quemadmodum copiosæ ex imbribus aquæ magna vi ex montibus in valles præcipitant, ibique colliguntur: ita gratiæ cœlestes a superbis resilientes in valle cordis humilis colliguntur. An majus esse bonum potest? Sed quod est medium, virtutem hanc assequendi? Intuere JESUM, anima, & disce contemptum amare. Salvator hic noster cum aptissima ad omnes virtutes obtinendas media nobis ostenderet; quale humilitatem

tem




tem assequendi medium ostendit? nullum aliud, quam contemptum, opprobria, illusiones, & generosum in his silentium! Si hoc feceris, dabit tibi JESUS spiritum suum, spiritum humilitatis, imo ex parte illum jam habes: nam spiritus humilitatis JESU Christi est, amare contemptus, in iis lætari, & tacere.

A F F E C T U S

Ah! mi JESU Redemptor dulcissime! Agnosco, quid Tibi in corde meo displiceat, & quid Te, quin in illo habitare velis, absterreat! Illud tibi tam exosum desiderium vanæ gloriæ, & æstimationis ab hominibus aucupandæ, & ubique inter omnes eminendi cor meum Tibi exosum reddit! O infelix gloriæ studium quot me hucusque gratiis, quot illustrationibus, & consolationibus cælestibus me privaſti! quantum me a DEO separaſti! Frustra sum; quamdiu hanc inclinationem non exuo, Tibi, ô JESU, appropinquare non possum! Tam humilis DEUS, & tam superbus homo familiariter uniri invicem non possunt! Aut tu ergo cor tuum mutare & imposterum superbiam, honores &c. amare debes, aut ego meum mutare, & humilitatem, & contemptum &c. amare debeo! Imo: ego meum cor mutare debeo. Sed, o mi JESU! ego ipse verbis meis, & promissis fidere non possum! Maledicta

hæc




hæc vanæ gloriæ cupiditas tam alte infixæ est cordi, ut nulla vi evelli queat! Toties illam execratus sum, & coram conspectu tuo ejuravi, & tamen tam firmiter, quam olim, adhuc hodie cordi inhæret! Sed enim hoc malum mihi ipsi tribuendum est: proposita enim mea quoad hoc punctum nil aliud erant, quam inania verba, quibus me ipsum decepi! Si ex corde procederent, oporteret me utique illis gratias agere, qui me contemnunt, oporteret utique omnes occasiones me humiliandi avide, & cum gaudio arripere. Nempe, o mi JESU! hæc infelix arbor, evelli nisi per omnipotentem tuam dexteram evelli vix poterit! Converte igitur tuos oculos in me, o misericordissime JESU! dele, & extirpa in me omne vanæ gloriæ desiderium, & fac, ut in meo corde nemo dominetur præter Te solum.

P. III. *Ut anemus contemptum. exigit illius sublimitas, & præstantia.* Si sciremus, quam sublimis, & excellens in oculis DEI sit status, & conditio contempti, illas difficultates, quas natura in ferendo contemptu sentit, cum gaudio in nos fusciperemus! Perpende ergo bene, quid sit, tolerare contemptum patienter, & cum silentio.

1. *Præstantia. Contemptum patienter, & cum silentio*

filentio tolerare est maximum sacrificium, quod DEO fieri a nobis potest. Desiderium emi-
nendi, & æstimationem, laudemque hominum
assequendi fere omnium hominum corda oc-
cupat. Homines, qui sine difficultate omnibus com-
modis se privant, corpus jejuniis, aliisque
austeritatibus macerant; homines, qui dolores
corporis ferunt patientissime, sæpe nec mi-
nimum contemptum, nec unicam calumniam
concoquere norunt; quin ad unicum sæpe ver-
bum minus illis, ut videtur, honorificum ef-
fervescunt! Huic scopulo impacta multorum
Sanctitas, triste naufragium facit! Tam alte
nempe hæc passio insidet animis! tam diffi-
culter eradicatur! Sed quemamodum sine ma-
xima violentia, naturæ illata id fieri non potest;
ita etiam maximum est sacrificium, quod fa-
cere homo DEO potest, & in quo sibi DE-
US summe complacet!

2. *Præstantia.* Contemptum patienter & cum
filentio tolerare, est medulla & punctum essen-
tiale sequelæ, & imitationis Christi. Si DE-
UM considerate intueri vis, anima mea, inve-
nies nec unicum ab eo passum factum esse
sine contemptu. Non orabat semper, non sem-
per prædicabat, non erat semper in dolori-
bus, vel afflictionibus: sed contemptus illi
nunquam deerat. Contemptus erat in nativi-
tate



tate sua in stabulo Bethleemitico; contemptus erat qua infans in fuga sua in Ægyptum: contemptus ut juvenis in officina in Nazareth: contemptus qua vir in prædicatione, contemptus moriens in cruce: erat contemptus ratione doctrinæ, virtutum, miraculorum: contemptus quoad humanitatem & Deitatem. An ergo dici non debet, proprium, & quasi essentialem characterem Spiritus Christi esse contemptus amorem? & sine hoc amore Spiritum Illius consistere in nullo posse?

3. *Præstantia, Contemptum patienter Et cum silentio tolerare, est clavis ad Cor JESU, Et ad unionem cum illo.* JESUM sine contemptu frustra quæris; nec Oratio, nec suspiria, nec jejunium, nec vigiliæ, nec quodcunque aliud pium exercitium multum proficiet! Spiritum JESU Christi induere debes, & amare cum Illo contemptum. Tales animas amat JESUS: tales illuminat, talibus manifestat arcana gloriæ suæ: tales solatur, & dulcedine amoris sui pascit: cum talibus se unit, & conversatur familiariter. Hæ sunt benedictæ illæ animæ, in quibus adhuc in hoc mundo impletur, quod his verbis promittit: En! sto ad ostium, & pulso; si quis vocem meam audit, & mihi fores aperit, intrabo ad illum, & cum illo manducabo, & ille mecum! Anima mea! an
non

non misere cæcutimus, an nostra vœcordia amaris lachrimis non est deflenda, si de contemptu, vilipensione tristamur? An non potius ardentissimis votis expetere deberemus bonum hoc, quod Christus tanti æstimat? an non deberemus illud ambabus ulnis amplecti? Odimus nosmetipsos, si id non facimus, & sumus infirmis illis similes, qui convalescere quidem, sed uti medicinis non volunt!

A F F E C T U S.

Oblationis sui. O mi JESU! quam clare agnosco, quod ego tibi, & tu mihi uniri non possis, quamdiu vanæ gloriæ desiderium in corde meo dominatur! Abominor ergo illud ex corde, & in perpetuum ex animo meo ejicio! Nolo in posterum, ut vel unus de me cogitet, me æstimet, amet, laudet vel honoret, & si quid tamen ejusmodi contra voluntatem mihi obtingat, orituram inde complacentiam fugiam, & horrebo, tanquam rem coram oculis tuis abominabilem!

Amo & eligo e contra ex corde statum contemptus. Quidquid contemptus, vilipensionis per tuam misericordiam mihi obtigerit, amore tui non solum patienter tolerabo, sed Te etiam propter hæc, tanquam maximum beneficium mihi præstitum benedicam, & gratias Tibi agam! In manus tuas depono ab hoc mo-

mento



mento omne jus, quod coram oculis hominum habeo, ad honorem, & famam bonam. Ego de illo tanquam de bono alieno amplius sollicitus non ero. Tu, o mi JESU, accepta illud, & sicut Pater cœlestis tuo ad honorem, & famam jure usus est ad gloriam suam per ignominiam, & contemptum, ita tu meo utere. Hoc, o mi JESU, est sacrificium, quod tibi offero, quodque indies renovare, & in quo perpetuo vivere, & mori volo! Sed quis faciet, ut in hac animi constitutione jugiter perseverem? Tu solus id potes, mi JESU! sine Te optima mea desideria, & proposita sicut fumus evanescent! O igitur converte in me illos tuos misericordes oculos, da mihi cor tuo simile; da, ut amem, quod tu amasti & oderim, quod tu odisti! da, ut vanam gloriam, respectum hominum &c. averfer, ut Tu averfatus es, & amem ignominias contemptus &c. ut Tu eos amasti! Hanc gratiam per....

MEDITATIO TERTIA.

DE INTERNA JESU CHRISTI PASSIONE

Omnes afflictiones internas, quæ nobis in via perfectionis occurrere possunt, Christus pro nobis pertulit. Imaginare tibi hic, anima mea, amabili-

amabilissimum Redemptorem tuum in monte Olveti sanguineo sudore undequaque perfusum; & terribilem illam agoniam, & connexas cum illa angustias, & afflictiones diligenter perpende! Sed recordare semper, Divinitatem Christo in sua passione tam parum levaminis vel auxilii præstitisse, quam parum anima Electi in Cælo corpori suo, quod in sepulchro putrescit, præstat. Christus ita passus est, sicut passus fuisset, si fuisset purus homo, ut tu!

1. *Quod passus est JESUS, erat tristitia immensa.* Causam, ex qua tristitia hæc orta est, erat duplex: prima: ardentissimus Illius in nos amor. Nunquam aliqua Mater filium suum unicum tam tenere amavit, sicut JESUS amavit quemlibet hominum in specie. Secunda erat Illius omniscientia: Novit, quod non obstante sua passione pars hominum maxima æternum peritura sit! Imaginare tibi Matrem aliquam tres, vel quatuor filios habentem, quos tenerrime amat. Absente Matre, dum filii in campo ludunt, supervenit tygris, & omnes discerpit. Mater filios suos quærens invenit nihil, nisi unum alterumve eorum os semicorrosum, & calvarias! Quantus putas hujus Matris est dolor? Tantus, quin infinite major erat dolor & tristitia JESU Christi! jam tune


niva-



vivacissime cognoscentis, quod multi hominum
milliones in ignem æternum detrudendi sint!

2. *Quod passus est JESUS, erat timor.* Nil est, quod animam hominis excruciet crudelius, quam mortis expectatio. Contigit interdum, ut homines sani, & juvenes, quibus mors subeunda denuntiata est, præ terrore, & angoribus una nocte toto capite ut senes decrepiti, incanuerint! Quid si tibi nunc denunciaretur, te cras in conspectu totius urbis crudelissimam, & lentissimam mortem subiturum? quid tibi animi esset? quis timor? Ex interno sensu tuo collige, quomodo timor iste Christi animum exagitarit: Non fuit enim unquam homo ullus, qui imminentem sibi mortem cum omnibus circumstantiis, & amaritudinibus æque vivaciter repræsentare potuisset, ac Christus.

3. *Quod passus est JESUS, erat lucta interna.* Luctam hanc in corde JESU excitavit natura, & gratia: Natura partim ob mortis horrorem, partim ob tedium de hominum ingratitude faciebat passionem Christo intolerabilem, coegitque Illum exclamare: Pater, si possibile est, transeat a me calix iste! Gratia impulit Illum ad hanc repugnantiam naturæ devincendam. Ideo re-
vocat



vocat quodammodo priorem suam petitionem, & ait: Pater! non mea, sed Tua voluntas fiat! Tribus horis duravit hæc lucta, & animum Illius ita excruciauit, ut sudor sanguineus ex toto corpore copiose proruperit!

4. *Quod JESUS passus est, erat Agonia.* Negari non potest, horribilius homini accidere nil posse, quam agoniam. Propone tibi, anima mea, ob oculos hominem morientem! Heu! quam tristis, & luctuosus aspectus talis est? frigidus sudor stat in fronte: manus, pedes, & reliqua membra obrigescunt; ægerrime trahit spiritum: cor palpitatur, & tremit! Vel solus aspectus hominem terrore replet! Converte nunc oculos a moriente in JESUM tuum! En! loco sudoris sanguine vultus totus rubet: frigescunt pedes & manus, procidit in faciem viribus omnibus destitutus, cor tremit, fit in agonia! Quin mortuus fuisset, nisi Angelus illum confortasset, ut suum in cruce sacrificium perficere valeat.

A F F E C T U S.

Confusionis sui ipsius. O mi JESU! quam amara est passio tua! & quam magna est tua in passione constantia? Contra, quam parum est, quod ego patior, & quam timidus



midus & vācors sum ego! Passio tua dici potest mare amaritudinis, tristitiæ, afflictionis! Nausea, horror, angustia, desolationes, privatio omnis consolationis cœlestis &c. quasi fluctus sunt quibus cor tuum exagitur! In hac tamen terribili tempestate, qua jactaris, video te constantissimum, & immotum! Tu pergis orare, amare, voluntatem Patris tui adorare, & te ad crucem parare! Hæc sunt signa, & argumenta certissima vere amantis, & nil nisi DEI beneplacitum querentis! Si passioni huic tuæ meam comparem, quam modicum, & prope nihil est, quod patior, & tamen quam facile animo concido? tedium, & tepor in oratione, intermissio mortificationum, & bonorum propositorum, effusio ad externa, pusillanimitas, & diffidentia infelices illi effectus sunt, quos minima in me desolatio producere solet! Ah quanta erubescendi coram oculis tuis causa! Tu, qui es ipsa innocentia, versaris in continuis doloribus, & afflictionibus; & ego peccator, infernum toties promeritus nil volo, nisi consolationes!

Propositi. Proh pudor! peccator mollius tractari desiderat, quam JESUS innocentissimus! servus vilissimus recusat pati, quæ patitur Dominus! Ah! agnosco stultitiam meam,

meam, & detestor! Nunquam querulabor amplius, o mi JESU! in afflictionibus meis! Desolationem, quam JESUS pro me passus est, volo & ego amore illius pati! Satis mihi erit imposterum, placere meo JESU! Illum solum quæram, Illum solum amabo, sicut in prosperis, ita in adversis, sicut in consolatione, ita in desolatione! Ita nunc, o mi JESU, firmissime statuo.

P. II. *Status desolationis est nobis multo utilior, quam status consolationis. Veritas hæc pateſcet, si sequentia bene, & attente perpenderit!*

1. *Status desolationis est longe aptior ad faciendum DEO gratum sacrificium, quam status consolationis.* Ah quoties, & quantum nos ipsos, etiam in rebus spiritualibus decipimus! si animo interdum tranquillo simus, si tenera devotione cor diffluat, si dulces quandoque lachrymæ ora rigent, gaudemus, diem illum beatum, alboque signandum lapillo dicimus! Cæci! unus dies desolationis sine comparisone hoc melior est. Quare? Die consolationis DEUS tibi aliquid dedit, sed Tu DEO nihil dedisti. Ille te ad convivium suum invitavit, tibi que partem aliquam suæ dulcedinis degustandam obtulit: hæc est illius in te liberalitas, non tuæ erga illum! Animas, quæ
in con-



in consolatione illi adhærent fideliter, millenas habet DEUS, sed paucas, quæ etiam in desolatione. Omni collustratione, & consolatione spiritali destitutum esse, & tamen cum fervore in oratione perseverare: hoc est sacrificium, in quo sibi DEUS complacet: repugnantiam ab omnibus inclinationibus sustinere, cruciari undique tentationibus, & tamen collectam tenere mentem, in sui abnegatione, reliquisque pietatis exercitiis firmum persistere, hoc est, quod cor amabilissimum JESU Christi vulnerat!

2. *Status desolationis deducit animam longe securius, & citius ad perfectum DEI amorem, quam status consolationis.* DEUM perfecte amare, nil est aliud, quam in omnibus rebus solum DEI beneplacitum, & extra hoc in Cælo, & in terra nihil querere. Eo momento, quo huc pervenisti, assecutus es perfectum DEI amorem, es in oculis illius sanctus, & perfectus. Quid autem eo nos securius deducet, quam status desolationis? Anima, quæ etiam in hoc statu fidelis permanet, privat se ipsam omni solatio externo, cum interno alioqui a DEO privata sit. Hic ergo manet quasi cruci affixa, moritur sibi sensim, & omnibus creaturis, & cum nullibi ullam consolationem inveniatur, nisi in Beneplacito

neplacito DEI, quiescit solum in hoc, & ita purum, & perfectum amorem assequitur.

3, *Status desolationis deducit animam multo securius, Et citius ad intimam cum DEO unionem, quam status consolationis.* Si in conclavi cortina a fenestris retrahatur, sol suis, radiis totum conclave illustrat; ita se res prorsus habet cum anima. Si hæc omnem creaturarum affectum exuat, DEUS eam imminensæ suæ lucis radiis illustrat, & accensam suæ charitatis flammis unit sibi, & se illi. O quam exoptabilis ergo est status desolationis! Scito: sicut aurum igne purgatur, & omnia, quæ aurum non sunt, consumuntur, ita purgatur anima igne desolationis, & omnis affectus, qui non pure in DEUM tendit, consumitur. Status consolationis amori proprio nimis dulcis, & amœnus est; & ex mille animabus vix unam invenies, quæ per illum ad unionem cum DEO pertingat!

A F F E C T U S.

Obtationis. Quid ergo faciam? Video JESUM in statu desolationis, & tristem usque ad mortem! video, perutilem mihi esse statum eundem, & ad unionem cum JESU deducere, quare ergo desolationes horreo? Hoc momento ad pedes tuos, mi JESU, abiectus me tibi totum offero! fac mecum secundum be-

M


nepla-



neplacitum tuum! Paratus sum carere omni solatio terreno non solum, sed etiam cœlesti, paratus sum interne, & externe pati, & affligi, tentationibus, desolationibus. Unicum meum solatium erit beneplacitum Tuum, unicum gaudium mihi erit tecum & propter te omni solatio destitutum esse, & scire tuam sanctissimam voluntatem in me perfici!

Inplorationis gratia. Sed nunc, si unquam, oportet, ut cor, manus, & oculos ad Te attollam, & misericordiam tuam implorem! Privatum esse omni cœlesti solatio, & tamen terrenum non quærere; sentire tædium, & tamen in oratione fervere: urgeri tentationibus, mille cogitationibus infestari, & tamen collectam mentem fervare: in corde nonnisi amaritudinem, tristitiam, pusillanimitatem, repugnantiam naturæ sentire, & tamen mansuetum esse, conversari amice, & suaviter cum proximo pulchræ quidem, sed quam arduæ simul sunt virtutes? In his certe virtus & perfectus amor, & unio cum Deo consistit! Sed ad hoc robusta, & specialis Dei gratia requiritur! ad Te ergo, mi JESU! me converto.

DIES




DIES SEPTIMA.

MEDITATIO PRIMA.

DE EXTERNA JESU CHRISTI PASSIONE.

Nunquam in corpore nostro tantum patiemur, quantum in suo passus est Christus! Si cognoscere, saltem aliquommodo, cupis anima mea, quanti in passione Ejus dolores fuerint, perpende attente sequentes circumstantias.

I. *Dolores Christi erant universales, & sine exceptione ullius membri.* Intuere JESUM a capite ad calcem, & vide, num vel unicum membrum dolore careat. Genæ intumuerunt ab alapis! Os cruciatum siti, & amaritudine fellis! Capilli tam capitis, quam barbæ evulsi! Oculi suffusi sanguine! Caput spinis perforatum! Manus, nervi, caro clavis pertusa! Pectus, dorsum flagellis dilaniatum! pluribus locis ipsa ossa, avulsa carne apparent! Quanti, quam intolerabiles dolores! Nondum satis! tensi crudeliter nervi, emota violenter ex juncturis ossa, pedes clavis affixi, verbo: totum corpus vulneribus oblitum! Isaïas Propheta de JESU, Ejusque passione ita loquitur: Vidimus eum
M2 despe-



deseptum, & quasi novissimum virorum, virorum dolorum; non erat Ei aspectus &c. Infirmitatem nostram pertulit, & dolores nostros Ipse portavit: nos putavimus Eum quasi leprosum, & percussum a DEO & humiliatum!

2. *Dolores Christi erant crudelissimi & sine comparatione majores, quam ullus unquam homo passus est.* Duplex est causa: prima teneritudo corporis: nam, ut docet S. Bonaventura, corpus illius in ipsis plantis erat tenerius, quam pupilla oculorum in aliis hominibus. *Secunda:* quia eadem illa membra acerbissime cruciabantur, quæ maxime erant sensibilia. O quantus fuerit dolor, dum spinæ tam alte in caput adigerentur, ut non solum cutem, sed caput, & nervos penetrantes per aures, oculos exirent! quantus fuerit dolor, dum clavi ferrei tam validis malleorum ictibus manibus, pedibusque incuterentur, ut nervi & ossa conquassarentur! quantus dolor fuerit, dum totum corporis pondus e clavis & nervis læsis penderet!

3. *Dolores Christi erant sine ulla refocillatione.* Pendebat jam una, & altera hora e cruce, omnis fere sanguis effusus erat, & sitis Illum acerbissime cruciabat, dum clamaret, & potari peteret! Ah! quam vilis, & exigua refocil-

refocillatio fuisset haustus aquæ? Sed nec iste concedebatur: verum hujus loco acetum felle mixtum porrigebatur, ut quemadmodum reliqua omnia tormenta, & hos ultimos angores sine ullo levamine sustineret!

A F F E C T U S.

Gratiarum actionis. Nescio mi JESU! quid dicam, aut cogitem, dum Te ita patientem intueor! Si Tu, mi JESU, tot peccata, quot ego commisisses, si toties Patrem tuum cœlestem offendis, & infernum, ut ego, promeritus fuisses, an plus pati, vel majorem poenitentiam agere potuisses, quam revera egisti? Hæc omnia non propter peccata tua (tu enim essentialis sanctitas peccare non poteras:) sed propter mea passus es! Fides docet, te propter scelera mea sanguinem fudisse, flagellis dire concisum, ut stultum explosum, & tandem ut malefactorem in cruce mortuum fuisse! O JESU! amabilissime JESU! quanta hæc tua bonitas & misericordia! Utinam mille linguas haberem ad Te, ut vellem, & deberem laudandum, & benedicendum! Infinitas igitur Tibi gratias ago pro singulis guttis sanguinis quas pro me fudisti, pro omnibus alapis, & flagellorum ictibus, pro omnibus doloribus, & tormentis, quæ pro me sustinuisti!

Propositi.



Propositi. Sed an hoc sufficiet? JESUS Christus pro me non solum oravit, sed etiam passus est! pati, pati debeo, si amoris illius respondere desidero! Agnosco, æquum hoc esse, & ideo en sacrificium, quod Tibi irrevocabiliter offero! 1. Tu nosti, o mi JESU, quos mihi dolores, morbos, afflictiones immittere decreverit Pater æternus! En! jam hoc momento adoro has Illius de me dispositiones, & desidero, ut in me quam perfectissime impleantur 2. Tu nosti, mi JESU, quando & quo mortis genere decreverit, me ex hoc mundo ad se evocare, en! jam nunc adoro hoc illius de me decretum, & me Illi ex corde subicio: volo pati, volo mori, & quidem ex puro tui amore; sicut ex amore mei passus & mortuus es!

P. II. *Quam magni & acerbi erant Christi dolores, tanta, & tam mira erat Illius patientia!* Circumstantiæ, ex quibus id colligere potes, sunt sequentes.

2. *Christus dolores suos pertulit cum silentio, & sine ulla querela.* Spiritus sanctus, dum de Christo loquitur, comparat Illum cum Agno: Nam quemadmodum innocuum hoc animalculum se tonderi, aut ad macellum duci sinit, quin se opponat, vel clamet,

met, ita JESUS se maximis tormentis excruciaci, & rapi ad crucem permisit, quin resisteret, vel minimum querularetur. Flagellabatur JESUS, & toto corpore dilaniabatur; Ille vero tacebat! Caput acutissimis spinis configebatur; Ille vero tacebat! Crux humeris imponebatur, quam cogeatur extreme debilitatus bajulare; Ille vero tacebat! Perforatis ferreis clavis manibus pedibusque in crucem agebatur; Ille vero tacebat! Obmutui, inquit per Prophetam, & non aperui os meum! Ita JESUS inter extremos dolores! quomodo tu?

2. *Christus dolores suos pertulit cum mansuetudine, & sine ulla impatientia.* Nunquam fuit homo ullus, qui justiores irascendi causas habuisset quam Christus in Cruce! causæ erant hæ, *prima:* commune odium: Circumstabant circa crucem multa hominum millia, quorum corda omnia Christo patebant: sed in omnibus nil, nisi odium sui, gaudium ob dolores, & mortem vidit, & desiderium, ut nomen, & memoria sui eradatur de terra viventium! 2. *Risus & blasphemix scribarum, & Phariseorum,* qui agitabant capita sua, & illi e cruce pendenti inelamabant: Vah! qui templum DEI destruis, & in triduo illud reedificas! Alios salvos facit



fecit: se ipsum salvare non potest! si filius DEI es, descende de cruce, & salva te ipsum! An justior irascendi causa excogitari potest, quam sint hæ blasphemiæ inter crudelissimos dolores in Illum conjectæ? Quid autem Christus? nec propter dolores, nec propter blasphemias ad impatientiam commovetur! patitur, & patitur cum perfectissima resignatione: patitur cum ardentissimo & perfectissimo amore, ita, ut cor illius magis affecerit exitium suorum inimicorum, quam proprii sui dolores! ideo ad mulieres illi compatientes ait: Filiæ Jerusalem! nolite flere super me: sed super vos ipsas flete, & super filios vestros!

3. *Christus suos dolores pertulit non solum constanter, sed etiam cum desiderio plus patiendi!* Christus pendet e cruce: vires omnes sunt exhaustæ: dolores ascenderunt gradum extremum: corpus vix jam violentiæ mortis resistere potest! Sed quale est cor Illius? inspicere illud, & admirare Ejus fortitudinem! Duplici amore, duplici desiderio flagrat. Amat Patrem suum Cælestem, & ideo desiderat novas vires plus pro illo patiendi! Amat nos homines & ideo desiderat diutius vivere, ut diutius pro nobis pati possit! Et ille est sensus illorum verborum JESU Christi!


Pater!

Pater! ut quid me dereliquisti! quasi diceret:
Pater! quare me non confortas, ut diutius
vivere, & plus pati pro Te valeam!

A F F E C T U S.

Confusionis sui ipsius. O quæ Confusio, quis
timor invadere me deberet, o mi JESU!
dum Te e cruce pendentem intueor. Ah quid
peccavit venerandum Salvatoris mei caput,
ut tot, tamq: acribus spinis undique configere-
tur? quid peccastis o castissimi oculi, ut san-
guine suffusi rubeatis? quid peccastis omni-
potentes manus, pedesque, ut tam crudelibus
clavis pertunderemini? quid peccasti o ama-
bilissimum cor! ut lancea transfixum altum
hieres? Ah! JESUS est innocens, innocens
est, quidquid Illius est. Caput est innocens,
in quod nulla unquam minus recta cogitatio
subivit! Innocentes oculi, quorum obtutus omnes
sancti! Innocens lingua, quæ nil unquam nisi ad
gloriam sui cœlestis Patris protulit! Innocentes
manus, quæ nunquam, nisi ad utilitatem proximi
extendebantur! innocens cor, in quo nil, nisi ar-
dentissimus amor habitavit. Cur ergo tot ac
tanta tormenta? Me infelicem non ob sua,
sed ob mea peccata patitur, quidquid patitur,
mea peccata Illum toto corpore tam fæde
dilaniant, mea peccata Illum cruci affixe-
runt, & vita privarunt.

Agnitio.



Agnitionis & propositi. Et postquam hæc omnia feci, pati nolo, imo, quod malitiam meam auget, nec agnoscere volo, quod pati merear. Ah! nunc agnosco mi Jesu! nulla est pœna, nullus in mundo dolor, nullum in inferno tormentum, quod promeritus non essem. Quidquid hucusque passus sum, parum est ad satisfaciendum pro unico peccato, quo te offendi: quidquid imposterum patiar, parum est ad satisfaciendum pro unica iniuria, quam tibi intuli. Quam injustæ ergo sunt querelæ meæ, & murmuraciones, dum semper minus patior, quam meritus sim? An non hæc ipsa causa est justissima, me, meamque voluntatem sine ulla exceptione tibi mi JESU, subjiciendi, & tuas circa me dispositiones medios inter dolores, afflictiones, & cruces laudandi? Æquissimum est, & ita imposterum faciam!

MEDITATIO SECUNDA.

DE CONTUMELIIS & INIURIIS A IESU

CHRISTO TOLERATIS.

2. **P** Nunquam fuit homo ullus, qui tam enormes contumelias, & injurias passus est, & nunquam erit ullus, qui tam enormes

mes patietur, ac JESUS Christus passus est! Impossibile est omnes Christo illatas injurias unica meditatione concludere: aliquas tantum illarum species hic recole, & sufficient, opinor, ad confundendam tuam superbiam!

1. *Injuriarum species erant falsæ accusationes.* Certum est, animo nobili, & generoso nil accidere posse gravius, quam falsa criminis impactio, de quo nec cogitavit quidem. Confer te nunc anima mea ad Prætorium Annæ, & Caiphæ, & audi, quam execranda de Christo crimina in medium proferantur! Testes adfunt, horrendas blasphemias confirmantes: dicunt Christum esse potatorem, convivii inhiare, & cum peccatoribus publicis conversari familiariter: Esse Virum superbissimum, qui plane se ipsum DEUM facere non erubesceret! Disseminare doctrinam impiam, reducere Idololatriam in Israel! Operari illum mira dæmonis ope, quocum, utpote Magus, familiariter ageret! Esse seductorem, qui populum electum perditum cuperet! Ita coram summis Sacerdotibus, ita coram Pilato, ita in compitis, & plateis urbis frequentissime de Christo loquebantur!


2. *Inju.*



2. *Injuriarum Species erant irrisiones & illusiones.* Non suffecit impiis JESUM tanquam facinorosum & blasphemum accusasse: etiam tanquam mente captum proclamarunt. En! stant ante Thronum Regis Ethnici, & quia ex infinitæ suæ sapientiæ legibus tacet, tanquam stultus irridetur! Quanta mihi, ait Herodes, de homine isto narrâstis? ego illum mente captum judico! Hoc dicto, veste alba induto JESU illuserunt, & illum inter mille ludibria, & cachinnos petulantis plebis per urbem circumduxerunt! Opprobrium hoc gravius aliud excepit in Palatio Pilati! Corrupti a Judæis Milites JESUM petulanti modo habebant deridiculo. Injiciebant humeris Ejus vestem, vel potius laciniam purpuream; sceptri loco in manus dabant arundinem, capiti coronam spineam imponebant, alapis illum cædentes, conspuebant, & genu flectentes coram illo Regem inter sanâs, & ludibria Salutabant! Interim obstupefcente tam inauditas injurias Cælo, & flentibus amare Angelis, innumerabilis populus hoc spectaculo exhilaratus plaudit, & effuso risu, & clamore injuriam Christo exasperat!

3. *Injuriarum species erat contumeliosa condemnatio ad mortem.* Pilatus ad liberandum JESUM, de cujus innocentia illi constabat, addu-

adducit extra suum Palatium in loco elatiore coram congregato populo duos accusatos JESUM, & Barrabbam, & interrogabat, quem ex his vita donatum vellent! Non dubitavit Pilatus, omnes JESUM præ Barrabba electuros, sed spe sua deceptus est. Totus enim Populus exclamavit: non hunc, sed dimitte nobis Barabbam! Quid? Barabbam, hominem sceleratum, homicidam vobis dimitti vultis? Ita est, dimittatur Barabbas; JESUS morti adjudicetur! Quando igitur mori debet JESUS, qua vultis illum morte mori? an non satis fiet furori vestro, si gladio pereat? Non: morte turpissima pereat, in cruce, duos inter latrones medius pereat, sciatur, illum esse omnium facinorosissimum! Ita vult populus, ita judicat Pilatus! Trahitur ergo innocentissimus JESUS ad mortem crucis, exultantibus præ gaudio Sacerdotibus, inter blasphemias innumeras illum comitantibus Phariseis, subsannante amare populo! Impleta hic sunt, quæ in persona Christi prædixit Propheta! Ego autem sum vermis, & non homo, opprobrium hominum, & abjectio plebis! Subsiste modicum anima mea, & responde mihi ad sequentes quæstiones: 1. An DEUS Pater injustam sententiam tulit, dum Filium suum unigenitum tantis contumeliis, & injuriis objecit? Non.



Non. JESUS peccata nostra in se assumpsit: & peccata hæc omnia merebantur. 2. An iniuste tecum ageret DEUS, si tantis te contumeliis, & injuriis, quantis Filium suum afficeret? Non: peccata merentur, hoc vides in JESU, & quod peccaveris, dicit tibi conscientia. 3. Si credis, quod peccatum tales contumelias, & injurias meretur, & si scis, te peccasse, an non est intolerabilis superbia, minimum contemptum perferre nolle? an non est intolerabilis ingratitude, nolle amore JESU exiguam injuriam pati, dum ille amore tui tot, & tantas lubens pertulit?

A F F E C T U S

Admirationis humilitatis Christi. O JESU quam mira est tua humilitas! Tu es infinita sapientia, Cælum, & terram gubernans, & pro stulto haberis! Irrideris tamquam Rex fictitius & conspueris tamquam omnium hominum vilissimus! Tu es infinita sanctitas, a qua omnes gratiæ Cælestes profluunt, & judicaris hypocrita, & potator! accusaris tamquam blasphemus, & seductor; diceris Samaritanus &c. Hæc omnia suffers, & quomodo? cum silentio, sine ulla querela, mira cum mansuetudine, cum perfectissima subjectione, & sine minima adversus ordinationes DEI repugnantia! Hoc revera est sacrificium, in quo sibi
Pater

Pater Cœlestis infinite complacere debet; est sacrificium, quod omnibus totius mundi hominibus humilitatem persuadere potest!

Confusionis sui ipsius. Sed hæc ipsa tua humilitas, o mi JESU, quam abominabilem reddit coram oculis tuis meam superbiam! Ego miser, in cujus intellectu nil nisi tenebræ, & cæcitas, ego prudens haberi & doctus volo, dum JESUS per plateas deridendus raptatur! Ego, cujus cor plenum est peccatis & immunditiis, volo honorari, dum JESUS tanquam seductor, blasphemus, & dæmoniacus proclamatur! Ego, in quo nec unica vera virtus, desidero amari, & aliis præferri, dum JESUM latroni postpositum, & morti turpissimæ adjudicatum video! tanta superbia quam execrabilis esse debet in conspectu Redemptoris mei? O JESU! miserere mei, & cordi meo infere alia sensa!

P. II. *Nunquam homo ullus contumelias, & injurias, sicut JESUS pertulit!* Humilitatem vere miram, qua Christus injurias omnes, & contumelias pertulit, Propheta regius his verbis descripsit: factus est sicut homo non audiens, & sicut mutus non aperiens os suum! ex paucis his verbis magnitudo & perfectio humilitatis abunde colligitur. Expende tantum obiter hoc silentium, & habebis, quod obstupeas.

1. Chri-



1. *Christus erat innocens.* Nunquam aut cogitavit, aut locutus, aut operatus est, quod vituperari juste potuisset! Crimina, de quibus accusabatur, conficta erant ab impiis: Et JESUS, si loqui voluisset, innocentiam suam cœlesti sua facundia sole clarius ostendere, & inimicos suos confundere, & elingves redere potuisset!


2. *Christus erat omnipotens.* Unico verbo fuisset opus, ut fulmina de cœlo caderent, omnesque illius hostes in abyssum detruderent. Unico verbo fuisset opus, & omnes homines Divinitatem Illius absconditam agnovissent, & Jerusalem Illum tanquam desideratum tamdiu Messiam adorasset!

3. *Christus erat Omniscius.* Sciebat, abufuros silentio suo inimicos, nec quieturos, donec morti crucis adjudicaretur. Sciebat Matrem suam, suosque Apostolos propter hoc silentium multis calamitatibus, & injuriis involvendos. Sciebat, propter hoc silentium patrata a se miracula deridenda, doctrinam suam tanquam erroneam condemnandam, & Ecclesiam suam novam mille persecutionibus impetendam fore! Omnes hæ tam graves causæ permoveere Illum non valebant, ut ad sui defensionem vel unicum verbum proferret! Tacuit, & usque ad ultimum vitæ suæ habitum tacuit.

O JESU! JESU admirabilis! quam mirum est hoc tuum silentium! quam sublimis hæc doctrina, quam rarum exemplum! Sed quam pauci sunt, qui illud imitentur! Ubi sunt illi, qui injuriis, & calumniis laceßiti cum JESU obmutescunt! Ad omnia reliqua facilius se resolvunt homines! orant, meditantur, jejunant, se mortificant, &c. Sed tacere ad injurias, amare opprobria, calumnias, hoc est onus, cui portando pauci admodum pares sunt! Interim tamen verum manet, exemplum Christi solum esse viam ad sanctitatem, & sine illius imitatione spem nullam superesse ad perfectionem pertingendi!

A F F E C T U S.

Æstimationis & amoris contemptus. O mi JESU! quam mira, & omni humana sapientia altior est hæc tua doctrina! Tu consideras contemptum, injurias, opprobria, tanquam rem bonam, & amore dignam, & licet obtinere tantum honoris potuisses, quantum probri, & contemptus passus es, magis contemni, quam æstimari desiderasti! Eundem & ego impostertum cogitandi modum assumam; æstimabo, quæ tu amasti, & contemptum considerabo tamquam rem, quæ hostem meum maximum, superbiam nempe annihilat; tamquam rem, quæ me ad cor mei JESU,
N deducit,



deducit; tamquam rem, quæ pulcherrimam gloriæ meæ partem in Cælo efficiet.

Doloris & propositi. Vah! quæ mea cæcitas? quoties optavi, ut DEUM amare, prout Seraphini queam? quoties optavi, ut DEO meum amorem probare, & perfectum, amænumque illi offerre sacrificium possim? quod autem esse potest sacrificium DEO magis placens, quam famam, & honorem proprium illi immolare, & patienter perferre contemptum? &c. Quare ergo non feci? quare, toties optimam occasionem, DEO gratissimum sacrificium offerendi, omisi? Erravi ergo, o mi JESU! contristatus sum, ubi lætari debuifsem! fugi, quod quærere, murmuravi, ubi tacere oportuisset! Imposterum faciam, quod te fecisse confusionis tuæ, & injuriarum tempore novi: ut cognoscat mundus, quod Patrem diligam. Surgite, eamus: hæc erant effata tua, dum passio appropinquabat: ita & ego mihi dicam occurrente contemptu, &c ut cælum videat, quod JESUM meum amem: Surge anima mea! & perfer cum gaudio contemptum, illusiones, &c:




MEDITATIO TERTIA.

DE MIRABILI AMORE, QUEM JESUS IN
CRUCE ERGA SUOS INIMICOS PRÆSETULIT.

I. P. *Amor JESU est miraculum amoris
in consideratione hostium, quos diligit.*

Conscende montem Calvariæ, & considera,
imo specta oculis tuis miraculum amoris,
quod hic accidit! En! JESUS pendet e cruce,
corpus totum plenum est vulneribus, & San-
gvine: dolores sunt immensi: mors prope
est: post tres horas Christus expirabit. A JESU
verte oculos tuos in circumstantes! En!
circumstant multa millia, juvenes, & Senes,
nobiles, & ignobiles, Judæi, & gentiles,
Pharisæi & scribæ, Seniores populi, & Sa-
cerdotes, infinita propemodum multitudo
omnis status, & sexus. Præter paucos, qui
Christo condolent, omnes sunt illius inimici,
& persecutores! Perpende jam aliquas odii,
& crudelitatis circumstantias, & ex his cog-
nosces, quam difficile Christo accidere de-
buerit, tales barbaros diligere.

*Prima circumstantia est exultatio suorum
inimicorum! Tu non debes tibi proponere
JESUM tanquam purum hominem, sed
tanquam DEUM hominem, qui omnium*




præsentium corda intuetur, & cogitationes occultissimas videt! Quid ergo videt in illis? Aliqui lætantur, & ex intimo corde exultant, quod JESUM e cruce pendentem videant! advenit tandem, dicunt intra semetipsos, exoptata diu hora, qua deceptorem hunc meritis luere pœnas conspiciamus! Alii approbant latam contra illum sententiam, & dicunt: convenire optime tali seductori, & Blasphemo hoc mortis genus inter duos latrones obbeundæ! Hi pascunt suos oculos in vulneribus, & doloribus illius, & exultant, quod extrema siti laboranti præter fel & acetum nihil porrigatur! Illi avidè expectant illius mortem, & optant, ut nomen Christi toto orbe deleatur! Hæc omnia videt JESUS, videt in cordibus millenis, videt in cordibus illorum, quorum amore descendit de cælo, in quorum bonum tot patravit miracula, pro quorum salute in cruce moritur!

2. *Circumstantia est illusio suorum inimicorum!*
Commiserationem habere cum homine misero, cum morte luctanti, vel carnificis manu jamjam trucidando, res est, quæ etiam scelestissimis non denegatur. Compatimur naturaliter homicidis, & latronibus, dum eos in ferali pegmate conspiciamus: in suspiria & lachrymas, compassionis nostræ testes, fre-

frequenter prorumpimus! Longe aliter agitur cum Christo! quò majores sunt illius in cruce dolores & cruciatus, eo petulantius illi illuditur! Vah! dicunt aliqui, qui destruis Templum DEI, salva te ipsum! Filium DEI se fecit, ajunt alii, veniat nunc, & liberet eum! Alios salvos fecit, clamant sacerdotes, se ipsum salvare non potest! Si est Rex Israelis, descendat nunc de cruce, & credimus ei! Descende de cruce, dicunt Milites &c.

Tertia circumstantia, est pertinacia, & obstinatio suorum inimicorum. Non accidisset Christo difficile, diligere suos inimicos, dummodo suum tetrum facinus, suam impietatem agnovissent, & detestati essent! Sed obstinatio illorum erat nimis magna. Nihilominus summa patientia suos dolores pertulit JESUS; ignovit inimicis suis mira cum mansuetudine; cælestem Patrem suum pro illis exoravit. Ipsa Elementa testabantur innocentiam Christi; Cælum quodam quasi peplo obducitur, Sol obscuratur, terra tremit &c. Hæc omnia oculis suis vident, an tamen propterea cessant JESUM persequi? nequaquam; illudunt, blasphemant, opprobriis illum satiant ad ultimum usque halitum! Non fuisset JESU difficile, amare suos inimicos, dum-



dummodo prævīdisset, illos saltem post mortem suam se persequi cessaturos! Verum nec hoc solatium habuit: prævīdit, plerosq; miracula post resurrectionem suam futura derisuros, & negaturos: prævīdit, persequendos ab illis Apostolos nomen suum annuntiantes; prævīdit, perseveraturos in obstinatione, & se in ipso inferno magis blasphematuros per totam æternitatem, quam ipsos diabolos. Tam impios & perditos homines amare, quam est difficile? Amavit tamen, amavit ex corde, amavit efficaciter, & sanguinem suum omnem pro illorum salute fudit! Nunc converte oculos in te, & interroga: qui sunt illi, quos amare sincere tibi accidit difficile? Suntne falsi testes, qui in judicio de pessimis criminibus accusant? Suntne Sanguinolenti latrones, qui te cum Christo in Crucem agere volunt? Suntne jurati hostes, qui de miseriis tuis lætantur, & in ipsis tuis doloribus, & morbis, felle, & aceto, ut Christum, te potant? Nequaquam: plerumque sunt illi, qui non tam affabiles se tibi, ac optas, exhibent, qui verbulo mordaci lædunt, &c. & hos amare potest tibi esse difficile, dum JESUS suos crucifixores amat?

A F F E C T U S


Confusionis sui ipsius. O JESU! quantus, quam

ma-

magnanimus est amor tuus! quam debilis contra, & exiguus est amor meus! Cor tuum omnes, qualescunque homines complectitur; & amor tuus nullo injuriarum genere extingvitur! Versantur ante oculos tuos homines, qui jam a pluribus annis plusquam diabolico odio te oderant: homines, qui te tamquam malefactorem pessimum execrantur, & blasphemant, qui te toto corpore crudelem in modum dilaniarunt, qui tibi vel in maximis doloribus adhuc illudunt! Hæc omnia vides, audis; nec tamen omnia ad extingvendum erga illos amorem tuum sufficiunt: ex tot inimicorum millibus nec unus est, quem non amares, pro cuius salute mortem, & sanguinem tuum non offerres! ita fortis & magnanimus est amor tuus! Sed qualis est meus? Ah! nec nomine dignus est, cui extingvendo verbulum mordax, vultus non satis affabilis, minima injuria sufficit!

Doloris. Ergo sum homo, in quo amor non est! quam tristis est hæc cogitatio? Sum homo sine amore! ego, quem JESUS præ tot hominum millibus elegit, ut illum sequer & imiter! ego, qui sponte mea mundo valedixi, ut sponso Crucifixo adhæream! ego, qui in Religione tanto jam tempore in dies singulos exempla Christi etiam crucifixores suos

aman-



amantis meditor; ego sum homo, in quo amor non est! Et hoc post tot vocationis meæ annos! post tot inspirationes, lumina, media &c. O quot causas habeo meam tepiditatem execrandi?

P. II. *Amor JESU est miraculum amoris in consideratione circumstantiarum, in quibus amat!* Vidisti hucusque anima mea, circumstantias odii illius inauditi, furoris, & crudelitatis, qua impii JESUM persecuti sunt; Perpende nunc etiam circumstantias amoris, quo JESUS illos etiam furentes persecutus est.

1. *Circumstantia Temporis, quo JESUS pro suis inimicis oravit.* Cum pluribus JESUM in cruce loqui oportuit! cum suo cœlesti Patre, ut suum illi spiritum commendet! cum charissima sua Matre, cui dilectum suum discipulum Joannem, cui curam Matris optimæ demandare voluit: cum circumstantibus, ad obtinendam in extrema siti refocillationem. Quid omnium primum locutus est? Dilectissima Mater debuit expectare, fidelis discipulus debuit cedere: necessitatis propriæ quasi oblitus est. Primum verbum, quod JESUS in cruce profert, in bonum suorum inimicorum profert: Pater ignosce illis!

2. *Circumstantia est molitia inimicorum etiam ardentissimo JESU Christi in illos amore non emollita.*

emollita. Poterat, imo, ut videtur debebat quodammodo JESUS suam pro venia inimicorum orationem differre, donec illi scelus suum agnoscerent, & Christum deprecarentur! Distulisset utique, si amor illius tuo non fuisset ardentior. Sed Cor illud benignissimum, amor ardentissimus fuit. Ego amo, ait JESUS, & ignosco, nunc hoc momento, quo blasphemias illorum audio, dum effectus furoris illorum sentio! nunc ignosco illis, nunc pro illis oro, & sanguinem meum offero.

3. *Circumstantia est excusatio, quā Christus in sua ad Patrem oratione utitur.* Negari non potest, quin Judæi Christum crucifigendo flagitium enorme, & in Cœlum clamans commiserint! tot miracula, quæ suis ipsi oculis conspexerunt, innocentia vitæ, quam ipse Pilatus, licet Gentilis, agnovit, quin ipsæ accusationes confictæ, & testimonia non coherentia satis clare illorum improbitatem & malitiam manifestabant. Hoc tamen non obstante orabat JESUS! Pater, ignosce illis: nesciunt enim, quid faciunt; quasi diceret: mi Pater! ego non dico, quod non peccaverint; sed malitia eorum non est tanta! Elevat multum, & extenuat scelus illorum igno-



ignorantia! Ideo, mi Pater, oro te, ignosce illis, prout ego ignosco, & ama illos, sicut ego amo. Anima mea! perpende bene exemplum Christi, & disce amare! Quid ergo vidit in suis inimicis, quod allicere illum, & movere ad amandum poterat? vidit in illis naturæ infirmitatem, ad omne malum pronam, & ideo misertus est illorum: vidit in illis pretiosam animam, a Patre cælesti ad Suam imaginem creatam, ad fruitionem gloriæ vocatam; & ideo amavit illos, & noluit, ut tam nobilis Creatura propter se privetur æterna felicitate; vidit in illis sapientissimam sui Patris æterni ordinationem, qui sibi per manus suorum inimicorum calicem pro salute mundi bibendum porrigebat; & ideo amavit illos, & omnia ab illis patienter acceptabat! tandem vidit se ipsum innumeris peccatis sponte in se susceptis onustum, quæ Divina justitia per inimicos suos in se castigabat, & ideo amavit illos, & pro illis oravit.

A F F E C T U S.

Doctoris. O mi JESU! nunc scio, cur mihi hucusque difficile acciderit, amare illos, qui me offenderunt! Nunquam illos, quibus debui, oculis aspexi! Si illos, qui me offenderunt, semper considerassem tan-

quam



quam homines, per quos cælestis Pater paratum mihi a se calicem porrigit, tanquam homines, per quos iustitia Divina mea peccata punit, | o! quot actus perfectissimi amoris elicuissem! quam simile nunc jam esset cor meum cordi Christi? Sed quale est nunc cor meum? qualis meus amor? Ah! præ verecundia nec loqui, nec te aspicere audeo! sed quid tacere juvat! melius est, fateri proprium dedecus, & humiliter deprecari! Ah! mi JESU! Exempla tui amoris perpendi sæpe, miratus sum, laudavi aliis, sed imitatus sum nunquam!

Propositi, Et petitionis gratiæ. Sed quid fiet imposterum? o mi JESU! per tuam gratiam aliter nunc sentio: amabo ex corde offendentes me, perferam illos cum mansuetudine, & silentio, malis bona reddam. Ita amavit JESUS: ita debeo, & volo ego quoque amare! Sed quomodo hoc faciam, si non illuminetur intellectus meus singulari lumine, & cor meum singulariter corroboretur? ad te itaque venio, o amor meus crucifixus, & Magister unicus veræ charitatis; te obtestor per admirabilem illam mansuetudinem, qua tuis inimicis ignovisti; per illam amore plenam orationem, quam pro illis Patri obtulisti; per pretiosum sanguinem

guinem pro illis effusum! Da mihi amorem, quo omnes homines propter te complectar; amorem, qui omnia sustineat, & bonis mala compenset!

CONCLUSIO TERTIÆ HEBDOMADÆ.

ET PRÆPARATIO AD VIAM UNITIVAM.

Hic attingimus punctum, ex quo in vita spirituali omnia dependent. Resolutio facienda est, JESUM perfecte sequendi, & cum illo derelictiones & amaritudines cordis, dolores, & incommoda corporis, contumelias, & injurias ab hominibus patienter ferendi! Qui tantum animi non habet, hac via ambulandi, DEUM nunquam inveniet, & multo minus ad perfectum & purum illius amorem pertinget; qui tamen finis est horum Exercitiorum, & totius vitæ nostræ. Perpende ergo attente sequentes veritates, & resolve te generose, hanc viam cum crucifixo Deo homine ingredi, & in illa perseverare, quamdiu illi placuerit.

1. *Veritas: Via passionis est via Sublimissima, quâ incedere potest anima.* Finis, ob quem unigenitus DEI filius in hunc mundum venit, est duplex: ut imo cælesti Patri dignum infinita illius altitudine sacrificium amoris

amoris, & honoris maximi offerret: & ut
 2do exemplum maximæ sanctitatis homini
 daret, ad quam tendere debéret. Ad hunc
 finem tam sublimem assequendum quam
 viam elegit JESUS? viam passionis, & qui-
 dem passionis, quæ a primo conceptionis
 momento, usque ad ultimum vitæ in cruce
 immolandæ momentum duraret! Ergo fa-
 tendum est, viam passionis esse omnium
 sublimissimam, aut dicendum, Christum ipsum
 non ambulasse sublimissima sanctitatis via,
 nec illam hominibus ostendisse.

2. *Veritas: Via passionis est utilissima, qua
 incedere potest anima:* omnes fructus, qui hac
 via inveniuntur, adducere est impossibile: quod
 breviter dici potest, accipe sequentibus: Duo
 requirit DEUS ab anima humana, antequam
 illam ad sui unionem admittit, & dulcedinem
 sancti sui amoris sentire sinit; perfectam cordis
 puritatem, & virtutum possessionem. Ad utram-
 que obtinendam non est aptior ulla, quam
 via passionis: & quidem primo, quod cordis
 puritatem concernit, res probatione non eget:
 nam, cum anima in via passionis nullam
 consolationem inveniatur, quam solum DEI bene-
 placitum, sensum creaturis se abdicare discit,
 & contemnere omne creatum solatium, & cor
 suum cum omnibus affectionibus in solum sum-
 mum



mum bonum, in quo solo vera animæ quies, dirigere. Eodem modo via passionis valde utilis est ad obtinendam virtutum possessionem perfectam: nam, cum anima tempore passionis virtutes exercere non potest, nisi per generosam sui victoriam, brevi tempore cordi profunde imprimuntur, & ad perfectionem pertingunt! Et hæ sunt præcipuæ duæ causæ, cur nullus citius ad intimam cum DEO unionem pertingat, quam qui a DEO per viam passionis ducitur.

3. *Veritas: Via passionis est via securissima, qua anima incedere potest.* Illustrationes, & consolationes multos jam deceperunt; passio neminem. Dabantur non raro animæ; quæ solatiis, & illustrationibus abundantes, cælestem vitam agere videbantur; sed quia nec in humilitate, nec in aliis virtutibus fundatæ erant, evanuerunt in cogitationibus suis, & in abyssum devolutæ sunt. Tale quid metuendum non habent, qui via passionis incedunt, quæ semper utilis & segura est. Hic perfectissimæ virtutes, humilitas, mansuetudo, amor, resignatio in voluntatem divinam excoluntur, & fundamentum solidum ponitur, cui maxima sanctitas & illustres gratiæ divinæ tuto inniti possunt. Hic est vera Christi imitatio, & via, quam ille nobis verbo, & exemplo ostendit, qui

ambula-

ambulavit ipse, & in qua errare nemo potest. Perpendis bene his veritatibus considera etiam, quæ exercitia in via passionis necessaria sint.

Exercitium 1. Per multiplices meditationes certas veritates, & principia alte imprimere debes menti tuæ, quibus te tempore passionis excites. Ejusmodi principia sunt: 1. nunquam tantum pati possum, quantum meretur DEUS: nam, si etiam per 100. annos omnes possibiles adversitates paterer, quid hoc esset respectu illorum, quæ infinitum bonum meretur? 2. nunquam tantum pati possum, quantum Christus mei amore passus est! 3. nunquam tantum pati possum, quantum per peccata mea meritus sum: nam quæ, quantacunque calamitas comparari potest cum inferno, quem promeritus sum? Hæ veritates tam sæpe, & tandiu perpendendæ sunt, donec in omni occasione aliquid patiendi se vivaciter menti representent.

Exercit. 2. Parvæ, & quotidianæ adversitates cum silentio perferendæ sunt, ut per hoc ad tolerandas majores cordatus & aptus fias. Si quid tale tibi contingeret, sis illico sollicitus 1. ut unum ex prædictis principiis attentamente revolvās. 2. Ut totam rem per actum amoris ferventissimum, & perfectissimæ intentionis DEO offeras. 3. Ut taceas, nec erga ullum vel verbo queruleris.

Exer-




Exercit. 3. In gravibus, & diuturnis adversitatibus debes te DEO in holocaustum offerre! Ad hoc requiritur 1. ut te mane quotidie voluntati Divinæ, ejusque de te ordinationi sanctissimæ perfecte subicias, & istum actum sæpius de die renoves. 2. Ut omni hora passionem tuam cum intensissimo amore, & intentione perfectissima DEO offeras. 3. ut neque contra dispositiones DEI, nec contra hominem ullum murmures, vel queruleris. 4. Ut hos inter actus cum patientia & fiducia filiali in DEI bonitate tempus tuæ liberationi destinatum exspectes. En! hæ sunt præclaræ illæ virtutes, quæ perfectam Christi sequelam constituunt, & viam sternunt ad intimam cum DEO unionem! Quæ si tibi placent, procide in genua, & te JESU crucifixo hoc, vel simili modo immola:

O JESU! amabilissime JESU! quantum miraculum video, dum te e cruce pendentem intueor! Essentiale gaudium, essentialis felicitas tristatur! summa innocentia & sanctitas est ad mortem condemnata! Infinita Majestas pendet e cruce duos inter latrones media! Imensus amor odio habetur! Et hæc omnia pateris pro me! pro me est ille sanguis, quo innocens corpus tuum rubet; pro me sunt illa vulnera, illa tormenta, illæ contumeliæ,
& illu-



& illusiones, quas pertulisti! Hæc credo, & tamen te non amo, o mi JESU! o maledicta tepiditas, & insensibilitas cordis mei unde oriris? Ah! novi causam! meipsum nimis amo: vim mihi inferre nolo: nolo pati! dum ergo hoc modo nimis me amo, nullus pro te mihi superest amor, o crucifixe JESU! Sed quid? an semper talis ero? an nunquam mihi ipsi moriar? an nunquam me resolvam pati aliquid amore mei JESU! O DEUS meus! quam turpis, & execrabilis est talis vita! Sum homo, qui æterno igne cremari meritus est, & parvum incommodum ferre nolo! sum homo, qui meritus est, ut in æterna desperatione in inferno vivat, & parvam cordis desolationem sustinere recusos! Sum homo, qui dignus est ab omnibus creaturis æternum maledici, & tolerare parvum contemptum nolo! sum homo, qui ex merito cum diabolis, & damnatis habitare æternum deberet, & parvam a proximo meo injuriam ferre nolo! Quantum pro me dedecus! quanta hæc erga te ingratitudo, o mi JESU! Ah! nunc agnosco, quæ tua, o mi JESU, est gratia, quam male egerim hucusque! pœnitet me tepiditatis meæ tam enormis, & paratus sum, vestigiis tuis insistere! Ad Te ergo confugio.---



DIES OCTAVUS


Hodie incipit quarta hebdomada Exercitiorum. Ut finem hujus hebdomadæ assequaris, oportet, ordinem, & connexionem, seu æconomiam totam Exercitiorum bene penetres. Prima ergo die perpendimus finem nostrum ultimum, & statuimus illum quærere, quantumcunque constet. Quia vero ad obtinendum finem, qui in eo consistit, ut DEUM in hoc mundo perfecte amemus, & in altero æternum possideamus, tria requiruntur; sequentibus diebus de iis egimus: *Primum ergo*, quod ad obtinendum finem nostrum ultimum requiritur, est: deslere peccata, eradicare passionem malas, & cor purum, & immaculatum conservare: Hæc fecimus hebdomada prima. *Secundum*, quod ad obtinendum finem nostrum ultimum requiritur, est, ut Christum sequamur, & illis virtutibus, quas nos verbo, & exemplo suo docuit, cor nostrum exornemus: Hoc factum est hebdomada 2da. Quia vero hæc virtutes exerceri non possunt, quin magnas difficultates superemus, & nobis ipsis ex integro moriamur, ideo meditati sumus passionem, & mortem Christi, & statuimus etiam in his illum

illum sequi: hoc fecimus hebdomada 3tia. Postquam omnia hæc fecit anima, & sibi ipsi totaliter mortua est, incipit DEUM perfecte amare, & illi uniri, in quo finis noster ultimus in hoc mundo consistit: Ideo dies hodiernus, seu hebdomada 4ta aget de amore. Ingressum ad hunc dabit meditatio de resurrectione JESU Christi, ut nempe intuitu hujus felicitatis omnia terrena contemnamus, omnia adversa pro nihilo reputemus, nosmetipsos in bonis propositis confirmemus, & ita aptos nos reddamus ad unionem cum DEO, amicitiamque perfectam ineundam.

MEDITATIO PRIMA.

DE RESURRECTIONE JESU CHRISTI

I. P. *Quam magna & terribilis erat amaritudo passionis Christi, tam magna, & optabilis erat felicitas resurrectionis. Quatuor erant genera calamitatum, quas Christus passus est, maximos dolores in corpore, extremam tristitiam in anima, intolerabiles calumnias in honore, & amarissimum odium Suorum inimicorum. Jam considera, in quam miram felicitatem omnia hæc mutata sint!*



1. *JESUS resurrexit cum mira corporis pulchritudine.* Ut tibi effingere in animo possis aliquam hujus pulchritudinis ideam, perpende hæc duo: 1. Glorificatum corpus alicujus Electi tantam habet pulchritudinem, ut si in eadem, qua Sol decurrit, orbita compareret, mundum longe clariore lumine, & splendore collustraret, quam lucidissimus hic Planeta; 2. Si pulchritudo omnium Electorum simul sumpta unico corpori a DEO infunderetur, adhuc nihil esset hæc pulchritudo respectu illius, quam habuit corpus Christi! Et hæc o anima mea! illa est facies, quæ ante triduum alapis, & sputis ita erat deformata, ut vix nosceretur: hoc est illud corpus, quod ante triduum tam erat vulneribus oblitum, ut leprosum putari potuisset.

2. *JESUS resurrexit cum immenso gaudio animæ.* Si judicare vis de gaudio benedictæ hujus animæ, debes prius perpendere tristitiam illius præcedentem. Si illa amaritudo, quam anima hæc in monte Oliveti passa est, in tot corda, quot sunt in mundo homines, divideretur, sufficeret ad omnes homines sine exceptione vita privandos! Tanta erat tristitia hujus animæ! Eodem modo, si gaudium, quo nunc fruitur, in tot corda, quot

quot sunt in mundo homines, divideretur, sufficeret ad illos præ multitudine dulcedinis vita privandos! Tantum est illius gaudium, imo incomparabiliter majus.

3. *JESUS resurrexit cum infinita glorificatione honoris!* Quanta mutatio! JESUS nunc est gloria Angelorum, qui de cælo descendunt ad videndum resurrectionis triumphum! Est gaudium Patrum, qui omnes coram illo prostrati illum suum redemptorem venerantur! Est judex vivorum & mortuorum, quem in valle Josaphat omnes damnati, & Electi flexis genibus adorabant; Est corona omnium Electorum, ex quibus nullus erit, qui illum per totam æternitatem non de prædicet! Ille JESUS, hodiè talis est, quem Herodes ante tres dies tanquam fatuum derisit, quem milites tanquam regem ridiculum conspuerunt; quem Judæi ante triduum tanquam malefactorem cruci affixerunt.

4. *JESUS resurrexit cum jucunda fruitione communis amoris.* Silentio hic prætereo illum amorem, quo ab hac die omnes Angelici Spiritus erga illum ardent: nil dicam de amore illo, quo ab hac die Patres antiqui testamenti in JESUM feruntur! De cælo solo loquor: Jbi per totam æternitatem momentum nullum erit, quo omnes
Electi



Electi JESUM non cogitent, JESUM non laudent, JESUM non tenerrime ament.

A F F E C T U S.

1. *Gaudii de gloria Christi.* Transiit nunc tempus passionis tuæ, omi JESU! dies gloriæ illuxit; sanctissimum corpus tuum splendet clarius stellis cæli, & est decus Paradisi: anima tua gaudiis plena est: cor deliciis innatat: gloria tua exaltata est & nomen tuum a cælo, & terra adoratur! Tu es centrum omnium Electorum, ad quod tendunt avidissime, qui in terris vivunt, & quod incolæ cæli cum gaudio amplectuntur. Tua hæc exaltatio, & felicitas maiorem mihi lætitiâ adfert, quam mea propria: gratulor tibi ob illam ex intimo corde: Fruere hac corona tua, & frui in æternum! Dignum & justum est, ut mercede tam illustri potiatur, qui tam generose pro honore sui Patris æterni mortuus est!

2. *Desiderii.* O! quanta esset mea felicitas, si ego olim tali modo resurgerem! nam quis exprimet quid sit intueri amænissimum, pulcherrimum JESU vultum, audire prodeuntia ex paterno ejus ore verba, illum amare, & amari ab illo! illum amplecti, & mutuo ab illo amplexu stringi! esse semper cum illo, & in æternum non separari! Felix hora!

tu es



tu es scopus omnium desideriorum, & affectuum mei cordis!

P. II. *Piæ reflexiones, & resolutiones ex meditatione deducendæ.*

1. *Reflexio.* Quam certum est, **JESUM** gloriosum resurrexisse a mortuis: tam certum est, & nos olim gloriosos resurrecturos, si illum imitemur. Christo in carne passio, ait Apostolus 2. Cor. 4. & vos eadem cogitatione armamini, scientes, quod, qui **JESUM** resuscitavit a mortuis, etiam vos cum **JESU** suscitabit. Quam plena solatii doctrina? ergo his meis oculis, quos nunc habeo, videbo Paradisum cælestem! his meis manibus amplectar **JESUM**! his meis auribus concentum Angelorum audiam! hoc meo ore cælestes olim delicias degustabo! his meis pedibus super astra ambulabo!

2. *Reflexio.* Quam certum est, **JESUM** per passionem, & mortem gloriam resurrectionis suæ obtinuisse: tam certum est, medium ad eandem gloriam perveniendi melius non esse, quam passionem. Ita rursus docet Apostolus 2. Tim. 2. Fidelis sermo; nam si commortui sumus, & convivemus, si sustinebimus, & conregnabimus. Ah! **DEUS** bone! quid tunc, quando dies ille beatus illuxerit, de calamitatibus, & adversitatibus cogitabis



gitabis? O felices dolores, dices, o optati contemptus, o benedictæ desolationes in quantum gloriam me introduxistis!

3. *Reflexio: quo eris tuo JESU conformior in passione: eo eris eidem conformior in gloria resurrectionis.* Audi iterum Apostolum 2. Cor. 1. Sicut Socii passionum estis, sic eritis & consolationis. Adverte benè has duas vuculas: sicut, sic. Significant enim hoc: quo plus cum Christo patieris in terris, eò majoribus & copiosioribus deliciis afflues in resurrectione; quo majores injurias, & contemptus cum JESU toleraveris nunc, eo major tibi accedet honor, & gloria in resurrectione. Dic nunc, anima mea! quid sunt adversitates, dolores, contemptus, tristitiæ & desolationes? An non sunt amabiles Dei dispositiones? efficacissima ad sanctitatem media? pulcherrima hæreditatis JESU Christi pars? Securissima pignora resurrectionis? semina immortalis gloriæ? Ita sane docet Christus! & tu tristaris, te infelicem dicis, dum illa tibi obtingunt! quanta tua cæcitas! An non deberes potius levatis in cælum manibus & oculis Deo gratias pro iis agere, illum laudare? Dic ulterius, anima mea! qui sunt illi, qui te contemnunt, rident &c &c. An non sunt instrumenta, quibus

quibus Deus utitur, ad executioni dandas suas circa te dispositiones? An non adjutores sanctitatis tuæ, & conformitatis cum Christo comparandæ, promotores gloriæ tuæ, & fabricatores coronæ, quæ caput tuum in æternum ornabit? Ita sane docet Christus! Et hos homines hucusque pro inimicis tuis habuisti! O quam falsas, & noxias ideas ingeneravit tibi amor proprius! quantum te a via Sanctitatis, & ab imitatione Christi abduxit!

A F F E C T U S.

Fidei. Ergo certum est! vivit JESUS! resurrexit a mortuis! intravit in gloriam! & quoad corpus, & animam fruitur immensis deliciis! Credo, mi JESU! quia tu, æterna veritas dixisti! Non est Satis! Etiam ego æternum vivam, si JESUM imitatus fuero, resurgam a mortuis, intrabo in regnum cælorum, & his meis oculis JESUM salvatorem meum videbo! credo, mi JESU! quia tu veritas dixisti! Adhuc plus: illa hora mercedem totius passionis meæ recipiam: pro momentaneo dolore æternam felicitatem: pro unica injuria, vel contumelia æternam gloriam: pro brevi tristitia æternum gaudium, æternas delicias! Credo mi JESU, quia tu &c. O Fides! quam pulchras veritates me doces, & quanto solatio cor meum perfundis!

Do.



Doloris. Verum ex eodem lumine fidei quanta mihi tristani materia! Si verum est, DEUM pro singulis mortificationibus, incommodis, doloribus specialem dare remunerationem, quot millia harum remunerationum ego propter amorem meum proprium, & impatientiam perdidit! Si verum est, retribui a DEO post resurrectionem pro qualibet humiliatione, contemptu, injuria specialem coronam gloriæ, quot coronarum jacturam feci propter superbiam meam, & vanitatem? &c. &c. O. quam amaris lachrymis tantam jacturam deslere debeo! Sed resume animos! tu scis, quomodo Christus in gloriam Suam intraverit, & quomodo tu post illum intrare possis! Sit ergo -- Eni, mi JESU, coram te prostratus. ---

MEDITATIO SECUNDA.

DE AMORE DEI.

Duo sunt præcipue, quæ cor nostrum ad amandum DEUM efficaciter movere possunt: infinita illius erga nos bonitas, & infinita illius bonitas in se. Illam in præsentia, hanc in sequenti meditatione perpendemus.

P. I. DEUS meretur amari propter infinitam bonitatem, & amorem, quem nobis hu-

hucusque exhibuit. Perpende omnes ejus proprietates.


1. Bonitas Et Amor DEI erga te est æternus. Quemadmodum DEUS initium nullum habet, sed a, & per se semper, & ab æterno fuit, ita etiam illius erga te bonitas, & amor paternus nullum initium habet, sed est DEO coævus, id est, æternus. Revoca in memoriam omne retro tempus! ante mille, septingentos & plures annos quid eras? Secundum animam nihil, secundum corpus pulvis! Quid egit tunc DEUS? amavit te, & quidem tam intense, ut pro tua salute sanguinem Suum in cruce fuderit! Redi usque ad creationem mundi! quid fuit tunc? nihil: neque cælum, neque terra: neque Angeli, neque homines: verbo: nihil fuit. Quid egit tunc DEUS? Amavit te, & quidem tam tenere, ut propter te cælum & terram creaverit: terram quidem, tanquam tuam pro præsentis brevi vita habitationem, cælum vero pro futura! Redi ad centum mille, millies mille, ad milliones annorum ante creationem, verbo: ad æternitatem; quid erat tunc? Nihil nisi DEUS solus, in, & a se infinite felix, infinite gloriosus. Quid egit tunc DEUS? te amavit: non fuit ullum per totam æternitatem momentum, quo de te non cogitasset, te non amasset,



set, quo non fuisset actualiter resolutus pro te mori, & te omnium horum bonorum, divitiarum, totius Sux felicitatis participem facere! Quantum amoris miraculum!

2. *Bonitas, & amor DEI est liberalis, & fortis.* Non est necesse, ut ad has veritates capiendas, omnes gratias a DEO tibi præstas recogites: recole solum mysterium incarnationis. Imaginare tibi Officialem quemdam Principis, qui suo Domino centum mille florenos furto abstulit: infidelitatis suæ convictus, ad æternos carceres damnatus, tenebricosæ turri inclusus, suspiria inter, & lachrymas vitam exigere debet, nisi ablatas clam pecunias restituat. Dum hoc innotesceret, offert se dives, quidam Dominus, cujus substantia massam prædictam æquabat, vendit omnia, solvit Principem, & ita captivum liberat. Ille ipse vero, hac sua misericordia ad incitas redactus, discit opificium, & comedit in sudore vultus panem suum: Quantum esset amoris miraculum! An nosti autem, quocum miraculum hoc contigerit? Quis erat miser ille captivus? Quis misericors ille salvator? Recogita attente, anima mea! ---

3. *Bonitas & amor DEI erga te est patiens & longanimis.* Veni, ostendam tibi mirum spectaculum! En! terra aperitur, petræ, quibus



quibus carceres æterni circumdati sunt, scinduntur! infernus patet! quid vides? multa millia animarum damnatarum, quæ mediis in flammis sedent, & torquentur! Sed ecce! Christus descendit de cælo, & ex tot millibus damnatarum animarum unicam ex inferno educit, unit cum corpore, reducit ad vitam hunc hominem, & dat illi pœnitentiæ tempus. Quis amoris hujus magnitudinem comprehendet? Homo iste meritus est infernum, sicut mille alii: imo inferno dignior est multis aliis; Omnibus tamen aliis sine gratia, sine pœnitentiæ tempore in inferno relictis solus iste educitur, gratiam & pœnitentiæ tempus consequitur! Quam speciali amore istum hominem prosequi dicendus est Christus? Videor mihi historiam narrasse, quæ tibi contigit; vel an verum non est, millenos esse in inferno, qui non pluribus peccatis se obstrinxerunt, quam tu? imo qui rarius, quam tu peccarunt? qui non tot gratiis abusi sunt, qui non tamdiu tepidi, ac tu? Interim isti damnati, & in æternum abjecti sunt; & tu vivis, abundas gratiis, mediis &c. An non dici hic idem potest, quod Judæi olim dixerunt, dum JESUM super Lazarum flere viderent? ecce, quomodo, quam tenere amavit eum!

AFFE.

AFFECTUS.

Confessionis & admirationis. Omnia, quæ habes & operaris, mirabilia sunt; sed amore, quo me complecteris, nil mihi mirabilius! Nam quomodo me amas? Amas & amasti me amore æterno: nullum fuit ab æterno momentum, quo me non amasses! Amas me amore forti: nam quo te tuus amor non deduxit? descendisti de cœlo, in stabulo natus, pauper in sudore vultus tui panem tuum manducaſti, & tandem in cruce tanquam malefactor mortuus es! Ad hæc omnia tuus te amor erga me adegit! Amas me amore patiente: Tot peccata commisi, tot gratiis, & mediis abusus sum, & hæc omnia tuum in me amorem reſtinguere, vel minuere non valebant! Adhuc me amas & tam tenere, & paterne, ſicut me ab æterno amasti! o DEUS! DEUS immenſo amore, & miſericordia vere infinita plene! Vere dignus es, ut te ex totis viribus, & infinito, ſi eſſet poſſibile, amore diligam!


Doloris. Quam ingratus itaque fui, quod te ex toto corde non amaverim! O amator fideliffime, Dominus DEUS, & Pater meus, & omnia! agnoſco meam ingratitudinem, & deteſtor: Amavi hominem. qui mihi exiguum beneficium præſtitit, a quo præter bona verba

verba accepi nihil! & DEUM, a quo omnia habeo, qui pro me in cruce mortuus est, non amavi! Agnosco meam ingratitude, & execror! Aliter nunc cogito, & propono meliora. Vicisti o Divine amor, vicisti! Tuum fit cor meum, tibi illud totum in æternum dono. Amabo Te in posterum, Te Solum amabo, & eo quidem ferventius, quo tardius incipio.

P. II. *DEUS meretur amari propter infinitam bonitatem, Et amorem, quem nobis præstare in posterum cogitat. Quid ergo cogitat tibi dare, anima mea? verbo complector omnia, quæ dici possunt: DEUS cogitat Se ipsum tibi dare! Ut mysterium hoc omnium solatiosissimum pro posse tuo melius agnoscas, attente perpende sequentia.*

1. *Possidere DEUM, significat, omnium desideriorum metam assequi. Egressæ ex corpore animæ oritur lumen supernaturale, ex quo mira claritate cognoscit, DEUM esse maximum, & unicum suum bonum, unicam & maximam felicitatem. Ex hoc lumine oritur tam immensum desiderium fruendi hoc unico bono, hac maxima felicitate, ut privatio ejus maximam inferni pœnam efficiat. Hoc desiderium ergo implet DEUS: unit animam intime secum, & ita se illi communicat, ut*

tota



tota abyſſo Divinitatis ſuæ fruatur. Hic mari deliciarum immerſa infinito gaudio, & inexplicabili conſolatione, ac voluptate abundat.


2. *DEUM poſſidere, ſignificat DEUM intueri, & amare.* Nullum erit per totam æternitatem momentum, quo anima nova miracula Divinæ omnipotentix, bonitatis, pulchritudinis, & aliarum perfectionum non videret, quæ illam cum infinita ſvavitate totam in DEUM rapient! Nullum erit per totam æternitatem momentum, quo anima novas amoris flammas non ſentiat, quæ illam cum infinito gaudio DEO totam immergent.

3. *DEUM poſſidere, ſignificat infinitam felicitatem poſſidere.* Felicitas, qua perfrueris in cœlo, alia non eſt, quam qua ipſe DEUS fruitur: iisdem gaudijs, delicijs, ſvavitatibus, felicitate, qua DEUS fruitur; etiam tu frueris. Quanta autem eſt hæc felicitas? Audi miram, ſed innegabilem ſimul veritatem! Unica hujus guttula ſufficeret ad perfundendum damnatos majore gaudio, quam nunc deſperatione cruciantur: unica guttula ſufficeret ad beatiffimos reddendos omnes electos, ad omnes creaturas in æternum beandas, licet numerus illarum excederet longe arenas maris. Verbo: hæc gaudia tanta ſunt, ut ſufficiant ad ſatiandum ipſum DEUM, infinitæ felicitatis capacem!

4. *DE-*

4. *DEUM possidere, significat amari a DEO infinita cum teneritudine.* DEUS animam considerat, ut prolem, quam intine amat, tanquam objectum, cui omnes suæ bonitatis thesauros communicare desiderat, tanquam sponsam, in qua sibi multum complacet. Omnes imagines a terrenis desumptæ hic nimis claudicant! Quemadmodum DEUS est omnipotentia infinita, omnem humanam potentiam infinite excedens, ita est etiam infinitus amor, omnes teneritudines amoris humani infinite transcendens. Ille Solus potest animam, quam amat, in cor suum recipere, & potare illis deliciis, quæ humanus intellectus capere non valet.

5. *DEUM possidere, significat vivere, quamdiu vivit DEUS, & esse felicem, prout DEUS felix est.* Quæ ergo est felicitas Dei? est felicitas sine fine, sine interruptione, sine imminutione. Omnes has proprietates habebit etiam tua felicitas, o anima! Erit felicitas sine fine. Pone tot annos, quod sunt guttæ marium omnium, quot atomi in aere: labentur, & præteribunt omnes isti anni; sed necdum dimidium, imo nihil præterivit de felicitate tuæ: est enim æterna, sine fine. Erit felicitas sine interruptione; omni momento novam in DEO deteges pulchritudinem. Nam quoniam



infinita est pulchritudo, remanet semper infinita abyssus, quam adhuc non amasti. Omni momento novum fontem gaudiorum invenies; nam quoniam dulcedo est infinita, remanet semper, quod nondum gustasti. Erit felicitas sine imminutione. Habebis semper ferventissimum desiderium, DEO fruendi, & semper maximum gaudium, quod illo fruaris: eris semper infinite felix, quod DEUM habeas & nunquam satiaberis, quia illum habere semper desideras.

A F F E C T U S.

Amoris. O unicum & summum bonum! DEUS meus! quam misere hucusque cæcutivi! Neque Te, neque amorem tuum agnovi, ut nunc agnosco! Quid facere aliud possum, quam immensum tuum, & mirum amorem redamando compensare? Libenter facio! En! o mi DEUS! coram Te humi prostratus immolo cor meum in holocaustum, sicut tuus amor infinitus meretur. Amo Te, & amo ex toto corde, & ex totis viribus. Odi, & execror omnes affectus meos, qui in corde erant hucusque, & ad Te non tendebant. Te solum amo, o summum bonum, Te solum desidero amare, quamdiu vivo; & honorem tuum, voluntatem, & beneplacitum tuum volo semper omnibus creaturis, & toti mundo præferre!


Desi-

Desiderii DEUM perfecte amandi. Verum etiam si omnia hæc faciam, & Te amem, prout statui, quid est ille amor, si compareretur tuo in me amor? revera nihil. O quam optarem itaque, ut omnis ille amor, qui in cordibus omnium Electorum divisus est, in me uno collectus sit! quam optarem, ut omnem amorem, qui in Angelis invenitur, solus possideam, ut te o summum bonum, o fidelissime amator! omnium horum amore complecti possim! Sed frustra hæc desideria: quemadmodum Tu solus summum bonum es, quod amari infinite meretur, ita etiam Tu solus es ille, qui perfectum in corde meo amorem accendere potes! O DEUS! respice in me, & miserere mei! ostende in me potentiam tuam! nil aliud, nisi tui amorem desidero!

MEDITATIO TERTIA.

DE DEO IN SE INFINITE AMABILI.

P. *DEUS meretur amari, quia est bonum infinitum.* En fundamentum, cui perfectus DEI amor innititur. Debet amari DEUS, & meretur infinite amari, quia est summum bonum. Sed quid sibi volunt istæ duæ voces: summum bonum? significant: DEUM



esse ens omnes perfectiones continens, & quidem in gradu infinito, & quidem a se, & per se. Ut aliquam saltem ideam hujus habeas, perpende unam, alteramve ejus perfectionem in specie.

1. *DEUS est pulchritudo infinita.* Debe-
mus hic solis imaginibus idealibus contenti
esse, quæ, quantumcunque incomprehensibiles
sunt, tamen nil aliud dici possunt, quam
cogitationes, quas infans de motu astrorum
concipere potest. 1. *Imago.* Beatissima Virgo
MARIA sola videt plus de pulchritudine DEI,
quam omnes Sancti, & Electi simul sumpti:
& propterea etiam illius gloria, gaudium,
& felicitas est major, quam omnium simul
Electorum. Jam, hoc momento incipit DE-
US, illius intellectum sublimare, & finit
illam de sua pulchritudine altero tanto plus
videre, quam vidit hucusque: sequente mo-
mento dat illi novum lumen, ut adhuc
plus, quam primo, videat, & ita continuat
per 1000, per 10000, per 100000. an-
nos. An videbit tunc B. Virgo totam
pulchritudinem DEI? Nequaquam; remanet
de ea adhuc tantum, quantum de mari re-
maneret, exhaustis inde aliquot guttis.

2. *Imago.* Angeli numero multi millio-
nes sunt, & minimus illorum tanta fulget
pul-

pulchritudine, ut mortalium nullus illum aspicere posset, quin præ abundantia gaudii moriatur. Ponamus ergo, quod Deus creet Angelum, qui omnes omnium Angelorum pulchritudines in se contineat; quid est hæc pulchritudo respectu pulchritudinis Divinæ? nihil: est enim infinite minor. Imaginare tibi ulterius, quod DEUS per 1000 annos omni momento creet millionem Angelorum, quorum unus alterum tantum superat pulchritudine, quantum nunc Seraphinus hominem superat; imaginare tibi, quod post hos mille annos omnipotentem suam manum extendat, Angelum, omnium horum Angelorum in se continentem pulchritudinem creet; quid hæc est pulchritudo comparata cum Divina? nihil: est enim infinite minor. Has imaginationes continua toto anno, tota æternitate, nunquam tibi tamen pulchritudinem talem effinges, quam illa DEI non infinities excedat!

2. *DEUS est omnipotentia infinita.* Confugiamus hic iterum ad imagines. Imaginemur nobis, hominum, qui hucusque fuerunt, & usque ad supremum diem iudicii erunt, numerum ascendere ad 200000 milliones. Quantus numerus! Animæ illorum partim in cælo, partim in purgatorio, partim in infer-



inferno existunt: corpora vero illorum in cineres redacta sunt, ita, ut de plerisque nec officulum sit super. Interea appropinquat iudicii dies, tuba Archangeli resonat per omnes mundi partes: quid fit? uno momento resurgunt illorum corpora; animæ in illa redeunt, & isti tot hominum milliones reviviscunt! Quid requirebatur ad tantum miraculum patrandum? hæc duo verba: surgite mortui! Imaginare tibi, DEUM descendere de cælo, consistere ad littus maris, & dicere hæc pauca verba: adstent tot homines, quot in hoc littore sunt arenarum granula! quid fiet? momento totidem adstabunt. Fac tibi tales imagines, quot vis, nunquam tamen talem facies, quam Omnipotentia DEI non infinite transcendat?

3. *DEUS est bonitas infinita.* Tres sunt effectus, ex quibus hanc infinitam bonitatis Divinæ magnitudinem aliquomodo cognoscere poteris. Effectus primus est toleratio peccatoris. DEUS intuetur multa centena hominum millia in mundo, qui gravissimis se obstringentes sceleribus sanctissimum Illius nomen blasphemant, & per annos 20. & amplius sine intermissione gravissimis illum injurijs afficiunt. Et quid ad hæc DEUS? tacet, quasi omnium harum injuriarum ignarus

narus: conservat illis vitam, nova quotidie beneficia elargitur, perinde ac si illi ferventissime servirent: loquitur illis quotidie ad cor, invitat ad ineundam secum amicitiam, ac si non illi DEO, sed DEUS illis opus haberet. Secundus effectus est susceptio peccatoris: Imaginare tibi hominem, centum annos ætatis attingentem, qui omni die millies DEUM deliberate blasphemaret, qui tota vita nunquam de pœnitentia cogitaret: hic miser jacet nunc in extremis! nil illi temporis, nisi momentum unicum superest potestne talis veniam adhuc consequi? Audi, & admirare infinitam DEI bonitatem! si sceleratus iste vel unicum spiritum ad cælos mitteret, DEUS ignosceret, omnium iniquitatum ejus oblivisceretur, & suæ gloriæ participem faceret! Tertius effectus est remuneratio justii. Imaginare tibi justum, qui tota sua vita nullum aliud bonum opus fecit, quam hanc orationem: mi DEUS: amo Te super omnia, quia Tu es summum bonum. Quid mercedis largitur illi DEUS? cælum, fruitionem sui per totam æternitatem! Tam mirabilis, & infinita est in remunerando DEI bonitas!


A F F E C T U S

Confusionis sui ipsius. Ita est o mi Deus!
Tu es



Tu es, ut fides me docet, summum bonum, bonum omnes perfectiones in gradu infinito continens, bonum, quod infinito amore amari meretur! Unde ergo venit, quod cor meum, quod solum ad te amandum, & possidendum creatum est, non obstante hac mea cognitione, & fide tam insensibile & frigidum sit? Non oblectat me solitudo, & collectio mentis: piget me tecum colloqui, omnia, quæ alias verus amor operari solet, desipiunt! Agnosco meam miseriam, o Deus! tamdiu miser, & infelix ero, quamdiu ignis amoris tui in corde meo non exarserit! Sed quando hoc erit? quando Deum meum perfecte amare incipiam?


Propositi. Ah! quando incipiam? tunc, quando mihi ipsi, & omnibus creaturis moriar: quando tu, o DEUS, mei misertus hoc sancto amore me ditaveris. Eja: ego incipiam: en! o mi DEUS, o summum, & unicum bonum meum, trado tibi cor meum ex integro, sine ulla reservatione: amo te ex toto corde meo, & execror omnes cogitationes, affectus, verba, & opera totius vitæ meæ, quæ ex amore tui facta non sunt: Tui amor, & beneplacitum tuum erit in futurum objectum omnium mearum cogitationum, scopus omnium desi-



desideriorum, & motivum omnium meorum operum! Sed, o mi Deus! quam sincera, & seria est hæc mea resolutio, tam parum illam exequar, si singulari tuo auxilio & gratia me non confortes. Ah! cónverte ergo illos tuos misericordes oculos ad me! memento, quod cor meum tantum ideo creaveris, ut te amet; recordare, quod tantum ideo sanguis tuus pro me fluxerit, ut amore tui ardeam! Hujus ergo intuitu operare in me nunc miraculum misericordiæ tuæ: dele, & extingue in corde meo, quæcunque tuo amoris adversantur, & igne illud tui amoris accende, ut nunquam amplius ardere desinat,--

P. II. *Deus meretur amari, quia est unicum bonum:* Magni momenti veritas est hæc, quæ, si rite expendatur, sola capax esset, totum cor ad DEUM rapiendi,


Neque in cælo, neque in terris, neque in Angelo, neque in homine, neque in ulla alia creatura est bonum minimum, quod a Deo non veniret. Circumspice totum orbem terrarum, considera omnes creaturas in illo existentes; aspice tam diversas arborum, fructuum, florum, &c animalium, volucrum, piscium species. De terra in cælum ascende, & perpende fulgidissimum illum Planetam
Solem



Solem, qui totum mundum collustrat, pulcherrima illa astra, in firmamento radiantia: illam incomprehensibilem magnitudinem, & pulchritudinem Paradisi cælestis, quem Electi inhabitant! Ab irrationalibus creaturis converte cogitationes tuas ad homines, & perpende diversa dona ex illis eluentia, pulchritudinem, sapientiam affabilitatem, clementiam, aliaque plura tam naturalia, quam supernaturalia: considera Angelos, & alios Electos, & in ijs admirare singulares virtutes, merita sublimia, miram sanctitatem, & incomprehensibilem illorum gloriam, felicitatem &c. Omnibus his perpensis redi in cor tuum, & dic tecum ipso:

1. Ubi erant ante octo millia annorum tot milliones nobilissimarum creaturarum? In suo nihilo, erant consepulta, & essent adhuc, nisi Deus illas per suam infinitam bonitatem inde extraxisset; ita te docet fides.

2. Quid est omne illud, quod in Creaturis bonum dicimus? nil aliud, nisi Dei misericordia, qua illas Dominus dignatus est. Omnis creaturarum pulchritudo nil est, nisi radius ex hoc immenso sole promicans. Omnis creaturarum sanctitas nil est, nisi guttula, ex hoc immenso mari profluens. Deus solus est bonus: ita docet fides, ita cre-



dimus; sed quomodo vivimus? ah quam male impendimus nobilissimos cordis nostri affectus? Agnoscisne, quid ex his veritatibus consequatur? perpende bene, & nunquam e memoria dimitte: 1. Sequitur, Deum mereri, ut infinite ametur. Hoc docet ratio; nam quod bonum est, meretur amari: sed Deus est infinitum bonum, ergo meretur infinite amari 2. Sequitur, quod Deum non secundum obligationem amem, si non amo, quantum mihi secundum meas vires possibile est! 3. Sequitur, quod contra hanc obligationem agam, si ulli affectui locum dem, qui in Deum non tendit: si unicum opus peragam, quod illi non placet: si unicæ illius de me dispositioni me opponam!

A F F E C T U S.

Confusionis sui ipsius. O Deus! unicum, & summum bonum! nimis bene agnosco, quid merearis, & qualis esse debeat verus amor! Anima tui amore inflammata refecat omnem adhæsiōem, & nullum affectum patitur, qui a te non exit, & iterum ad te redit: nil agit, quam quod novit tibi esse acceptum, tolerat omnia, & nulli de se dispositioni tuæ se opponit: relinquit se tibi totam, & in sinu providentiæ tuæ sine cura



cura requiescit. O sancte amor, quam pulcher, & exoptabilis es! quantum de hoc amore habeo, & quot horis vitæ meæ ita amavi? quot opera exercui, & quot adversitates passus sum ex hoc amore? Me miserum! quis mihi satis lachrimarum.---

Amoris Et oblationis. Sed quid consternor? assumendus nunc fervor compensare potest omnia! Apage sis Pusillanimitas! quod poterant tot juvenes in flore ætatis, tot teneræ virgines, cur non possem & ego? Hac in Te, o Deus fortitudo mea! fiducia fretus immolo me tibi totum! suscipe meam libertatem, memoriam, intellectum, & voluntatem: omnia a te accepi, omnia tibi restituo! ego nihil aliud desidero, vel peto, nisi tui amorem: hunc solum mihi dona, & dives sum satis.

Petitionis Veni ergo, o Divinissime Spiritus! tu es essentialis charitas, & origo illius Divini ignis, qui in cordibus Sanctorum arsit! Tu es essentialis sanctitas, & fons illarum efficacium gratiarum, quæ corda hominum penetrantes, illa cum omnibus affectibus ad Deum rapiunt. Ah! descende hodie in cor meum, purga illud ab omnibus imperfectionibus, & accende illud amoris tui igne! Sum paratus omnia agere, omnia pati! Tuum amorem solum flagito: pro isto omnia dare, omnia facere paratus sum!

CON



CONSIDERATIONES

CONSIDERATIO I.


DE

ÆSTIMATIONE Vocationis Religiosæ,

Sicut gratia vocationis ad Religionem est singulare adjumentum ad finem nostrum ultimum facilius, certiusque consequendum, ita æstimatio hujus gratiæ est juxta incitamentum secundum vocationem vivendi, & per præscripta nobis a Religione media ad finem ultimum indefesse tendendi. Quapropter ut magnam S. vocationis tuæ æstimationem concipias, considera sæpius excellentiam gratiæ, quam tibi DEUS vocando te ad Religionem, & speciatim ad Societatem JESU contulerit.

PUNCTUM I.

Vocatio ad Religionem est maximum DEI beneficium, quia per hanc *jmo* remouentur pleraque impedimenta salutis. Quid enim




enim sæculares impedit, quo minus DEO sincere, & fervide serviant, & salutem consequantur? Audi ex proprio illorum ore: *cura terrenorum*, & negotia nimis multa, propter quæ frequentior usus Sacramentorum, orationis, Missæ quoque, & conciones omittuntur. *Pericula peccandi*, in quibus continuo versantur: v. g. conversatio cum altero sexu, spectacula, imagines sædæ, in quas ubique impingunt oculi; laxa principia, quæ a teneris imbibunt; exempla mala, quæ quotidie vident &c. *Defectus instructionis debitæ* circa obligationes tam communes omnibus, quam statui suo proprias &c. unde principia erronea, peccata ignorantie crassæ &c. *Defectus, vel abundantia* rerum ad vitam necessariarum; ille enim ad turpia, & illicita; hæc ad mollitiem, & oblivionem DEI deducunt. Denique apud multos *defectus auxilii spiritualis*, seu incuria Dominorum, Parentum &c. de suorum salute non sollicitorum, & parum curantium, an cum bonis, vel malis conversentur, an sacro, concioni adsint, Sacramenta frequentent; non monentium, vel increpantium discipulos &c. Omnia autem hæc impedimenta removeri per ingressum Religionis, quis est, qui non primo obtutu deprehendat?

2. Per

2. Per vocationem ad Religionem acquiruntur omnia, quæ ad salutem plurimum conferunt, & quidem in vita, in morte, & post mortem. *In vita* Usus creberrimus Sacramentorum, abundantia mediorum spiritualium. Quot enim in Religione præscriptæ sunt meditationes, lectiones piorum librorum, conscientiarum discussiones, exhortationes, spiritus recollectiones? Auxilium mutuum fratrum per orationes, consilia, exempla; Vigilantia superiorum monentium, castigantium, & suos in defectibus, præcipue gravioribus veterascere non sinentium; Occasio colligendorum meritum facilis, & frequens per actus obedientiarum, indulgentias &c. Participatio mutua meritum tantorum, tamque multiplicium &c. *In morte* Cura maxima geritur, quemadmodum ut ægro medicinæ, & auxilia, imo etiam commoda corporalia non desint; ita, si crescat periculum, SS. Sacramenta tempestive administrantur, pro felici illius obitu ab omnibus oretur, ut sine sacerdote non relinquatur &c. *Post mortem* persolvuntur illico pro anima illius a singulis non solum Domus hujus, ubi moritur, sed ab omnibus totius Provinciæ Confratribus consueta suffragia; singulis annis celebratur Anniversaria pro omnibus illius quondam Religionis membris &c. Hæc, ali-

aque



aque quamplurima an non evidenter evincunt, gratiam vocationis Religiosæ esse beneficium maximum, & quoddam quasi pignus secuturæ hanc gratiam æternæ beatitudinis, præsertim, cum æterna Veritas universaliter pronunciet: omnis, qui reliquerit domum, vel fratres &c.


PUNCTUM II.


Magnitudo beneficii hujus in homine Societatis nostræ crescit ex eo, quod vocatus sit ad talem Religionem, quæ habet altissimum finem; quæ a DEO singulariter amatur, & media copiosissima habet, hoc Dei amore, quoad hominibus possibile est, se dignissimam reddendi; quæ omnium hucusque sanctitate illustrium Virorum ore summe ælimata, & maximis encomiis celebrata est. Expende paucis singula.

Societas habet altissimum finem, non sanctitatem solum propriam, eamque non qualemcunque, sed quæ, quantum homini licet, in perfectissima Christi imitatione consistit; verum etiam assiduum, & indefessum studium DEO animas, quotquot potest, lucrandi, & ad sanctitatem vitæ perducendi. Quo quid sublimius? Divinorum omnium divinissimum est, ait S. Dionysius, cooperari in salutem animarum.

Societas singulariter a DEO amatur. Eluxit hic amor in ipsa ejus foundatione, dum

com-


 comparens S. Ignatio Pater cœlestis Societatem Filio suo commendaret, & hic suam illi opem promitteret his verbis: ego vobis Romæ propitius ero. Eluxit in tam veloci, & universalis per omnes orbis partes propagatione: Eluxit in mira complurium vocatione, quos voce cœlesti ingredi Societatem jussit: Elucet ex conformitate, quam cum Christo habere vult Societatem; non obscure enim in illa exprimere dignatus est Ejus passionem, ut Xti vitam cum historia Societatis conferenti patet: Elucet ex mirabili exigui sociorum manipuli conservatione, dum per totum orbem reliquum aboleretur Societas: Elucet in manifesta illa assistentia, qua dispersi inter tot pericula cum ædificatione vivunt, & qua illis mutuam inter se charitatem pristinam cum ardenti societatis desiderio; in populo vero pristinam auctoritatem conservat, licet hostes insensissimè plurimis, & turpissimis, calumniis famam illorum quotidie proscindere non cessent: Elucet denique e specialibus erga eam favoribus, de quibus Ven. P. Lancicius Tract: de Inst: Soc: P. Nadasi in piis morientium occupationibus, alique uberius agunt, v. g. connexa cum perseverantia in Societate gratia finali, de eximia mercede, & gloria in
 Q cœlo,



caelo, de singulari sanctissimæ suæ Matris erga nostros protectione &c.

Societas habet media copiosissima, hoc Dei amore se dignam reddendi. Habet enim præter media omnibus Ordinibus Religiosis communia, biennium Novitatus, ut in spiritu melius fundari: tertium Probationis annum, ut qua Neo-facerdotes ad Apostolicos labores solide formari possint: tot spiritus, & Votorum renovationes, rationem conscientia, beneficium dimissionis, quo se a discolis, & male contentis purgat &c. &c.


Societas æstimabatur summe, & laudabatur ab omnibus sanctitate illustribus Viris. Præter laudes a summis Pontificibus in Institutum, & Societatem congestas, quorum aliqui illud Dignum Dei, hanc brachium Ecclesiæ dextrum appellabant; S. Philippus Ner. ad Societatem admitti petiit, deque ejus Filiis asseveranter, nec semel dixit, illos, si in ea perseverarent, mori sanctos. S. Card. Borromeus, Franc. Salesius, Theresia &c. non solum Societatem summo in pretio habebant, sed sociis etiam animarum suarum Directoribus utebantur; quin S. Theresia maximam suæ perfectionis partem illis in acceptis retulit; illasque libentius in Ordinem suum admisit, quæ spirituali sociorum operâ uti consueverunt.

runt. B. Josaphat M. & Archi-Ep. Poloc: dicere solebat: non esse e Prædestinatis, qui non sunt amici Societatis. S. Aloysius teste A. R. P. N. Mutio Vitellescho ita Societatem æstimavit, ut dixerit: si per unum tantum momentum in Societate esse debuisssem, & per inferni poenas oportuisset me ad eam pervenire, elegissem illas, ut in Societate essem. Abstineo a pluribus adducendis, quorum vitæ typis editæ maxima Societatis encomia continent, & passim manibus teruntur.

P U N C T U M III.

Cognita nunc universim magnitudine beneficii, quod Deus præstat illis, quos ad Religionem, & speciatim ad Societatem JESU vocat: applica tibi particulariter, quidquid hactenus considerasti, & reflecte, quod præ tot millenis, quos DEUS in sæculo reliquit, salvandos, si vocasset, magnosque sanctos futuros, nunc autem fors perituros; te hac gratia multis indigniorem, sine omni tuo merito, quin præcedentibus copiosis demeritis ex sola misericordia vocaverit: quam suaviter & fortiter ad Societatem JESU deduxerit, hactenus conservaverit &c. ex quibus omnibus sequentia corollaria in tuam utilitatem profluent.

i. Si tantum donum est vocatio; gra-



tum me certe præstare debeo, gratias Deo agendo quotidie, & quotidie humiliter illius opem, qua precibus, qua oblati in hunc finem aliquot mei Victorijs implorando pro dono perseverantiæ; exosculando cum tene-ro affectu vestem religiosam &c.

2. Si vocatio religiosa non solum remonet impedimenta, sed omnia etiam abundanter suppeditat, quæ me de mea salute certum facere possunt; constanter, & ferventer his medijs uti debeo. Quid enim juvat, media me habere plurima, si illis non utor? Eo gravior olim Deo ratio reddenda, quo liberaliorem se nobis nunc exhibet.

3. Finis primarius Societatis JESU est, salus propria; & secundarius, salus proximorum; ergo debeo nunc statim incipere salvare me ipsum, & animam meam in tuto ponere. Quomodo enim sanctificabo alios, ipse non sanctus? Exempla magis, quam verba movent. Et etiamsi alios salvarem, quid mihi prodesset, si ego ipse perirem? Prudentis est, sibi ipsi primum consulere.

4. Si Societas in ea est apud omnes estimatione, quam meretur, debeo solícite cavere, ne exemplis meis minus rectis, vel moribus non satis compositis maculam ei inuram. Famam ergo Societatis tam sanctæ me ubique

ubique mecum circumferre, assidue recogitabo
 &c. præcipue quia scio, famam bonam Viris
 Apostolicis præprimis necessariam esse.


CONSIDERATIO II.

DE PASSIONE PRÆDOMINANTE SUBIUGANDA.

PUNCTUM I.

Licet peccatum summo odio persequamur,
 & vitare firmissime statuamus, propositum
 tamen hoc nostrum effectum nunquam con-
 sequetur, quamdiu Passionem in nobis præ-
 dominantem extirpare non cæperimus. Hæc
 enim est illa a Daniele conspecta in visi-
 one noctis bestia terribilis, & fortis nimis,
 dentes ferreos habens magnos, omne vir-
 tutis robur comedens, & reliqua pietatis
 semina pedibus suis conculcans. Hæc est
 tortuosus ille Coluber, qui calcaneo nostro
 subdole infidiatur, & quo lenius habetur, eo
 magis insolescit, & sævit. Ideo monet Eccl.
 si præstes animæ tuæ concupiscentias ejus,
 faciet te in gaudium inimicis tuis. Quod
 quidem periculum ruinæ spiritualis ab
 hac bestia tibi imminens, ut clare perspicias.

Considera imo Prædominantem passionem fuisse
 omni-



omnium ab orbe condito criminum infelicem causam, & scaturiginem. Hæc Cain ad fratris necem? Davidem ad adulterium, & cædem Uriæ; Salomonem ad Idolorum cultum; Herodem ad lanienam Infantum, Judam ad proditorem Divini sui Magistri, & tandem ad desperationem concitavit. Hæc Italiam Vandalis, Mauris Hispaniam, Asiam Turcis diripiendam, & ferro, flammisque depopulandam tradidit. Hæc Familias discordiis, domos perfidiis & spurcitiis, Urbes furtis, & injustitiis, Ecclesias scandalis, & sacrilegiis replevit. Imperans hominum animis malevolentia, ambitio, invidia, luxuria, avaritia ad tanta illos scelera abripuit, mundumque tam enormiter corrumpit.

Confidera 2do: nec esse mirum, mundum ita corruptum; tot, tantosque omni tempore Viros turpiter subjugatos esse a Passione prædominante, si arma, quibus communiter adversus illos depugnare solet, spectentur. Arma illius sunt: Astutia versipellis, amabiles blanditiæ, & summa pertinacia. Dixi imo: *Astutia versipellis*; Induit enim omnes formas, ut incautos decipiat; & intellectui ut licitum depingit, quod in aliis, ut vetitum damnat; imo & virtutis se larva tegit: nunc zelum se esse, nunc charitatem mentitur:

Profusio-

Profusionem liberalitatis: iram, & vindictæ
 studium iustitiæ: superbiam & ambitum no-
 bilis & generosæ indolis: liberiorem cum
 altero sexu conversationem urbanitatis pallio
 obnubit. Exempla si desideras, resume Da-
 videm, & Judam; & deprehendes, quam astu-
 tis modis, sub quibus prætextibus Apostolum
 Xri ad vendendum suum Magistrum; Virum
 secundum Cor Dei ad eadem innocentis si-
 ne magno animi remorsu perduxerit. Dixi
 2do *Amabiles blanditiæ*. Cum enim sit ho-
 stis non solum domesticus, sed qui nobis-
 cum etiam quasi adolevit; tam scite novit
 captare tempora, modo nostro cogitandi,
 nostræ complexioni stimulos suos tam belle
 accommodare, tam suaviter influere, & figere
 aculeos melle illitos; verbo: novit animum
 nostrum ita demulcere, ut sine illo, quod
 suadet; vitam nobis perquam gravem, &
 molestam; cum hoc vero fore amænissimam
 existimemus. Remordeat licet conscientia, &
 nostri nos periculi admoneat: amabilis hic
 hostis adeo non timetur, ut amici etiam lo-
 co & habeatur, & diligatur. Sed hoc ipsum
 est, quod ejus mature debellandi necessita-
 tem evidenter probat. Aut enim cito, &
 totis viribus aggrediendus, aut pereundum
 est. Augetur enim ex una parte singulis
 momen-




momentis ejus in nos dominium; ex altera voluntas indies languidior, & gratia debilior redditur. Lege hac super re terribilem luctam, quam S. Augustinus cum eodem hosse se habuisse Libr. Conf: 8. c. 5. & 11 narrat, Dixi 3tio: *Pertinacia*. Non enim quiescit una de nobis relata victoria, iterum, iterumque insurgit, vulnera vulneribus cumulat; imo evadit tandem tam pertinax, ut efficacissima illum perdomandi media interdum eludat. Veritatem huius mei Asserti in Jona, velut in speculo, expressam intueberis. Prophetæ hujus animum inordinatus proprii honoris amor infederat. Jubetur a Domino ire in Niniven civitatem magnam, & prædicare in ea: sed timor perdendæ, aut minuendæ saltem famæ, nisi prædictioni eventus responderit, eum compulit, ut fugeret in Tharsis a facie Domini. Vindicta DEI inobedientem sequitur: fit tempestas magna in mari: cadit fors super Jonam: mittitur in mare: deglutitur a pisce: post tridum evomitur in aridam. Quis hic non judicaret, Jonam sapere doctum illico properaturum, quo jubebatur? Et tamen debebat fieri ad eum verbum Domini secundo, tunc primum surrexit, & abiit Niniven. Nec hic fuit obstinati animi malum. Cum enim ejus hortatu permoti Ninivitæ essent

essent conversi a via sua inala; & DEUS eorum misertus urbem non subverteret; iratus est adeo vehementer Jonas, ut mori, quam vivere maluerit; Quin, ut ipsi Domino interroganti: putasne, bene irasceris tu? respondere ausus sit: bene irascor ego usque ad mortem. Quæ causa tantæ iræ, & obstinationis? eadem, ut ipse fatetur, nimia existimationis cura, propter quam metuit, ne ob non secutam urbis ruinam, quam prædixerat, falsus Propheta audiret. En! effrænem Passionis pertinaciam, quæ nec terroribus, nec infortuniis, nec ipsa DEI loquentis voce coerceri ita potuit, quin iteratis assultibus Jonam laceggeret, & prosterneret! En! grandem, si peccata serio vitare velis, eam subjugandi necessitatem!

P U N C T U M II.

Quodsi nosse cupis, quæ sit illa in te dominans passio, suppeditabo breviter modos, quibus illam ab alijs discernere discas. *Imus Modus est*, diligenti examine perscrutari, cujusnam rei amor, vel odium, desiderium, vel fuga, spes aut timor te communiter pelliciat ad committenda illa peccata, quæ ordinaria confessionum tuarum materia esse solent: an non cupido honoris, commodi, aut voluptatis? an non honor subeundi laboris, molestiæ, contemptus &c. & facili negotio




gotio deprehendes, nimiam plerumque curam existimationis propriæ, vel minus ordinatum cuticulæ, ac commoditatum vitæ scaturiginem esse, ex qua quotidiana nostra peccata profluunt. Ex prima enim, nempe ex superbia promanat jactantia, & ostentatio, alienæ famæ invidentia, obtrectatio, ambitus, odia, rixæ &c. ex secunda, nempe Philautia, oritur acedia, gula, libido, mendacia, murmura, defectus graviores contra paupertatem, ac votorum transgressiones &c.

2. *Modus.* Attende, quam de re frequentius cogites, quænam res potissimum anxium te, tristem, aut lætum, & cupidum &c. reddat. Sic v. g. qui sensuum, & corporis oblectamenta plerumque cogitat: vel quem timor invaletudinis, aut molesti muneris vehementius angit, qui aliorum defectibus facile turbatur, signum est, dominari illi, amorem proprium omnia incommoda averfantem, suisque commoditatibus nimis avide inhiantem. Contra si quis nonnisi honores, & applausus somniet; si quem successus disputationis, concionis, alteriusve negotii nimis sollicitum habet; si quis officia, & loca minus honorifica fugit, huic ambitionem dominari, palam est.

3. *Modus.*

3. *Modus.* Adverte animum ad tacita quædam, quibus se prodere solet indicia: sic v. g. Passio prædominans solet se in omnes, saltem præcipuas actiones ingerere, easque si non imperare, saltem promovere, omnes eventus in commodum suum vertere &c. solet in conflictu cum aliis animæ appetentiis semper quasi supernatare, ita, ut illi soli omnes quasi famulari, & servire: imo illa loquente omnes tacere debeant: Solet hominem ita fascinare, ut illam mire præ aliis foveamus, excusemus, & potius cujusvis alterius, quam hujus reos nos argui patiamur. In superbia (& quod hic de superbia dicitur, de omni alia prædominante passione intelligendum est) omnium nunc dictorum experimentum cape. Superbus in omnibus sibi satisfacit, & complaceat: cuivis colloquio aliquid ad sui laudem immiscet, ipsos errores dextre in suam commendationem detorquere novit, in ipsa sui abjectione gloriatur &c. Superbus ut gloriæ cupiditati satisfaciat, nec pecuniis, nec sanitati, nec amicis parcat: hac loquente auri famæ, commodorum cura, blanditiæ carnis & sanguinis negliguntur, & vilescunt &c. superbus potius omnia alia volet esse, quam id, quod est: si ebriosum, avarum, invidum illum dicas, lenius feret: at si arrogantem voces,



voces, ulceri unques immittis, &c. Examinate secundum hos modos & quæ sit in te passio prædominans, deprehendes.

PUNCTUM III.

Media porro, illam subjugandi sunt 1. Ipsis appetituum iniitiis mox obsistere, eosque, quamprimum caput in altum extollunt, serio reprimere. Chrysostomi est hoc monitum dicentis: quando parvam animi perturbationem susceperis, ne eam neglexeris, quòd parva sit; sed considera, quanta mala parere possit, nisi mox supprimatur. S. Dorotheus ait: qui in principio vim sibi fecerit, atque pugnando perstiterit, multum sane proficiet, & deinceps pace bona, & quiete perfruetur. 2. Providere vigili oculo occasiones, quibus appetitus isti effervesce solent, ac contra eorum insultus nos prævie obarmare. Ita suadet S. Ambrosius: cavere debemus, ait, ne in perturbationes prius incidamus, quam animos nostros ratio componat. Exanimat enim mentem plerumque aut ira, aut dolor, aut formido; quia improviso percellunt ictu. Ideo prævenire pulchrum est cogitatione, ne mens imparata repentinis infestetur commotionibus. 3. Investigare causas vitii, & illas e medio tollere. Abbas Serapion apud Cassianum hac similitudine utitur: facilius cujuslibet

bet arboris noxia latitudo, ac proceritas exarescit, si antea radices ejus, quibus innititur, vel nudatæ fuerint, vel succisæ &c. Sic v. g. quia superbia ex nimia sui æstimatione oritur, valde proderit, hanc frequente, & vivaci sui nihili, suæ infirmitatis, suorum peccatorum consideratione retundere. 4. Examen particulare super hac passione ex præscripto S. P. N. Ignatii diligenter, & accurate instituere &c.

CONSIDERATIO III.

DE CAUSIS RUINÆ SPIRITUALIS RELIGIOSORUM.

PUNCTUM I.

Nec Religiosi, licet paucioribus obnoxii periculis, & pluribus salutis mediis instructi sint, securos se unquam putent, aut immunes a lapsu, nisi sibi invigilent jugiter, caute ambulent, & vim sibi incessanter inferant, O! quot, qui stabant, aut stare videbantur, miserrime corruerunt? quot, qui nutriebantur in croceis, tandem amplexati sunt stercora? Horum exemplis ut sapere discas, perpende nunc causas tam miserabilium ruinarum, & perpectas devita.

Prima




Prima igitur ruinae Religioforum causa est, quam adumbravit Xtus in aedificata domo super arenam sine fundamento, cujus ruina facta est magna, postquam descendit pluvia, venerunt flumina, & flaverunt venti. Matth. 7. Luc. 6. Causa, inquam, ruinae est, non jactum in Novitiatu Religiositatis fundamentum; non radicans horror peccati, praesertim mortalis; non abstractus a saecularibus desideriis animus; non impressae cordi veritates aeternae; non stabilita rerum spiritualium aestimatio; non deducta in usum interna, externaque mortificatio; sub exteriori solum modestiola, tanquam sub dolosis cineribus, conservati igniculi mundani, & propter metum, perpetuamque tot superiorum vigilantiam finitum utcumque Tyrocinium; ex quo vix pedem miser Religiosus extulit; ecce idem, qui fuit ante Religionis ingressum, comparet, & interdum pejor; hinc sensim deterioratur, saecularefeit, ineptus Religioni redditur, ac corrui. Religiose! si coram DEO judicas, te solidum hucusque fundamentum non posuisse, nunc manum operi adinove: altum tempus est: optime nostis, quid a te requirat DEUS, conscientia, Religio, Institutum, tot gratiae, & instinctus DEI.

▪ *Altero*

Altera ruinæ Religiosorum causa est, quam Christus objecit Angelo, seu Episcopo Ephesinæ Ecclesiæ dicens: Habeo adversum te, quod charitatem tuam primam reliquisti! Apoc 2. Causa ergo est, recessus a primo Novitiatus fervore, seu intepescentia, orta præcipue ex infructuoso Orationis, ac meditationis usu, dum ad eam præparatio aut male fit, aut negligitur, dum non suo tempore peragitur, decurtatur, tandem plane omittitur. Sic, dum in Meditatione non exardescit ignis, noxie tepescit animus, tædium, fastidiumque rerum spiritualium introducit, vita ipsa religiosa desipit, ad ultimum teporis gradum devenitur, & ruina subsequitur. Tepidorum enim tam pœna, quam medicina non est, nisi gravis ruina. Cave tibi ergo, o Religiose, ab hac causa ruinæ, & ita obfirma animum, prout obfirmaverat Princeps Theologorum nostrum P. Franc. Suarez, qui dicere solebat: se malle totam scientiam suam, tot annis quæsitam perdere, quam horam unam orandi consuetam in Societate intermittere.

PUNCTUM II.

Tertia ruinæ Religiosorum causa est effusio ad externa, & captatio ultronea distractionum, conversationum solius tædii vitandi



vitandi causa, ingerendo se in negotia non necessaria sponte, & non ex obedientia. Per talem ad exteriora effusionem dissipatur spiritus, interna negliguntur, in via DEI non proficitur, sed deficitur, atque in ruinam itur. In quæ mala ne devolvaris, Religiose, attende tibi, & Religiositati. Est, quod agas circa animam tuam; æternitatis negotium, heu quantum, & quale! habes; age, quod est muneris, officiique tui; cetera DEUS a te non requirit. Si cogeris ad exteriores occupationes, commoda te illis, non dona, idque ex parte solum, & non totum; tecum autem intus habita, cubiculum ama, & amabit te amator solitudinis JESUS.

Quarta ruinæ Religiosorum causa est similis illi, ob quam corrui Lucifer, nimirum appetitus excellentiæ propriæ, defectusque humilitatis, ex quo oritur æstimatio sui ipsius, fuga omnis contemptus, jactatio nobilitatis, doctrinæ, aliorumque talentorum, desiderium & procuratio eminentiæ, prælationisque supra alios, officiorum honoratorum, mansionis commodioris; indignatio, dum alii præferuntur, officiis speciosis applicantur, vel ad res magnas gerendas, ad altiora docenda &c. Ex indignatione oritur amaritudo animi, & vita insipida in Religione, & tandem ejusdem defertio.

tertio. Ob talem excellentiæ propriæ appetitum corrumpit olim in Provincia Polona circa 1630. quidam; qui dum coram Generali Exercituum Duce Conieckpoliski concionatus esset, hanc ab eo laudem tulit: *Egregius esset, Prælatum, si Religioni obligatus non esset.* Pupugit hoc encomium ita hominem vaniculum, ut extorta vario prætextu a Societate dimissione recta Barum ad illum discesserit, a quo tamen nec admissus est. Sic misere deceptus, & ab Episcopo Camenecensi exiguo interim beneficio provisorius, dum opera P. Rectoris Camenecensis admissionem ad Societatem iterum impetrare conatur, resque hæc tantisper protrahitur, in desperationem incidit, & inflictis pectori decem vulneribus animam efflat, extra locum sacrum sepultus, qui terram sanctam, Societatem, Prælaturæ causa deseruerat!

PUNCTUM III.

Quinta ruinæ Religiosorum causa est, quam exprimit DEUS Oseæ 7. Comederunt alieni robur ejus, & ipse nescivit; nimis libera, & incauta conversatio cum sæcularibus. De fide enim est, cum sancto sanctos nos fieri, cum perverso perverti: ergo & cum sæculari incaute conversantem sæcularem fieri, certum est. Et quidem interdum ad

R

hanc



hanc conversationem deveniunt Religiosi ex
tadio solitudinis, & silentij, interdum autem
ex occasione Missionum, Confessionum &c.
Sed paulatim contrahitur familiaritas, liberiôr
agendi modus &c. & tandem ruina. Quid
tibi, Religiose, cum sæculo, quod ultro
reliquisti? quid cum ejus sectatoribus, qui
socius factus es Angelorum?

Sexta ruinæ Religiosorum, præsertim in
Societate nostra causa est, ut alia omittam,
fortis persuasio; qua putat Religiosus, se
posse salvari, etiam extra Religionem in
sæculo, & quidem ibi se utiliore fore Eccle-
siæ DEI, aut ad minimum æque, ac in Reli-
gione utilem. Hæc est deceptio diaboli
periculosa. Verum enim est, te posse salvari
in sæculo; sed non salvaberis propter præci-
sum prædestinationis filium. Quis es tu, ut
DEUS se tibi accomodet circa vitæ statum,
& non tu DEO? putas, te fore utilem
Ecclesiæ DEI; & tu radicem omnis boni,
voluntatem DEI deferis! Putasne, luisse te-
cum DEUM, dum te ad Religionem vo-
cavit? putas quoque, tibi collusurum DEUM,
& ad inconstantiam tuam mutaturum seriem
prædestinationis suæ circa te? Nulli bene
cecidit alea hæc: sta igitur in gradu tuo,
& non corrues.

CON-



CONSIDERATIO IV.

DE CURA MINIMORUM

PUNCTUM I.

Cura minimorum est studium diligens, ac providum rerum minimarum sive declinandarum, cum perfectioni nocent: sive complectendarum; cum profunt. Cum enim perfectio vitæ cujusque in declinatione mali, & complexione boni consistat, altera sine altera non sufficit; sed alteram alteri jungat, necesse est, quicumque ad perfectionem tendere tenetur. De qua quidem necessitate ut clarius se quisque convincere queat, statui & curam declinandarum, & complectendarum rerum minimarum singulis punctis comprehendere, & pro illa quidem in 2do hujus considerationis puncto; pro hac vero in 3tio motiva ponderosissima adferre. Atque hoc ut majore cum fructu fiat, diluendæ prius sunt objectiones quædam, quæ a tepidis Religiosis adduci, & tanquam scutum, omnibus laxitatem sibi exprobrantibus opponi solent. *Istæ sunt minutie: parum pro nihilo computatur.* Sit sua sane huic propositioni veritas in rebus terrenis, & politicis; quanquam nec sit in iis semper:

In rebus tamen supernaturalibus, ad DEUM,
 & salutem spectantibus res longe aliter se
 habet. Audi effatum S. Basilii: nil est minu-
 tum, quod Dei causa fit, sed grande, &
 ejusmodi, quod cælum nobis, & præmia cæle-
 stia conciliat. Eodem modo de cura minima-
 rum rerum declinandarum discurre oportet,
 nil scilicet esse minutum, quod DEO displi-
 cet, & a cælo vel ad momentum nos remo-
 ratur. *Hæc sunt tantum pro Novitijs.* Pro
 Novitijs, & quare? an ut accurationi assues-
 cant? Ergo post Novitiatum accuratione am-
 plius non est opus? An ut vitam religiosam,
 fervidam, mortificatam vivere discant? Sed
 ad quid assuescere tali vitæ deberent, si post
 Tyrocinium vivere remissius licet? Imo, post-
 quam Deo te per vota religiosa totum con-
 secrasti, teneris utique ad majorem, quam
 antea, observantiam. Plus a Veterano, quam
 Novitio milite tam mundus, quam DEUS
 jure expectat, & exigit. *Sed ista non sunt*
essentialia. Verum est; sed sine accuratione
 in minimis etiam essentialia non diu obser-
 vabuntur. Sed dato etiam, quod observa-
 rentur; an tu cum servo contentus esses,
 qui nonnisi magna, & essentialia mandata
 executus, cetera omnia libere negligeret? an
 restringere se solum ad ea, ad quæ quis sub
 pec-


peccato, & fors gravi vel facienda, vel fugienda tenetur, est animi boni, & liberalis indicium? *Continua minimorum observatio esset onus intolerabile.* Hanc observationem aliquid oneris habere, nemo negabit, præcipue cum Christus ipse legem suam Evangelicam jugum, & onus appellet. Sed onus intolerabile dici non potest, nisi forsan ab illis qui crucem quidem vident, sed unctionem internam non sentiunt. Certe Majores nostri portabant hoc onus & libenter, & alacriter, imo si qua scriptoribus vitæ illorum fides, observatum est fere semper, eos, qui majore studio & contentione curæ minimorum invigilabant, uberioribus etiam spiritualibus consolationibus abundasse. Ceterum; etsi hæc deessent; & si gravissima nobis accideret rerum in Religioso statu minimarum cura, meminisse debemus, illum esse pœnitentiæ locum, ut optime demonstrat Hieronymus Platus noster; in quo delicta sæculi puniuntur: vocarique a SS. Patribus servitutem, militiam, bellum, martyrium &c quæ nomina sunt non solum onerosarum, & laboriosarum rerum, sed etiam, quæ carnem, sensusque cruciant, & afficiant.


PUNCTUM II.

Dissolutis objectionibus contra curam minimarum rerum fieri solitis, perpende
neces-



necessitatem hujus curæ in minimis malis
 declinandis ex motivis sequentibus: 1. quia om-
 nes etiam minimi defectus, & peccata Reli-
 giosi ex mente Theologorum, & S. Thomæ
 graviora sunt, & DEO magis displicent, quam
 peccata hominis sæcularis ejusdem speciei prop-
 ter vota, contra quæ peccat; propter ingra-
 titudinem, qua tot gratiis, & beneficiis sin-
 gularibus præventus peccat; propter scanda-
 lum, quia plures ad ejus vitam respiciunt.
 2. Privant nos multis spiritualibus bonis; im-
 minunt charitatem Dei in nos, & impediunt
 liberaliorem illius in animam nostram influ-
 xum; opera nostra bona ceteroqui vitiant,
 & minus grata Deo faciunt, auferunt gustum,
 &, ut ait S. Gregorius Papa saturitatem in-
 ternam in susceptione SS. Eucharistiæ; red-
 dunt nos indignos speciali custodia Angelo-
 rum, ut docet Card. Cajetanus; spoliant nos
 ex mente S. Bonaventuræ gratia sensibili con-
 solationis internæ. Nec dubium est, quin sæpi-
 sime desolationes spiritus, ariditates in ora-
 tione, tædium vitæ spiritualis pænæ sint in-
 flicte, mala minima non metuentibus, & con-
 fessione, vel dolore vero non eluentibus. 3.
 Impediunt specialia auxilia divina. Ita docet
 Richardus a S. Victore: *Parvæ negligentia,*
inquit, obscurant animam, & impedimentum
faciunt


faciunt amplioris gratiæ, illius nempe copio-
fioris, & efficacis auxilii, sine quo non solum
in via virtutum non multum progredieris, sed
potius graviore tentatione facile victus in vitia
prolaberis. Tanto enim dono, quod ex mera
liberalitate, & plane gratis tribuitur, fit indi-
gnus Religiosus negligens, quia per incuriam,
& contemptum minimorum male de DEO
meretur. Ideo monet S. Basilius Monachos:
qui a Deo optat se juvari, is nunquam dese-
rit, quod se addecet, officium suum. Qui autem
hoc facit, is divino auxilio nunquam destitu-
itur. Quapropter danda in eo opera est, ne
ulla in re conscientia nostra nos condemnet.
 4. Sternunt viam, & disponunt ad graviores
 lapsus, & mortem animæ, sicut febres non
 quidem graves, sed frequentes ad mortem
 corporis. Oraculum est S. Spiritus: *Qui sper-*
nit modica, paulatim decidet. SS. PP. Augu-
 stinus, Chrysostomus, Isidorus, Damascenus,
 Gregorius Magnus, quos S. Thomas citat,
 uno ore asseverant, contemptum minimorum
 peccatorum esse dispositionem fere certam ad
 mortalia. Verba S. Aug: sunt, *dum homines*
despiciunt peccata sua, quæ parva sunt, cres-
centibus minutis peccatis, adduntur etiam cri-
mina. S. Chrys: *qui pusilla dissimulant, majora*
invitant. S. Isid: *contemptu minorum peccato-*
rum,



rum, majora committuntur S. Damasc. Qui minima vitia & peccata nihili pendunt, graviora sibi invehunt. S. Greg: M. In unoquo lapsu a minimis semper incipitur, & succrescentibus defectibus ad graviora devenitur. Nam nemo repente fit pessimus. Quisquis damnatus est, primo per leviora tanquam per gradus ad graviora, & inde ad tartara descendit. Verbo: damnatio æterna sæpe ex unico minore peccato tristi serie dependet; non, quasi istud infernum mereretur; sed quia deducit ad infernum. Exemplo sit S. Theresia, quæ per revelationem sibi factam didicit, se æternis addicendam fuisse inferorum suppliciis, nisi quasdam otiosas, & lætas conversationes cum aliis vitasset.

PUNCTUM III.

Motiva pro diligenti cura minimorum complectendorum. 1. Præmium in cælo, quod rebus etiam exiguis amore Dei factis promittitur: Euge serve bone, & fidelis, quia super pauca fustis fidelis &c. 2. In Exercitio minimorum minus est periculi vanæ gloriæ, & amoris proprii, adeoque meritum incorruptius, & præmium certius. 3. Licet modica in se sint singula, evadit tamen sensim magnus meritorum cumulus eodem modo, ut collecta diu, & reposita parva



parva dona thesaurum non contemnendum efficiunt. 4. Per exercitium diligens minimorum apti reddimur ad facienda etiam majora. Roborantur enim vires animæ per hoc continuum exercitium, sicut per motum continuum roborantur vires corporis, contrahitur bonus habitus, crescit fiducia, & animus etiam majora audendi, a Deo copiosiores gratiæ obtinentur &c. Huc collimare videtur effatum illud S. Theresiæ: res minimæ tanti momenti sunt ad inchoandum in virtutibus profectum, ut anima & pennis, & alis carens volare incipiat, & nemo id credat, nisi qui in se expertus est. 5. Tandem si, cum magna seu defectu occasionis, seu difficultatum metu non faciamus, etiam negligamus minima, quid, quæso, nobis pro Regno cælorum, quod adultis solum ut merces datur, remanebit?

Coronidis loco inquire partim in materias, circa quas præcipue tua in minimis seu vitandis, seu faciendis attentio, & cura versari debeat: v. g. circa Vota, res spirituales, charitatem fraternam, officia tibi assignata, ordinem diurnum, abnegationem propriæ voluntatis mortificationem sensuum &c. partim in modos, quibus minimas actiones magis meritorias reddere possis v. g. si ex puro
Dei



Dei amore, ex obedientia, cum actuali intentione, magna accuratione, & spiritus hilaritate, cum desiderio exaggerate Deo gustum faciendi, ad exemplum Xti in terris conversantis omnia facias, quem proinde jugiter ob oculos tibi ponere, illius meritis tua conjungere oportebit.


CONSIDERATIO V.

DE FUGA OTII.

PUNCTUM I.

Otium est vitium gravius, periculosius & magis universale, quam primo forsitan intuitu videatur. Plerique enim putant, se tunc tantum otiosi, cum ab omni labore ita vacant, ut nihil omnino agant. Sed gravis est iste error, & Religiosis præsertim mentibus, si quibus insideret, necessario eximendus. Non enim solum agere nihil, sed etiam alia ab iis agere, quæ nobis facienda sunt, etiam inutilia agere, vel agere male, quod agimus, talia sunt, quibus otii nomen jure tribui potest! Imo: datur & aliud otii genus, quod mentale non incongrue dicimus, quando quis mentem operibus, quæ exequitur, aut omnino non, aut tam

tam parum applicat, ut ad alia potius omnia
 eam evagari pro libitu sinat. Atque hæc
 quidem si vera sunt, uti certe sunt, quis
 non videt, quam longe, & late hoc vi-
 tium extendatur? Seneca, utut Ethnicus, ve-
 ritatem tamen hanc ipso rationis lumine be-
 ne penetrans, simulque communem vivendi
 modum hominum attente perlustrans asserere
 non dubitat, totam fere hominum vitam
 otiosam esse, cum magna, ut ait, vitæ pars
 elabatur male agentibus, maxima nihil agen-
 tibus, tota aliud agentibus. Et sane non inju-
 riâ; Sive enim spectemus finem creationis
 nostræ primarium, sive finem temporis no-
 bis a Deo benigne concessi; qui aliud a-
 gunt, vel inutilia, & male agunt, agere o-
 mnino nihil; & coram oculis Dei, & ho-
 minum prudentum vere otiosi dicendi sunt,
 licet innumeris quotidie negotiis videantur
 impliciti; quia vel ad scopum sibi præfi-
 xum non tendunt, vel plane ab illo aber-
 rant. An porro inveniri paucos putas, quo-
 rum vita talis est, qualem Seneca otiosam
 appellat? Ego vero plurimos, utinam non
 etiam Religiosos! Quot enim vel inter ipsos
 Religiosos dantur, qui magna diei parte se
 negotiis suæ vocationi non conformibus,
 vel inutilibus occupant? qui neglectis, vel
 depro-




deproperatis functionibus suis spiritualibus alia omnia frequentius, & libentius agunt, quam quæ ex officio agere deberent? qui horas quotidie complures captandis rumoribus, inanibus colloquiis, somno non necessario, & sæcularium visitationibus impendunt? Et an non hi spectato creationis suæ fine, imo spectato fine ipsius temporis nobis concessi vere otiosi censendi sunt, dum illud non pro servitio Dei, non pro salute sua, vel proximi, non pro agenda penitentia, & colligendis meritis, ut deberent, sed inutiliter impendunt? An non etiam tu ex horum, es numero? Percurre ordinem tuum diurnum, & indaga, an non etiam te frequenter particula hujus boni doni prætereat; præcipue quomodo subcisa illa tempuscula, quæ inter unam & alteram actionem intercedunt, ante, & post exitum &c. impendas, & serio propone, non defraudari imposterum a die bono.

PUNCTUM II.

Gravitatem hujus vitii metire ex gravitate jacturæ, quam per otium pateris. S. Bernardus otiosum non immerito insipientem appellat, eo quid sibi ipsi maximum damnum inferat. Volat tempus irremeabile; inquit! nec advertit insipiens, quid amittat. Hæc verba,

verba, licet grandem otiosi hominis jacturam, clare non assignent, lumen tamen nobis accendunt, ad illam facile pervestigandam. Perdit enim imo tempus, quod ab arbitrio nostro nullatenus dependet, eoquod tempora & momenta Pater cælestis in sua solus potestate posuit; donum DEI mere gratuitum, donum pretiosissimum, & inæstimabile, quod juxta effatum S. Bernardini tantum valet, quantum DEUS: perdit tempus alioqui breve, & nec revocabile unquam, nec compensabile; quod, si non illico apprehendas, dum adest, amplius, licet velis, uti illo non poteris. Velocius enim omni sagitta, omni cogitatione prætervolat, nec ullum sui vestigium relinquit. Ubi, quæso, nunc sunt anni pueritiæ, juventutis tuæ, & reliqui, quos vixisti? fuerunt, & non sunt amplius. I, revoca illos, si potes! irrevocabiles sunt; & damnum hac temporis jactura tibi illatum compensari non potest. Recuperari, & compensari potest jactura sanitatis, honoris, bonorum temporalium: sed ut semel perditum tempus non sit perditum pro tota æternitate, nec ipse Omnipotens efficere sua omnipotentia potest. Volat irreineabile tempus, nec advertit insipiens, quid amittat!

2. Perdit omnia bona, quæ per bonum
usum



usum temporis obtinere potuisset, & debuisset: & quidem non terrena, sed longe altioris ordinis bona, quorum intuitu illa fere evanescunt. Quantum enim bonum est gratia sanctificans? tantum, ait S. Thomas, *ut unus illius gradus omnia bona creata infinitis superet!* Quantum bonum est cælestis gloria? tantum, ait Apostolus, *ut neque a lingua humana satis extolli, neque ab intellectu creato comprehendi queat!* fide autem certum est, quod per quodlibet bene impensum momentum novum gratiæ sanctificantis & cælestis gloriæ gradum, consequenter per longius tempus, immensos gloriæ thesauros pro altera vita promereri possimus. Idcirco recte ait S. Hieronymus: minima temporis particula est pretium æternitatis, quia per hujus bonum usum cælestia, æterna bona, bona, quæ possessionem ipsius DEI, summi, & infiniti boni comprehendunt, emere possumus. Quid hinc consequitur? perdere te tot merita, tot coronas pro cælo, tot gradus gloriæ, quot tempuscula perdis; imò perdere te, si otiosi pergas, spem cæli unquam obtinendi, quoniam, ut inquit S. Prosper, non otiosis, aut dormientibus provenit regnum cælorum. Quanta hæc jactura! quantum damnum!



PUNCTUM III.

Considera denique, quam periculosum etiam sit otium! Otiositas est *mater nugarum*, inquit S. Bernardus, *Noverca virtutum*. Generat enim in Religioso fastidium erga fratres, tedium erga exercitia spiritualia, & alia opera, quæ secundum obedientiam obeunda forent; & quia erga hæc parum afficitur, in rebus inutilibus solatium aucupatur, quærit occasiones frequenter foras prodeundi, captat occasiones conversandi cum sæcularibus, indagat in rumusculos, & dum his nugis occupatur, extinguatur spiritus. refrigerat proficiendi in via Domini desiderium, & omnis virtus sensim languet enervata.

2. Otiositas est mater fecunda multarum tentationum. Sicut stagnum, ait Hugo a S. Victore, abundantiam nutrit piscium, sic otiositas multitudinem cogitationum. S. Bernardus: Omnium tentationum & cogitationum malarum colluvies est otium, malorum omnium sentina, mors animæ. S. Augustinus non solum idipsum docet, sed etiam aliquas harum tentationum enumerat dicens: Per otiositatem accendimur ad luxuriam: per hanc animamur ad superbiam: per hanc ducimur ad mundi gloriam: per hanc tentamur



tamur delicate palli; per hanc suffocamur pretiose vestiti: per hanc ad superfluum dormitionem trahimur: per hanc ad verba sæcularia ducimur &c. Novit id bene S. P. Ignatius, & ideo speciali lege suis cautum voluit, ne otium domi nostræ locum habeat; novere Patres in Ægypto antiqui tempus suum omne, quod exercitiis spiritualibus supererat, vario manuum labori impendentes: facit enim, ut loquitur Cassianus, ab illis erat sententia: operantem Monachum ab uno dæmone pulsari, otiosum ab innumeris spiritibus devastari.

3. Otiositas est Nutrix, & Magistra criminum. Effatum est Spiritus Sancti Eccli 23. *multam malitiam docuit otiositas;* & Ezech. 16. 49. depravatio Sodomitarum partim etiam otio adscribitur: *Hæc fuit iniquitas Sodomæ superbia, saturitas panis, & abundantia, & otium.* Si experientiam, & historias consulas, an non otium erat origo, & primaria causa lapsus Evæ, adulterii Davidis, jacturæ virginitatis Dinæ, idololatriæ in populo Israelitico? Hunc certe esse communem, & naturalem otii effectum probant SS. Chrysostomus, & Bernardus, pulchra uterque Similitudine: sicut aqua, ait hic, quæ caret decursu, ac jacet in foveis, pu-

putrescit; ita & corpus p̄tū tabe confectum concupiscentiarum, & voluptatum carnalium parit, ac nutrit insaniam. Et alter: sicut terra non occupata semente, aut consitione quamlibet herbam producit; sic & anima, quoties non habet, quod agat rerum necessariorum, pravis actionibus semet tradit. Hinc recte S. Augustinus concludit terribili hoc Epiphonemate: Nunquam quis civis cælorum erit, si otiositatem amaverit! quoniam, ut vidimus, nulla in otiosis pro cælo merita, sed copiosa plerumque demerita inveniuntur.


CONSIDERATIO VI.

DE CONVERSATIONE CUM PROXIMO.

Quoniam plerisque Religiosis frequens tam inter se invicem, quam cum sæcularibus vi vocationis suæ intercedat conversatio, non abs re erit, ut quisque bene perspiciat, qualem illam esse oporteat, ne vel statui suo maculam inurat, vel animæ propriæ vulnus infligat. Ad hæc valebunt præcipuis tres regulæ, totidem punctis distinctæ, e quibus conversationem suam moderetur.

PUNCTUM I.

Conversatio universim sit prudens & modesta.



desta. Multa, quæ in sæcularibus innocua, vel certe reprehensione digna non sunt, Religiosos nequaquam decent, quin interdum nec culpâ carent. Quapropter quisque nostrum sibi præ omnibus applicet monitum illud Apostoli, Philipp. 4. Modestia vestra nota sit omnibus hominibus. Modestia eluceat e facie, ex oculis, ex gestibus, ex verbis, ex modo loquendi, ex sono vocis, breviter, ex toto corporis habitu. Erras, mi Religiose, si putes, te per maiorem familiaritatem, liberiores agendi modum, per colloquia jocosa, & minus modesta gratiam tibi sæcularium, & confidentiam conciliaturum. Mundus est censor exactissimus, qui singulis Religiosorum Virorum gressibus invigilat, & conformem ipsorum statui pietatem rigide ab omnibus exigit, a qua ipse longissime abest. Expectat igitur in conversatione nostra, & colloquiis religiosam gravitatem, modestiam, moderationem, & prudentiam; quæis qui excellunt, suaviter in cor sæcularium influunt, æstimationem, confidentiamque auferunt; quibus vero hæc desunt, ab aliis quidem tanquam homines, qui jucunde fallere tempus norint, considerantur, ab aliis tanquam garruli, & vaniculi contemnuntur. Ut autem talis quis in conversatione sit, qualem mundus expectat, & esse decet,

opor-

oportet mentem bene collectam secum circumferre. Qui enim DEUM ubique sibi præsentem habet, erit urbanus sine affectatione; hilarius, quin se tamen ad externa effundat; affabilis, & facetus, quin de gravitate sua aliquid deperdat; erit sincerus, quin decentiam lædat; eloquens, quin, quidquid in buccam venit, effutiat, quin solus usque loquatur, vel in verba aliorum involet. Quot defectus, in conversatione committi soliti, evitentur, si secundum hoc Prototypon nos dirigerimus, & non oblivisceremur christianæ, & religiosæ reverentiæ, quam alter alteri debemus!

PUNCTUM II.

Conversatio sit seria, & colloquia de gravibus, & utilibus rebus. Nolim, hic intelligas; tractandum semper, & unice esse de rebus spiritualibus. Inter Religiosos optandum quidem esset; verum, quemadmodum Religio suis quædam tempora indulget ad animum modelte exhilarandum, ita majorem illis etiam libertatem concedit, nec prohibet de rebus minus forsitan gravibus, & seriis sermones miscere. Conniventia hæc est prudens, & regulis sanæ discretionis conformis. Turpe nihilominus, & Religioso viro prorsus inconveniens esset, si tempus totum vanis, & in-

utilibus colloquiis perderetur; si tantum ad pascendam curiositatem conquirentur rumulculi per urbem sparsi, & fabellæ populares; si etiam tempore silentii conventicula, & sermones fierent de rebus, quas aut domi nostræ, aut in urbe, privatisve aliorum domibus factas audivimus; si in omnibus, vel plerisque congressibus nulla de DEO, rebusque Spiritualibus, sed solum de sæcularibus mentio fieret; si sermones pii, vel salutares reflexiones non nisi cum tædio audirentur. Hæc, inquam, sanctitati status nostri nullatenus convenirent, & tolerari non possent, cum præsertim experientia constet, vana ejusmodi, & sæcularia colloquia producere communiter in Religiosis distractiones innumeras, tædium rerum spiritualium, ariditatem cordis; imo extinguere sensim spiritum, & non mediocrem in obsequio Divino teporem inducere.

Adhuc minus ferendum est, Religiosos conversari sæpius cum sæcularibus, & sermones quoque longiores miscere, quin de rebus spiritualibus, de veritatibus æternis vel mentionem faciant, eo quod metuant, ne per colloquia Spiritualia a nostra conversatione deterreantur. Verum quidem est, discretione opus esse, nec expedire, ut talia in omni congressu quasi

quasi nolentibus obtrudantur. Interim & hoc quoque certum est, non deterri tam facile sæculares, si quæ ad illorum seu ædificationem, seu instructionem interdum proferat Religiosus, cujus statum, & vocationem id exigere norunt, ut doceat, admoneat &c. imo, scandalizari potius non paucos, si illum, cum communiter Navita de ventis, de bobus narret Arator, si illum solum, inquam, hominem DEO consecratum de rebus a suo statu alienis sæpe, de ijs vero, quæ suæ vocationis sunt, nunquam loquentem audiant. Quodsi vero tales sermones illis revera displicerent, id unum inde consequetur, ut ad nos rarius invisant. Et hoc ipsum erat Principium S. P. N. Ignatii: Aut me de rebus piis & salutaribus sermocinantem libenter audient sæculares, ajebat, & DEUS laudabitur, & ego obtinebo, quod desidero; aut his materiis deterriti rarius ad me venient, & ego minus temporis perdam. Et quid tandem necesse est, toties conversari cum hominibus sæcularibus, si visitationes, quas illi nobis, vel nos illis facimus, nihil ad nostram, vel ad illorum salutem conferant? Consultius longe est, in solitudine sua manere, & juxta effatum illud Christi Matth: 8. *mortuos sinere suos mortuos sepelire.*



epelire. Apostoli quidem totum mundum peragrarunt, sed tantum, ut annuntient regnum DEI, Evangelium Christi prædicent &c. Ex alio fine cum mundo, cui valediximus, agere, idem est, ac mundum amare, mundanum esse, & fors pejus, quam si in sæculo remansissemus.

PUNCTUM III.

Conversatio sit charitatis mutuæ studiosa, sine cujusquam læsione. Universale quidem est illud sapientis dictum: *Qui non offendit in verbo, hic perfectus est vir:* sed præcipue de amore proximi pronunciari potest, non esse virtutem vulgarem, sed magnam perfectionem, nullum in colloquiis offendere. Etiam in ipsis Monasteriis ab hoc lapide offensionis caveri vix satis potest. Consueti modi, quibus læditur charitas, sunt. 1. Innata quædam impatientia hominum plus æquo servidorum, qui nulli quidquam pacifice loqui possunt. Vix verbulo uno aut altero illos alloqui est possibile, quin inamænum responsum referas, & quacunque cautela utaris, vix illæsus abibis unquam. 2. Contradictiones, & litigia, quæ oriuntur, dum pars utraque incalescit, & altera quidem spiritu contradictionis acta suas difficultates & objectiones contra Asserta proponit: altera vero sui iudicii nimium tenax, cedere, & errores suos

recan-

recantare renuit, vibratis hinc inde verborum jaculis, quæ animos vulnerant. 3. Verba jocosæ, & aculeata, quæ alteri non satis cauto excidunt, & ab altero nimium sensibili in malam partem accipiuntur. Sunt enim ubique quemadmodum aliqui tam delicati, ut illis exacerbandis verbum unum sufficiat; ita alii tam leves, ut dicta factaque aliorum omnia suis salibus perfricent, nulli parcant, & modum jocandi tenere nesciant, licet alios id ægre ferre advertant. 4. Judicia, & murmuraciones contra Superiores, Officiales, vel alios. Quamprimum aliquibus quidpiam displicet (& quam pauca placent omnibus?) jam tacere nequeunt, in murmura, & querelas profiliunt, non quod sperent, res mutandas, aut corrigendas fore, sed ex indomita cupiditate, omnia dijudicandi, vituperandi &c. 5. Detractiones. In hac materia tam delicata nulla etiam inter Religiosos attentio & cautela est superflua. Circa alias omnes materias observatur communiter in Religiosis tenerior conscientia; sed circa detractiones laxissima interdum in aliquibus principia vigent. Rara fiunt colloquia, in quibus de proximo non incidat sermo: & si quando ad illius errores descendatur, effutiantur facile

facile per inconsiderantiam, vel alia de causa, quæ celari deberent. Hæc aliaque ejusmodi e nostris congressibus, & confabulationibus exclusa vult amor. Nulla sit in verbis amarities, inurbanitas nulla, nulla impatientia! Non possumus semper impedire, ne passio, vel sinister affectus se cordi insinuet, sed illum refrænare, ne in vehementes contradictiones, in verba amoris læsiva prorumpat, in potestate nostra est. Quisque habet jus sententiam suam proferendi: sed si advertimus, enasci litigia, millies tacere præstat, quam rem suam ceteroqui bonam defendere cum læsione charitatis. Absint e colloquijs nostris non solum aculeati, sed etiam innocui, & ingeniosi joci, si qui e præsentibus illos ægre ferre notentur. Cessat enim esse innocuus, dum offensivus esse incipit! Absint murmura, & querelæ! Si quid enim aut vituperio, aut correctione dignum videatur, non id publice, sed remotis arbitris fiat, ne speciem quasi seditionis habeat. Absint denique omnes vel minimæ detractiões! Loquamur bene de omnibus, & si quid laudabile de proximo nesciamus, tacere potius oportet. Per accurratam harum regularum observantiam quot peccata, & mala evitabuntur? quam pacifica, quam bona
ad om-

ad omnes exempli, quam jucunda erit nostra conversatio? Ita illud Regii Psaltis 132 in nobis implebitur; Ecce! quam bonum, & jucundum, habitare fratres in unum!

CONSIDERATIO VII.

DE CREBRA ET DEVOTA VISITATIONE


SS. SACRAMENTI.

PUNCTUM I.

Hæc devotio est menti JESU Christi maxime conformis. Maxima ars Politicæ humanæ in iis, qui libero ad Reges terrenos aditu, & honore illis inserviendi gaudent, consistit in hoc, ut exploratis omni sagacitate illorum modo cogitandi, & inclinationibus se accommodent. Ut inclinatio Filii Dei, Regis Regum nobis innotescat, multis opus non est. Edixit clare in scripturis sacris, plurimum se ex eo gaudii percipere, si commemorari nos inter, & familiariter nobiscum agere queat: Deliciæ meæ esse cum Filiis hominum Prov. 8. Ecce ego vobiscum sum usque ad consummationem sæculi Matth. 28. Quod utroque hoc loco asseveratur, & promittitur, opere completum videmus in SS. Eucharistiæ sacramento, ex quo nobis iden-

identidem idem inclamat, quod tunc suis Discipulis prædixerat: Ecce ego vobiscum sum, non ad unam, alteramve diem, uno tantum, alterove anno, sed ad finem usque mundi! Ascendi quidem post resurrectionem meam ad Patrem meum, ac Patrem vestrum; sed ne vos relinquerem orphanos, in Sacramento Altaris invisibiliter quidem, & speciebus panis velatus, vere tamen, & realiter præsens adsum: quia sicut vos sine me vivere non potestis, sic ego sine vobis esse nolo. Hæc sunt illius ad nos verba, vel saltem genuinus verborum illorum sensus: ex quibus duas has sequelas deduces. i Nil ergo præstare JESU Christo gratius possum, quam si illum in loco habitationis suæ sæpius invisam. Ille me invitat, & vocat: an non eodem, quo ipse flagrat, me ad se trahendi, ego quoque flagrem desiderio ad ipsum non tam accedendi, quam advolandi? An non eadem, qua ipse me tam benigne expectat, constantiâ apud ipsum commorer? Sed quoniam diversa negotia, & officia, quæ nobis incumbunt, tamdiu nos ibi morari non sinunt, quamdiu luberet; quid agit pia, & Divino suo sponso vere fidelis anima? Amore illius, & desiderio illi placendi, copiosissimis etiam negotiis suffu-
rari

rari novit quædam temporis spatia, queis eum quasi ex lege adoratura invisit. Invisit mane, ad offerendas illi diei primitias, consecrandosque Sancto illius Numini negotiorum omnium labores: invisit circa meridiem, ut mentem tot externis curis dissipatam colligat, & denuo ad eum elevet: invisit circa vespèram, & antequam cubitum concedat, partim ut pro collatis sibi beneficijs debitas rependat grates, partim ut commissos errores deprecetur, gratiam, & opem imploret contra invisibiles hostes, & pericula, quæ ingruere noctu possunt. Hæc omnia non tam longas orationes, quam pios affectus requirunt, quibus quisque pro ratione temporis, & occupationum suarum insistere brevius, aut diutius potest. 2da, quam deduces, sequela est: ostenderem ergo exiguam huius SS. Sacramenti æstimationem, & DEUM sensibilibus offenderem, si manifestato illius desiderio, & amoris, quo me prævenit, respondere recusarem. Resume hic iterum illam de terrenis Regibus paritatem, & cogita: Sanctuarium esse Palatium, & Aulam, in qua Christus residet. Quemadmodum igitur Aulam Regum desertam esse, probro- tum illis, & valde sensibile est, eoquod si- gnum sit manifestum, se non solum a sub- ditis non amari, sed etiam vilipendi; ita




Xto amarum accidere, &, dolere maxime debet, si, cum a plerisque alioqui sæcularibus desertum se videt, nec a Religiosis frequentius visitetur, quibus tamen maxime conveniret, hanc sæcularium seu negligentiam, seu vilipensionem resarcire; cum illos specialiter Deus elegerit amicos suos, & familiares. Metuendum certe, ne segnitiei nobis nostram iisdem verbis exprobet, quibus olim Xtus Discipulorum suorum somnolentiam increpabat Matth. 26. Non potuistis una hora vigilare mecum! Et huic quidem iustissimæ objurgationi quam excusationem opponere possemus?

PUNCTUM II.

Hæc devotio spiritui nostro est valde proficua. E mutuis sæcularium Visitationibus parum, aut nihil utilitatis in illos redundat. Frequenter propter mores aliquorum non satis cultos, frequenter propter sermones absurdos, qui audiuntur, sunt inamænæ & plenæ tædio, frequenter oriuntur discordiæ, pax turbatur, conscientia læditur; fere semper tempus perditur, & distractiones innumeræ domum referuntur. Longe aliter res se habet cum visitationibus, quæ JESU Christo in SS. Sacramento fiunt. Ex his nunquam non colliguntur fructus animæ uberrimi. Sunt enim *visitation-*

tationes sanctæ; seu objectum, cui fiunt, quod est JESUS Christus, omnis sanctitatis fons; seu finem, ob quem fiunt, qui est adoratio debita, gratiarum actio, imploratio auxilii &c seu denique virtutes spectes, quæ ibi exercentur, viva nempe fides, spes firma, charitas ardens, profunda animi demissio, sincera peccatorum detestatio, oblatio sui &c. Sunt *visitationes salutare*s. Hic enim fixit thronum misericordiæ suæ, e quo accedentibus ad se gratias suas multiplices distribuere statuit; hic miracula, quæ olim pertransiens Iudæam, & omnibus benefaciens patrabat, in bonum animarum renovat; hic cæcis reddit visum, debiles roborat, infirmas sanat, mortuas ad vitam revocat; Æquum itaque est, ut ad obtinenda ab eo talia beneficia, ad thronum hunc confugiamus, illius misericordiam frequenter, & humiliter imploremus. Sunt *visitationes solatio plenæ*: Tota hominis vita est miseria, & afflictio spiritus: etiam status Religiosus, multo ceteris felicior suis crucibus, & difficultatibus non caret. Sed quam felix est tristis anima, quæ novit, ubi in suis afflictionibus solatium, & opem invenire possit, & hanc quæsitura ad JESUM suum properat! Unica non raro amabilissimi hujus Patris visitatione est opus, ut mœror, & anxietas e corde depellatur, & quies



quies animo optata redeat! Crede experientiae tot devotarum animarum, quae praesentissimam in variis suis necessitatibus opem a visitato hoc SS. Sacramento dicto citius abstulisse se confitentur. Statue igitur & tu in dubiis pro consilio, in negotiis pro felici illorum exitu, in ariditate, & taedio pro consolatione, in tentationibus pro spiritus fortitudine ad illum recurrere; & confide, preces tuas nunquam fore irritas. Sed praee omnibus praefige tibi certa in dies singulos tempora, quibus latentem sub speciebus panis Deum hominem propter seipsum supplex adeas ad exhibendum illi honorem, & contestandum pro viribus amorem tuum, quem illi tot titulis debes!

PUNCTUM III.

Ut haec visitationes cum maiore devotione, & fructu fiant, eundo ad chorum cogita quo, & quare eas: elice actus fidei, spei, charitatis, contritionis. Deinde in singulis visitationibus vener. a certum mysterium; & pete gratiam aliquam peculiarem. v. g. In 1ma Visitatione representa tibi Christum a Magis adoratum; adora illum tanquam Regem tuum: offer illi te, tuaque omnia: pete gratiam, hunc diem sine peccato, & sancte transigendi. In 2da Imaginare tibi Christum duodennem
in tem-

in templo docentem; adora illum tanquam Doctorem tuum: pete gratiam in scientiis, & præcipue in scientia sanctorum proficiendi. In 3^{ta}. Considera Christum in templo contra emptores, & venditores zelantem pro honore Patris sui: adora illum tanquem futurum tuum judicem: pete verum zelum animarum. In 4^{ta} Representa tibi Christum his verbis te alloquentem: venite ad me omnes, qui laboratis &c. & adora illum tanquam medicum tuum, & cum Paralytico ad piscinam dic: Domine! hominem non habeo: Pete gratiam fortitudinis in adversis. In 5^{ta}. Imaginare tibi Christum in deserto prædicantem, & populum quinque panibus satiantem: Adora illum tanquam Pastorem tuum: pete, ut te quidem sæpius, sed præcipue ante mortem SS. Suo corpore, & sanguine reficiat: Deprecare injurias a te, & aliis in hoc Sacramento illi illatas. In 6^{ta}. Imaginare tibi Christum peccatores solícite ubique quærentem: adora illum tanquam Patrem tuum benignissimum: pete gratias efficaces, ut nunquam ab illo divellaris. In 7^{ma}. Comitare in spiritu Christum Hierosolymas solemniter ingredientem, & consummantem, quæ de ipso scripta erant, ad redemptionem nostram: adora illum tanquam Salvatorem tuum; pete felicem mortis horam, ne sanguis Ejus in te pereat.

Sin-

Singulis visitationibus adde brevissimam gratiarum actionem pro peculiari aliquo beneficio obtento: v. g. pro beneficio creationis, redemptionis &c vocationis ad veram fidem, ad Religionem &c dein subjunge Psalmum: de Profundis pro Consanguineis tuis &c pro redemptioni proximis, pro desitutis omni suffragio &c

Discedens e choro elice desiderium cum JESU semper permanendi: invoca SS. Angelos, ut etiam pro te absente Dominum cæli, & terræ adorent, glorificent &c

Quod si accedere chorum vel morbi, vel alterius negotii causa non possis, faciem saltem Ecclesiæ obverte, & fac, quod ibi facturus esses.

CONSIDERATIO VIII.


DE ALACRI PROPOSITORUM EXECUTIONE.

PUNCTUM I.

Ut optatos fructus ex hac sacra Spiritus re-collectione, quam hodie claudis, referas, in id nunc omnes curas intendere debes, ut facta per gratiam Dei vitæ melioris propofita illico, & constanter exequaris. Sicut enim Draco ille Apocalypticus stetit ante Mulierem, quæ erat paritura; ut cum peperisset, filium ejus

ejus devoraret: ita diabolus insidiatur animæ,
dum bonis propositis gravida jamjam paritura
est; ut aut partum impediat, aut ipso in partu
factum suffocet: terret illam objectis inille
difficultatibus: obmōvet sexcenta obstacula: præ-
textit humanam debilitatem, exempla aliorum
non ita viventium; sinistros hominum sermo-
nes, & judicia &c. Contra hæc, & alia omnia,
quæ tentator tibi insufurrabit, animū ob-
firmare in præsentiarum oportet, ne illud Væ
Matth. 24. prægnantibus intentatum aliquando
in caput tuum detonet: Væ prægnantibus, &
lactentibus in illis diebus! Licet enim secun-
dum literam hæc verba de prægnantibus, &
lactentibus Matribus intelligenda sint, quæ ex
multiplici causa, & præcipue ob majorem
fugæ difficultatem, graviores in desolatione
Hierosolymitana miseras timendas habebant:
in sensu tamen morali altiorē, & majoris
momenti veritatem continent. Sub prægnan-
tibus enim SS. Hieronymus, & Anselmus in-
telligunt illos, qui bona non raro proponunt,
sed opere exequi nunquam incipiunt: vel qui
incipiunt quidem, sed mox iterum desinunt.
Hi sunt prægnantes, sed nunquam pariunt;
vel pariunt quidem, at semper lactant, quin
factum unquam ad debitum incrementum per-
ducant: Utrique isti sunt leves, & inconstantes

T
homines,



homines, quibus Christus æternum Væ pro futuro Iudicio comminatur: & merito; cum enim cognoscant voluntatem Domini sui, & necessitatem, eam faciendi (hac enim cognitione vivaci impulsæ sunt ad concipienda melioris vitæ proposita) nec tamen eam faciant, merentur jure vapulare multis. Applica tibi hanc veritatem, & perpende, inexcusabilem te fore coram DEO, si vitam tuam juxta veritates in his exercitiis perpensas non institueris. Nam neque ignorantiam, neque defectum gratiæ te excitantis, neque virium debilitatem obtendere unquam poteris, quin conscientia propria illico reclamet, teque & nosse hæc omnia, & vehementes ob vitam hactenus male actam remorsus, stimulosque novam ordiendi sensisse; & vero adjuvante DEO; qui piis conatibus nunquam deest, etiam ordiri facile potuisse, si serio voluisses, revincat.

PUNCTUM II.

Ut autem voluntatem tuam magis inflames ad perrumpenda nunc statim impedimenta; & amplius robores, ne tam cito languescat; oportet, ut has, vel similes veritates alte menti tuæ imprimas, & identidem recoquendo familiares reddas: i. Proposita mea etiam optima, si non exequar, vel tantum ad tempus exequar, non me salvabunt. Desideria, inquit

quit S. Spiritus Prov: 21, occidunt pigrum. Infernus plenus est Velleitatibus: omnes proposuerunt; sed proposita non dederunt executioni. 2. Si proposita mea non incepero exequi nunc statim, nunquam exequar. Si namque nunc mihi est difficile, ubi tamen aliquis in me est fervor; erit mihi, si iterum intepuero, adhuc difficilius: si nunc respectus humanus me retinet, retinebit dein fortius &c. 3. Metuendum merito est mihi; ne provocem in me justitiam DEI, qui procrastinando emendationem, misericordiam ejus quasi ludifico. Verum quidem est, quod, cum pleraque mea proposita non versantur immediate circa essentialia officia Christiani, ex neglectu illorum non videatur esse tantum vindictæ Divinæ appropinquantis periculum: sed verum est etiam, intermissionem propositorum, etsi tantum imminutionem leviorum peccatorum, exactam disciplinæ Religiosæ observantiam, devotionis augmentum &c. concernant, semper sequelas maxime noxias post se trahere; inducere teporem, & solida confidentia doni pretiosissimi, finalis nempe perseverantiæ nos privare: Sola enim in bonis propositis perseverantia est, quam DEUS juxta communes providentiæ suæ leges ex parte nostra requirit, ut ex misericordia sua



donum finalis perseverantiæ nobis largiatur: id quod per illa verba Matth. 24. innuitur: Qui perseveraverit usque in finem, hic salvus erit: & Apoc: 2. Esto fidelis usque ad mortem, & dabo tibi coronam vitæ. 4. Fors hæc sacra exercitia, quæ nunc absolvi, tanquam ultimum medium destinavit Dominus me ab inveterato meo tepore sanandi; Væ mihi, si fructus optimæ illius intentioni non responderit! Terra enim, ut inquit S. Paulus Hebr: 6. sæpe venientem super se bibens imbrem; proferens tamen spinas, ac tribulos, reproba est, & maledicto proxima: cuius consummatio in combustionem!

P U N C T U M III.

Præces porro, quibus Viri salutis, & perfectionis suæ studiosi uti solent ad exequenda fideliter, & constanter sua proposita, communiores sunt: relegere attente singulis saltem hebdomadibus annotata in exercitiis lumina, & proposita: quotidie in examine generali inquirere, an hodie fuerit occasio proposita, & quæ, executioni dandi, & an executioni data sint: omni mense, instituta denuo de hac materia meditatione, rationem de iisdem a se exigere: & quomodo circa hæc te gesseris; quæ impedimenta, vel quæ notabiliores difficultates emerferint, cum Patre tuo Spirituali
sincere



sincere conferre; cui quidem statim post exercitia scripto exhibere proposita valde consultum esset, ut, si quæ indiscreto (quemadmodum fit interdum) fervore abreptus, aut viribus, aut statui, officiove tuo minus conformia concepisses, corrigat; vel si quæ nimis generalia, ad certas circumstantias, & particulares casus restringat: cum ad profectum spiritualem, & præsertim ad fidem eorum executionem non parum interest, proposita tua non tantum speculativa, sed practica; non vaga, & nimis late se extendentia, sed ad exigentiam, & statum animæ tuæ, ad certa tempora, loca &c. determinata, & quasi limitibus coarctata esse: denique juvabit non parum, sibi ipsi pœtam injungere, & quidem eo sensibiliorem, quo frequentius transgressio-num ejusmodi te reum prehenderis. Exigua quidem sunt hæc, & factu facillima; sed tanti simul momenti, ut semen, quod DEUS octo istis diebus in cordibus singulorum seminare dignatus est, in iis, qui hæc neglexerint, perexiguum, aut nullum: in iis vero, qui diligenter observaverint, fructum centuplum fore producturum, audacter asseverare non dubitem.

OMNIA
AD MAJOREM DEI GLORIAM.

Bibl Jag

300

25 v 73 09 1957

Biblioteka Jagiellońska



stdr0023917

